

大智度論卷第七十一

龍樹菩薩造

姚秦三藏法師鳩摩羅什譯

釋成辦品第五十

釋作大事
起成辦品

爾時須菩提白佛言：「世尊是深般若波羅蜜，為大事故起，不可思議事故起，不可稱事故起，無有量事故起。世尊是深般若波羅蜜，無等等事故起。」佛告須菩提：「如是如是深般若波羅蜜，為大事故起，乃至無等等事故起。何以故？般若波羅蜜中含受五波羅蜜，般若波羅蜜中含受內空，乃至無法有法空，含受四念處，乃至八聖道分，是深般若波羅蜜中含受佛十力，乃至一切種智。譬如灌頂王，國土中尊，諸有官事，皆委大臣，國王安樂無事如是。」

2615

大智度論卷七十一 釋成辦品第五十

大智度論卷七十一 釋成辦品第五十

須菩提！所有聲聞、辟支佛法，若菩薩法，若佛法，一切皆在般若波羅蜜中，般若波羅蜜能成辦其事。以是故，須菩提！般若波羅蜜為大事故起，乃至無等等事故起。復次，須菩提！是般若波羅蜜不取色，不著色故，能成辦受、想、行、識，不取、不著故，能成辦，乃至一切種智，不取、不著故，能成辦。須陀洹果，乃至阿羅漢果，辟支佛道，乃至阿耨多羅三藐三菩提，不取、不著故，能成辦。須菩提！白佛言：「云何色不取、不著故，般若波羅蜜能成辦？云何受、想、行、識，乃至阿耨多羅三藐三菩提，不取、不著故，般若波羅蜜能成辦？」佛告須菩提：「於汝意云何？頗見是色可取、可著不？」須菩提言：「不也，世尊！」須菩提於汝意云何？頗見受、想、行、識，乃至阿耨多羅三藐三菩提，可取、可著不？」須菩提言：「不也，世尊！」佛言：「善哉！善哉！」

2616

哉！須菩提！我亦不見是色可取、可著、不見故不取、不取故不著、我亦不見受、想、行、識、乃至阿耨多羅三藐三菩提及一切種智可取、可著、不見故不取、不取故不著。須菩提！我亦不見佛法、如來法、自然入法、一切智入法可取、可著、不見故不取、不取故不著。以是故、須菩提！諸菩薩摩訶薩、色亦不應取、亦不應著、受、想、行、識、乃至佛法、如來法、自然入法、一切智入法、亦不應取、亦不應著。」

爾時、欲色界諸天子白佛言：「世尊是般若波羅蜜、甚深難見難解、不可思惟、比類知、微妙善巧、智慧寂滅者可知。能信是般若波羅蜜者、當知是菩薩多供養佛、多種善根、與善知識相隨、能信解深般若波羅蜜。世尊若三千大千世界中所有衆生、皆作信行、法行人、八人、須陀洹、斯陀含、阿那含、阿羅漢、辟支佛、若智、若斷、不如

是菩薩一日行深般若波羅蜜、忍、欲、思、惟、籌量、何以故、是信行、法行人、八人、須陀洹、斯陀含、阿那含、阿羅漢、辟支佛、若智、若斷、即是菩薩摩訶薩無生法忍。」佛告欲色界諸天子：「如是、如是、諸天子、若信行、法行人、八人、須陀洹、乃至阿羅漢、辟支佛、即是菩薩摩訶薩無生法忍。諸天子、若善男子、善女人、聞是深般若波羅蜜書、受持、讀誦、說、正憶念、是善男子、善女人、疾得涅槃、勝求聲聞、辟支佛、乘善男子、善女人、遠離深般若波羅蜜、行餘經、若一劫、若減一劫、何以故、是深般若波羅蜜中、廣說上妙法、是信行、法行人、八人、須陀洹、斯陀含、阿那含、阿羅漢、辟支佛、所應學、菩薩摩訶薩亦所應學、學已得阿耨多羅三藐三菩提。」是時、欲色界諸天子俱發聲言：「世尊是深般若波羅蜜、名摩訶波羅蜜、世尊是般若波羅

蜜名不可思議，不可稱，無有量，無等等波羅蜜。信行、法行人、八人，學是深般若波羅蜜，得成就須陀洹、斯陀含、阿那含、阿羅漢、辟支佛，學是深般若波羅蜜，得成菩薩摩訶薩，是深般若波羅蜜中學，得阿耨多羅三藐三菩提。是深般若波羅蜜，亦不增，亦不減。是時諸欲色界天子，頂禮佛足，遶佛而去。去是不遠，忽然不現，各還本處。

須菩提白佛言：「世尊，若菩薩摩訶薩，聞是般若波羅蜜，即時信解者，從何處終，來生是間？」佛告須菩提：「若菩薩摩訶薩，聞是深般若波羅蜜，即時信解，不沒、不怯、不難、不疑、不悔、歡喜樂聽，聽已憶念，終不遠離，是深般若波羅蜜。若行、若住、若坐、若臥，終不廢忘，常隨法師，譬如新生犢子，不離其母，菩薩摩訶薩亦如是，為聞

深般若波羅蜜，故終不遠離法師，乃至得是深般若波羅蜜，口誦心解，正見通達。須菩提當知，是菩薩從人道中終，還生是間人中。何以故？是求佛道者，前世時聞深般若波羅蜜，書受恭敬，尊重讚歎，華香乃至幡蓋供養。以是因緣，人中命終，還生人中，聞是深般若波羅蜜，即時信解。須菩提白佛言：「世尊，頗有菩薩摩訶薩，如是功德成就，他方世界供養諸佛，於彼命終，來生是間，聞深般若波羅蜜，即時信解，書持讀誦，正憶念，有是者不？」佛言：「有菩薩如是功德成就，他方世界供養諸佛，於彼命終，來生是間，聞是深般若波羅蜜，即時信解，書持讀誦，正憶念，何以故？是菩薩摩訶薩，從他方諸佛所，聞是深般若波羅蜜，信解書持讀誦，說正憶念，於彼間終，來生此間，當知是人，是先世功德成就，復次，須菩提！

有菩薩從彌勒菩薩摩訶薩聞是深般若波羅蜜，以是善根因緣故，來生此間。須菩提！復有菩薩摩訶薩，前世時雖聞深般若波羅蜜，不問中事，來生人中，聞是深般若波羅蜜，心有疑悔難悟。須菩提！如是菩薩，當知先世雖聞是深般若波羅蜜，不問故，今續生疑悔難悟。須菩提！若菩薩先世雖聞禪波羅蜜，不問中事，今世聞般若波羅蜜時，不問故，續生疑悔。須菩提！若菩薩先世雖聞毗梨耶波羅蜜，不問中事，今世聞般若波羅蜜，不問故，續復疑悔。須菩提！若菩薩先世雖聞羼提波羅蜜，不問中事，今世聞般若波羅蜜，不問故，續復疑悔。須菩提！若菩薩先世雖聞尸羅波羅蜜，不問中事，今世聞般若波羅蜜，不問故，續復疑悔。須菩提！若菩薩先世雖聞檀波羅蜜，不問中事，今世聞般若波羅蜜，不問故，續復疑悔。復次，

2621

須菩提！菩薩摩訶薩，先世雖聞內空、外空、內外空，乃至無法空、有法空，不問中事，來生人中，聞是深般若波羅蜜，不問故，續復疑悔難悟。復次，須菩提！菩薩摩訶薩，先世雖聞四念處，乃至八聖道分，四禪、四無量心、四無色定、五神通、佛十力，乃至一切種智，不問中事，來生人中，聞是深般若波羅蜜，不問故，續復疑悔難悟。復次，須菩提！菩薩摩訶薩，先世聞深般若波羅蜜，問中事而不行，捨身生時，聞是深般若波羅蜜，若一日、二日、三日、四日、五日者，其心堅固，無能壞者。若離所聞時便退失，何以故？先世聞是深般若波羅蜜時，雖問中事，不如說行。是人或時欲聞，或時不欲聞，心輕不固，志亂不定，譬如輕毛，隨風東西。須菩提！當知是菩薩發意不久，不與善知識相隨，不多供養諸佛，先世不書是深般若波羅蜜，不讀不

2622

誦，不正憶念，不學般若波羅蜜，不學禪波羅蜜，不學毗梨耶波羅蜜，不學羼提波羅蜜，不學尸羅波羅蜜，不學檀波羅蜜，不學內空乃至無法有法空，不學四念處乃至八聖道分，不學四禪，四無量心，五神通，佛十力，乃至不學一切種智。如是須菩提，當知是菩薩摩訶薩，新發大乘意，少信少樂故，不能書是深般若波羅蜜，不能受持、讀誦、說，正憶念。須菩提，若求佛道善男子、善女人，不書是深般若波羅蜜，不受持、讀誦、不說，不正憶念，亦不爲深般若波羅蜜所護，乃至不爲一切種智所護，是人亦不如說行深般若波羅蜜，乃至不如說行一切種智，是人或墮二地，若聲聞地，若辟支佛地。何以故？是善男子、善女人，不書是深般若波羅蜜，不讀、不誦、不說，不正憶念，是人亦不爲深般若波羅蜜所護，亦不如說行。以是故，

是善男子、善女人，於二地中當墮一地。」

論問曰：上來數說是般若波羅蜜甚深因緣，今何以復重說？答曰：處處說甚深，多有所利益，凡人不知，謂爲重說。譬如大國王未有嫡子，求禱神祇，積年無應。時王出行，夫人產子男，遣信告王：「夫人產男！」王聞喜而不答，乃至十反。使者白王：「向所白者，王不聞也。」王曰：「我即聞之，久來願滿，故喜心內悅，樂聞不已耳。」即敕有司，賜此人百萬兩金，一語十萬兩。王聞使者言，語語中有利益，非重說，不知者謂爲重。處處說甚深亦如是。佛與菩薩，須菩提，知大有利益。須菩提聞佛說深般若，不能得底，轉覺甚深；聽者處處聞甚深，得禪定、智慧、利益等。凡夫人謂爲重說。復次，深淺無定，隨衆生，解者無深，不解者謂爲深。般若波羅蜜，除佛無能徧知，故言甚深。

是故佛爲衆生故說甚深，無定甚深相。若定甚深，無人能行，是故言菩薩謂般若甚深，爲不行般若波羅蜜。甚深因緣，所謂爲大事故起，乃至無等等事故起。大事等義，如先說。此中佛自說大事等因緣，所謂般若波羅蜜，含受五波羅蜜等諸法。問曰：五波羅蜜等各異相，云何言般若波羅蜜中含受？答曰：是中說經卷中含受。復次，五波羅蜜等諸法，與般若波羅蜜和合，方便迴向，故五波羅蜜等諸法得至佛道。灌頂王如佛，國事種種度衆生法，大臣是般若波羅蜜。佛委仗般若波羅蜜，成辦種種法，故安處禪定，快樂無事。又如欲除乾薪草木，以火投中，則火力能燒令盡，人便無事。復次，是般若波羅蜜，不取、不著色等諸法，故名含受。初染曰取，生愛曰著。須菩提問：云何般若爲色等諸法，不取、不著，故名含受？佛於四

答中，以反問答於汝意云何？以智慧眼見是色等法可取、可著，不須菩提意念。若智慧眼見空、無相、無作、無量、不可思議相，云何當答色等法定相可取、可著？佛可其所說，汝未得一切智，不見色等諸法。我一切智人，亦不見色等諸法，是故歎言善哉。

是時，諸天子讚歎般若波羅蜜，及行般若波羅蜜者，作是言：若三千大千世界中衆生，皆作信行、法行，乃至辟支佛、若智、若斷。智者十智，斷者二種斷：有殘斷，無殘斷。學人有殘斷，無學人無殘斷。不如是菩薩，一日行深般若波羅蜜，何以故？是諸賢聖智、斷，皆是菩薩無生法忍。問曰：若諸賢聖智、斷，即是無生忍者，何以言不如？答曰：信行等人，無大悲，捨衆生，故不如。無方便力，不能於涅槃自反。譬如衆水會恆河，俱入大海，欲入海時，水勢湊急，衆生在中，無能

自反，唯有大力者乃能自出。復次，諸餘賢聖智，斷成就，菩薩始得無生忍而力能過之，是故勝。智斷功德雖成就，不及菩薩初忍。譬如大臣，功業雖大，不及太子。復次，煖頂忍法，是小乘初門；菩薩法忍，是大乘初門。聲聞、辟支佛雖終成，尚不及菩薩初入道門，何況成佛！問曰：聲聞、辟支佛法，是小乘，菩薩是大乘，云何言二乘智斷即是菩薩無生忍？答曰：所緣同，如法性實際亦同，利鈍智慧為異。又有無量功德，及大悲心守護，故勝。餘種種說，是讚般若波羅蜜。行般若波羅蜜人，有上、中、下者。聞般若波羅蜜，直信聽受，不問中義；中者既聞已，問義而不能行；上者聞解能行，下者雖得人身，聞般若疑悔難悟，根鈍福薄故。中者得人身，聞般若，一心信樂，能知義趣，從一日至四、五日，心能堅固，過是已往，不能信樂，或欲聞、

或不欲聞，以其宿世雖解義，不能行，根鈍福薄故。上者得人身，聞般若，心即深解，信樂不捨，常隨法師。上二種菩薩，不能得上地故，當墮二乘，不為般若所守護，故為更明了是事故。佛於後品中為作譬喻。如大海水中船破，若得所依則能渡，不得所依則不能渡。

釋譬喻品第五十一

佛告須菩提：「譬如大海中船破壞，其中人若不取木，不取器物，不取浮囊，不取死屍，須菩提！當知是人不到彼岸，沒海中死。須菩提！若船破時，其中人取木，取器物，浮囊，死屍者，當知是人終不沒死，安隱無礙，得到彼岸。須菩提！求佛道善男子、善女人，亦復如是。若但有信樂，不依深般若波羅蜜，不書、不讀、不誦、不正憶念，不依禪波羅蜜、毗梨耶波羅蜜、羼提波羅蜜、尸羅波羅蜜、檀波羅蜜，

不書、不讀、不誦、不正憶念，乃至不依一切種智，不書、不讀、不誦、不正憶念。須菩提當知是善男子中道衰耗，是人未到一切種智於聲聞、辟支佛地取證。須菩提若有求佛道善男子、善女人爲阿耨多羅三藐三菩提故，有信、有忍、有淨心、有深心、有欲、有解、有捨、有精進，是人依深般若波羅蜜書持讀誦說，正憶念是善男子、善女人爲阿耨多羅三藐三菩提故，有諸信、忍、淨心、深心、欲、解、捨、精進，爲深般若波羅蜜所護，乃至一切種智所護，爲深般若波羅蜜守護故，乃至一切種智守護故，終不中道衰耗。過聲聞、辟支佛地，能淨佛世界，成就衆生，當得阿耨多羅三藐三菩提。須菩提譬如男子、女人持坏瓶取水，當知是瓶不久爛壞。何以故？是瓶未熟，還歸於地。如是，須菩提！善男子、善女人，雖有爲阿耨多羅三藐三菩

2629

提心，有信、有忍、有淨心、有深心、有欲、有解、有捨、有精進，不爲般若波羅蜜方便力所守護，不爲禪波羅蜜、毗梨耶波羅蜜、羼提波羅蜜、尸羅波羅蜜、檀波羅蜜所守護，不爲內空乃至無法有法空四念處乃至八聖道分、佛十力乃至一切種智所守護。須菩提當知是人中道衰耗，墮聲聞、辟支佛地。須菩提譬如男子、女人持熟瓶取水，若河、若井、若池、若泉，當知是瓶持水安隱。何以故？是瓶成熟。如是，須菩提！善男子、善女人求阿耨多羅三藐三菩提，有諸信、忍、淨心、深心、欲、解、捨、精進，爲般若波羅蜜方便力所護，爲禪定、精進、忍、戒、施，乃至一切種智所護。故須菩提當知是人中道衰耗，過聲聞、辟支佛地，能淨佛世界，成就衆生，得阿耨多羅三藐三菩提。須菩提譬如大海邊，船未莊治，便持財物著上。須菩提當知是

2630

船中道壞沒，船與財物各在一處，是賈客無方便力故，亡其重寶。如是，須菩提！是求佛道善男子、善女人，雖有爲阿耨多羅三藐三菩提心，有信、忍、淨心、深心，欲解捨精進，不爲般若波羅蜜方便力所守護，乃至不爲一切種智所守護，故當知是人中道衰耗，失大珍寶。大珍寶者，所謂一切種智衰耗者，墮聲聞、辟支佛地。須菩提！譬如有人，有智方便，莊治海邊大船，然後推著水中，持財物著上而去，當知是船不中道沒壞，必得安隱到所至處。如是，須菩提！善男子、善女人爲阿耨多羅三藐三菩提，有信、忍、淨心、深心，欲解捨精進，爲般若波羅蜜方便力所護，爲禪精進、忍辱戒施，乃至一切種智所護，故當知是菩薩得到阿耨多羅三藐三菩提，不中道墮聲聞、辟支佛地。須菩提！譬如有人年百二十歲，年耆根熟，又有風

2631

冷熱病，若雜病。須菩提！於汝意云何？是人能從牀起不？」須菩提言：「不能。」佛言：「是人或有能起者，云何？」須菩提言：「是人雖能起，不能遠行，若十里，若二十里，以其老病故。」如是，須菩提！善男子、善女人，雖有爲阿耨多羅三藐三菩提心，有信、忍、淨心、深心，欲解捨精進，不爲般若波羅蜜方便力所守護，乃至不爲一切種智所守護，故當知是人中道墮聲聞、辟支佛地。何以故？不爲般若波羅蜜方便力所守護，故須菩提！如向老人百二十歲，年耆根熟，又有風冷熱病，若雜病，是人欲起行，有兩健人各扶一腋，語老人言：「莫有所難，隨所欲至，我等二人終不相捨。」如是，須菩提！善男子、善女人爲阿耨多羅三藐三菩提，有信、忍、淨心、深心，欲解捨精進，爲般若波羅蜜方便力所護，乃至爲一切種智所護，當知

2632

是人中道墮聲聞、辟支佛地，能到是處，所謂阿耨多羅三藐三菩提。」

論釋曰：菩薩有二種：一者得諸法實相；二者雖未得實相，於佛道中有信、有忍、有淨、心有深、心有欲、有解、有捨、有精進。信者信罪福業因緣果報，信行六波羅蜜，得阿耨多羅三藐三菩提。有人雖信佛道，思惟籌量，心不能忍，是故說有忍。有人雖忍，邪疑未斷，心濁不淨，是故說有淨。有人雖信、忍、心淨，而有淺有深，是故說深心。四事因緣故，一心欲得無上道，不欲餘事，是故說有欲。了了決定，知無上道爲大，世間餘事爲小，是故說有解。以欲解定心故，捨財及捨諸惡、心慳、恚等煩惱，是故說捨。爲捨故，常能精進。有如是等諸功德，若不得般若波羅蜜，若人身壞命終時，若惡知識沮壞，則

失菩薩道。世間功德故，受世間果報，然後墮聲聞、辟支佛地，不能至無上道。此中佛自說五譬喻：船是行者身，浮囊等物即是般若方便，瓶是菩薩道，般若方便是火。未與般若方便和合故，不能受持六波羅蜜功德水，至無上道。不補治船，是菩薩無方便。信等功德寶物，是五波羅蜜等諸善法。船寶異處者，與本願乖異，或受人天樂，或墮二乘。大利者，所謂一切智等佛法寶。老病人是有信等功德菩薩，不斷六十二邪見，故名老；不斷百八等諸煩惱，故名病。從牀起者，從三界牀起，我當作佛。以邪見煩惱因緣故，不能成菩薩道。二人者，般若及方便。般若波羅蜜，能滅諸邪見煩惱。戲論將至畢竟空中，方便將出畢竟空。

爾時，佛語須菩提言：「善哉！善哉！汝爲諸菩薩摩訶薩，問佛是

事。須菩提！若有求佛道善男子、善女人，從初發意已來，以我、我所、心、布施、持戒、忍辱、精進、禪定、智慧，是善男子、善女人布施時，作是念：我是施主，我施是人，我施是物，我持戒，我修忍，我精進，我入禪，我修智慧，是善男子、善女人念有是施，是我施，乃至念有是慧，是我慧。何以故？檀波羅蜜中無如是分別，遠離此彼岸，是檀波羅蜜相。尸羅波羅蜜、羼提波羅蜜、毗梨耶波羅蜜、禪波羅蜜、般若波羅蜜中無如是分別。何以故？遠離此彼岸，是般若波羅蜜相。是人不知此岸，不知彼岸，是人不為檀波羅蜜，乃至不為一切種智所護，故墮聲聞、辟支佛地，不能到薩婆若。須菩提！云何求佛道人無方便？須菩提！求佛道人從初發心已來，無方便行布施、持戒、忍辱、精進、禪定、修智慧，是人作如是念：我布施，施是人，以是物施，我持戒，

修忍、勤精進、入禪定、修智慧，如是修智慧，是人念有是施，是我施，以是施自高，念有是戒，是我戒，以是戒自高，念有是忍，是我忍，以是忍自高，念有是精進，是我精進，以是精進自高，念有是禪定，是我禪，以是禪自高，念有是慧，是我慧，以是慧自高。何以故？檀波羅蜜中無如是分別，遠離此彼岸，是檀波羅蜜相；遠離此彼岸，是尸羅波羅蜜相；遠離此彼岸，是羼提波羅蜜相；遠離此彼岸，是毗梨耶波羅蜜相；遠離此彼岸，是禪波羅蜜相；遠離此彼岸，是般若波羅蜜相。何以故？般若波羅蜜中，無如是憶念分別。是求佛道善男子、善女人不知此岸，不知彼岸，是人不為檀波羅蜜所護，不為尸羅波羅蜜、羼提波羅蜜、毗梨耶波羅蜜、禪波羅蜜、般若波羅蜜所護，乃至不為一切種智所護，故或墮聲聞道中，或墮辟支佛道中，

不能得到薩婆若。如是，須菩提！菩薩摩訶薩，不爲般若波羅蜜方便力所守護，故或墮聲聞地，或墮辟支佛道中。須菩提！云何菩薩摩訶薩爲般若波羅蜜方便力所守護，不墮聲聞、辟支佛道中，疾得阿耨多羅三藐三菩提？須菩提！菩薩從初已來，以方便力布施，無我、我所心布施，乃至無我、我所心修智慧，是人不作是念：我有是施，是我施，不以是施自高，乃至般若波羅蜜亦如是。是菩薩不念我布施，不念我施是人用是物，不念我持戒，有是戒，不念我忍辱，有是忍辱，不念我精進，有是精進，不念我禪定，有是禪定，不念我修智慧，有是智慧。何以故？是檀波羅蜜中無如是分別，遠離此彼岸是檀波羅蜜相；遠離此彼岸是尸羅波羅蜜相；遠離此彼岸，是羼提波羅蜜相；遠離此彼岸是毗梨耶波羅蜜相；遠離此彼岸，

2637

是禪波羅蜜相；遠離此彼岸是般若波羅蜜相。何以故？是般若波羅蜜中無如是分別。是菩薩摩訶薩知此岸知彼岸，是人爲檀波羅蜜所護，爲尸羅波羅蜜所護，爲羼提波羅蜜所護，爲毗梨耶波羅蜜所護，爲禪波羅蜜所護，爲般若波羅蜜所護，乃至爲一切種智所護，故不墮聲聞、辟支佛地，得到薩婆若。如是，須菩提！菩薩摩訶薩爲般若波羅蜜方便力所守護，不墮聲聞、辟支佛地，疾得阿耨多羅三藐三菩提。」

2638

爾時，佛可須菩提意，更說失行因緣。菩薩雖行信等善法，亦不得無上道，所謂以我、我所心行六波羅蜜故。是中無分別此岸彼岸，以遠離相是般若波羅蜜，而分別著行是爲失。上佛雖說無方便義，不說無方便名，欲令是事明了，故命須菩提：云何有方便、無

方便？內無我我所心，外觀一切法空，不取相，般若方便乃至一切種智守護菩薩故，名有方便。守護者，五波羅蜜邊得功德力，般若波羅蜜邊得智慧力，以二因緣故不失道。

釋知識品第五十二 經作著
知識品

爾時須菩提白佛言：「世尊！新學菩薩摩訶薩，云何應學般若波羅蜜？禪波羅蜜、毗梨耶波羅蜜、羼提波羅蜜、尸羅波羅蜜、檀波羅蜜。」佛告須菩提：「新學菩薩摩訶薩，若欲學般若波羅蜜，精進、忍、戒、檀波羅蜜，先當親近供養善知識，能說是深般若波羅蜜者。是人作是教汝善男子！所有布施，一切迴向阿耨多羅三藐三菩提。善男子！所有持戒、忍辱、精進、禪定、智慧，一切迴向阿耨多羅三藐三菩提。汝莫以色是阿耨多羅三藐三菩提，莫以受、想、行、

識是阿耨多羅三藐三菩提，莫以檀波羅蜜是阿耨多羅三藐三菩提，莫以尸羅波羅蜜、羼提波羅蜜、毗梨耶波羅蜜、禪波羅蜜、般若波羅蜜是阿耨多羅三藐三菩提，莫以內空乃至無法有法空是阿耨多羅三藐三菩提，莫以四念處、四正勤、四如意足、五根、五力、七覺分、八聖道分是阿耨多羅三藐三菩提，莫以四禪、四無量心、四無色定、五神通是阿耨多羅三藐三菩提，莫以佛十力乃至十八不共法是阿耨多羅三藐三菩提。所以者何？不取色，便得阿耨多羅三藐三菩提，不取受、想、行、識，便得阿耨多羅三藐三菩提，不取檀波羅蜜乃至般若波羅蜜，便得阿耨多羅三藐三菩提，不取內空乃至無法有法空，四念處乃至十八不共法，便得阿耨多羅三藐三菩提。善男子！行是深般若波羅蜜時，莫貪色，何以故？善

男子是色非可貪者，莫貪受、想、行、識，何以故？受、想、行、識非可貪者。善男子，莫貪檀波羅蜜、尸羅波羅蜜、羼提波羅蜜、毗梨耶波羅蜜、禪波羅蜜、般若波羅蜜，莫貪內空乃至無法有法空，莫貪四念處乃至八聖道分，莫貪四禪、四無量心、四無色定、五神通，莫貪佛十力乃至一切種智，何以故？一切種智非可貪者。善男子，莫貪須陀洹果乃至阿羅漢果，莫貪辟支佛道，莫貪菩薩法位，莫貪阿耨多羅三藐三菩提，何以故？阿耨多羅三藐三菩提非可貪者。所以者何？諸法自性空故。」

論問曰：須菩提問新學所行，佛何以乃答菩薩久行微妙事？所謂不取一切法，一切法性空故。答曰：諸法性空有二種：一者大菩薩所得，二者小菩薩所學柔順忍，以智慧發心。此中但說小菩薩所

學空。復次，有智慧氣分，佛數爲菩薩，若無者，雖久行餘功德，不數爲菩薩。譬如佛說聲聞法中頂法相，於三寶中有少信，是名頂法，是信過煖法，修禪定生，以色界心得於佛無礙解脫，是爲小於凡人爲大。如是，新發意菩薩得般若波羅蜜氣味故，能受化，名爲新學，過五波羅蜜功德，於凡夫爲大，於佛爲小。復次，佛不直說諸法性空，先教供養親近善知識，善知識爲說五波羅蜜功德。善知識雖種種教化，佛但稱其不壞法，所謂於色等諸法，不貪、不著、不取。譬如金翅鳥子始生，從一須彌至一須彌，菩薩亦如是，初學能生如是深智，何況久學？又如小火能燒，何況大者？菩薩亦如是，新學時能以般若轉世間法，令畢竟空，燒諸煩惱，何況得力具足？

須菩提白佛言：「世尊，諸菩薩摩訶薩能爲難事於一切性空

法中，求阿耨多羅三藐三菩提，欲得阿耨多羅三藐三菩提！佛言：「如是如是須菩提！菩薩摩訶薩能為難事，於一切性空法中，求阿耨多羅三藐三菩提，欲得阿耨多羅三藐三菩提。須菩提！諸菩薩摩訶薩，為安隱世間故，發阿耨多羅三藐三菩提心，為安樂世間故，為救世間故，為世間歸故，為世間依處故，為世間洲故，為世間將導故，為世間究竟道故，為世間趣故，發阿耨多羅三藐三菩提心。須菩提！云何菩薩摩訶薩為安隱世間故，發阿耨多羅三藐三菩提心？須菩提！菩薩摩訶薩得阿耨多羅三藐三菩提時，拔出六道衆生，著無畏岸涅槃處。須菩提！是為菩薩摩訶薩為安隱世間故，發阿耨多羅三藐三菩提心。云何菩薩摩訶薩為安樂世間故，發阿耨多羅三藐三菩提心？須菩提！菩薩摩訶薩得阿耨多

羅三藐三菩提時，拔出衆生種種憂苦愁惱，著無畏岸涅槃處。須菩提！是為菩薩摩訶薩為安樂世間故，發阿耨多羅三藐三菩提心。云何菩薩摩訶薩為救世間故，發阿耨多羅三藐三菩提心？須菩提！菩薩摩訶薩得阿耨多羅三藐三菩提時，救衆生生死中種種苦，亦為斷是苦故而為說法，衆生聞法，漸以三乘而得度脫。須菩提！是為菩薩摩訶薩為救世間故，發阿耨多羅三藐三菩提心。云何菩薩摩訶薩為世間歸故，發阿耨多羅三藐三菩提心？須菩提！菩薩摩訶薩得阿耨多羅三藐三菩提時，拔出衆生老、病、死相，憂悲愁惱法，著無畏岸涅槃處。須菩提！是為菩薩摩訶薩為世間歸故，發阿耨多羅三藐三菩提心。云何菩薩摩訶薩為世間依處故，發阿耨多羅三藐三菩提心？須菩提！菩薩摩訶薩得阿耨多

羅三藐三菩提時，爲衆生說一切法無依處。須菩提！是爲菩薩摩訶薩，爲世間依處故，發阿耨多羅三藐三菩提心。須菩提白佛言：「世尊！云何一切法無依處？」佛言：「色不相續，即是色無生，色無生即是色不滅，色不滅即是色無依處。受、想、行、識，乃至一切種智，亦如是。須菩提！是爲菩薩摩訶薩，爲世間依處故，發阿耨多羅三藐三菩提心。云何菩薩摩訶薩爲世間究竟道故，發阿耨多羅三藐三菩提心？須菩提！若菩薩摩訶薩得阿耨多羅三藐三菩提時，爲衆生說如是法：色究竟相，非是色，受、想、行、識，乃至一切種智究竟相，非是一切種智。須菩提！如究竟相，一切法相亦如是。」須菩提言：「世尊！若一切法如究竟相者，諸菩薩摩訶薩，皆應行阿耨多羅三藐三菩提。何以故？世尊！色究竟相中無有分別，受、想、

2645

行、識究竟相中無有分別，乃至一切種智究竟相中無有分別，所謂是色，是受、想、行、識，乃至是一切種智。」佛告須菩提：「如是如是！色究竟相中無有分別，受、想、行、識，乃至一切種智究竟相中無有分別，所謂是色，乃至是一切種智。須菩提！是爲菩薩摩訶薩難事。如是觀諸法寂滅相，而心不沒、不怯。何以故？菩薩摩訶薩作是念：是諸深法，我應如是知得阿耨多羅三藐三菩提。如是寂滅微妙法，當爲衆生說。是爲菩薩摩訶薩爲世間究竟道故，發阿耨多羅三藐三菩提心。云何菩薩摩訶薩爲世間洲故，發阿耨多羅三藐三菩提心？須菩提！若江河、大海，四邊水斷，是爲洲。須菩提！色亦如是，前後際斷，受、想、行、識，前後際斷，乃至一切種智，前後際斷。以是前後際斷故，一切法亦斷。須菩提！是一切法前後際斷故，即是

2646

寂滅，即是妙寶，所謂空無所得，愛盡無餘，離欲涅槃。須菩提！菩薩摩訶薩得阿耨多羅三藐三菩提時，以寂滅微妙法為眾生說。須菩提是為菩薩摩訶薩為世間洲故，發阿耨多羅三藐三菩提心。云何菩薩摩訶薩為世間將導，須菩提！菩薩摩訶薩得阿耨多羅三藐三菩提時，為眾生說色不生不滅，不垢不淨，說受、想、行、識不生不滅，不垢不淨，說十二處、十八界、四念處，乃至八聖道分、四禪、四無量心、四無色定、五神通不生不滅，不垢不淨，說須陀洹果，乃至阿羅漢果、辟支佛道，不生不滅，不垢不淨，說佛十力，乃至一切種智，不生不滅，不垢不淨。須菩提！是為菩薩摩訶薩為世間將導故，發阿耨多羅三藐三菩提心。」

論釋曰：須菩提發希有心，白佛言：諸菩薩未斷煩惱，大悲未具，未

得阿鞞跋致，知諸法本性空，而能發無上道心，是事甚難！佛可其言，如是！更讚菩薩希有因緣，所謂菩薩安隱世間故發心。安隱者，能破一切煩惱，究竟不變失。譬如良藥能破病，不問甘苦，以能究竟除病安隱故。佛能使眾生常安隱，不期一世二世。世間樂者，有法雖安隱而不樂，有法今世苦後世樂。如服苦藥，腹中安隱，口中不美，是故說佛能與今世後世樂。六道無常相故，非安隱，是故說出六道名安隱。世間樂，著因緣故，久後必生憂惱，不名為樂。涅槃樂，始終無變故，說離憂苦為樂。救世間者，如人為怨賊所逐，若親戚，若官力能救。眾生亦如是，惡罪諸煩惱因緣，及魔民所逐，唯諸佛能說法救護。世間歸者，如人遇暴風疾雨，必歸房舍。世間種種邪見煩惱等，身心內外苦惱，老病死諸憂苦等，若歸佛，佛以種種

因緣，拔其憂悲苦惱。依處者，一切有爲法，從和合因緣生故，無自力，不可依止。衆生爲苦所逼，來依止佛。佛爲說無依止法，無依止法者是眞實，所謂無餘涅槃。色等五衆滅，更不相續，不相續即是不生不滅，不生不滅即是畢竟空，無依止處。問曰：若無依止處，何以說依止？答曰：依止有二種：一者，以愛見等諸煩惱，依止有爲法；二者，清淨智慧，說依止涅槃。煩惱見故，說無依止。究竟道者，所謂諸法實相，畢竟空。色等法，前際中無，後際中亦無，現在中亦無。凡夫人憶想分別，業果報諸情力故，有顛倒見。聖人以智慧眼觀之，皆虛誑不實。如前後中亦爾，若無先後，云何有中？能如是爲衆生說法，則安處衆生於究竟第一道中。世間洲者，如洲四邊無地，色等法亦如是，前後皆不可得。中間，如究竟道中破入前後空故，中

間亦空。水者，三漏、四流諸煩惱，及業果報中一切法，畢竟空，無所取，所謂涅槃，是爲洲。衆生沒在四流水中，佛以八正道船，引著涅槃洲上。如是種種因緣，接度衆生，名爲將導。

經「云何菩薩摩訶薩爲世間趣故，發阿耨多羅三藐三菩提心？須菩提，菩薩摩訶薩得阿耨多羅三藐三菩提時，爲衆生說色趣空，說受、想、行、識趣空，乃至說一切種智趣空，爲衆生說色非趣、非不趣。何以故？是色空相，非趣、非不趣；說受、想、行、識非趣、非不趣。何以故？是受、想、行、識空相，非趣、非不趣。乃至一切種智非趣、非不趣。何以故？是一切種智空相，非趣、非不趣。如是，須菩提，菩薩摩訶薩爲世間趣故，發阿耨多羅三藐三菩提心。何以故？一切法趣空，是趣不過。何以故？空中趣非趣不可得故。須菩提，一切法趣無相，是

趣不過。何以故？無相中趣非趣不可得故。須菩提！一切法趣無作，是趣不過。何以故？無作中趣非趣不可得故。須菩提！一切法趣無起，是趣不過。何以故？無起中趣非趣不可得故。須菩提！一切法趣無所有，不生不滅，不垢不淨，是趣不過。何以故？無所有，不生不滅，不垢不淨中，趣非趣不可得故。須菩提！一切法趣夢，是趣不過。何以故？夢中趣非趣不可得故。須菩提！一切法趣幻、趣響、趣影、趣化，是趣不過。何以故？是化等中趣非趣不可得故。須菩提！一切法趣無量無邊，是趣不過。何以故？無量無邊中，趣非趣不可得故。須菩提！一切法趣不與不取，是趣不過。何以故？不與不取中，趣非趣不可得故。須菩提！一切法趣不舉不下，是趣不過。何以故？不舉不下中，趣非趣不可得故。須菩提！一切法趣不增不減，是趣不過。何以

故。無增無減中，趣非趣不可得故。須菩提！一切法趣不來不去，是趣不過。何以故？不來不去中，趣非趣不可得故。須菩提！一切法趣不入不出，不合不散，不著不斷，是趣不過。何以故？不著不斷中，趣非趣不可得故。須菩提！一切法趣我、衆生、壽命、人、起、使、起者、作、使、作者、知者、見者，是趣不過。何以故？我乃至知者、見者，畢竟不可得。何況有趣非趣？須菩提！一切法趣常，是趣不過。何以故？常畢竟不可得。云何當有趣非趣？須菩提！一切法趣樂、淨、我，是趣不過。何以故？樂、淨、我，畢竟不可得。云何當有趣非趣？須菩提！一切法趣無常、苦、不淨、無我，是趣不過。何以故？無常、苦、不淨、無我，畢竟不可得。云何當有趣非趣？須菩提！一切法趣欲事，是趣不過。何以故？欲事畢竟不可得。何況當有趣非趣？須菩提！一切法趣瞋事、癡事、見事，是

趣不過。何以故？瞋事、癡事、見事畢竟不可得。何況當有趣非趣？須菩提！一切法趣如，是趣不過。何以故？如中無來無去故。須菩提！一切法趣法性實際不可思議性，是趣不過。何以故？法性實際不可思議性中無來無去故。須菩提！一切法趣平等，是趣不過。何以故？平等中趣非趣不可得故。須菩提！一切法趣不動相，是趣不過。何以故？不動相中趣非趣不可得故。須菩提！一切法趣色，是趣不過。何以故？色畢竟不可得故。云何當有趣非趣？須菩提！一切法趣受、想、行、識，是趣不過。何以故？受、想、行、識畢竟不可得。云何當有趣非趣？十二處、十八界亦如是。須菩提！一切法趣檀波羅蜜，是趣不過。何以故？檀畢竟不可得故。云何當有趣非趣？須菩提！一切法趣尸羅波羅蜜，是趣不過。何以故？尸羅畢竟不可得故。云何當有趣非

2653

趣。須菩提！一切法趣羼提波羅蜜，是趣不過。何以故？羼提畢竟不可得故。云何當有趣非趣？須菩提！一切法趣毗梨耶波羅蜜，是趣不過。何以故？毗梨耶畢竟不可得故。云何當有趣非趣？須菩提！一切法趣禪波羅蜜，是趣不過。何以故？禪畢竟不可得故。云何當有趣非趣？須菩提！一切法趣般若波羅蜜，是趣不過。何以故？般若畢竟不可得故。云何當有趣非趣？須菩提！一切法趣內空，是趣不過。何以故？內空畢竟不可得故。云何當有趣非趣？須菩提！一切法趣外空，是趣不過。何以故？外空畢竟不可得故。云何當有趣非趣？須菩提！一切法趣內外空，是趣不過。何以故？內外空畢竟不可得故。云何當有趣非趣？乃至一切法趣無法有法空，是趣不過。何以故？無法有法空畢竟不可得故。云何當有趣非趣？須菩提！一切法趣

2654

四念處乃至八聖道分是趣不過。何以故？四念處乃至八聖道分畢竟不可得故。云何當有趣？非趣須菩提！一切法趣佛十力乃至一切種智是趣不過。何以故？一切種智中趣非趣不可得故。須菩提！一切法趣須陀洹果、斯陀含果、阿那含果、阿羅漢果、辟支佛道是趣不過。何以故？須陀洹果乃至辟支佛道中趣非趣不可得故。須菩提！一切法趣阿耨多羅三藐三菩提是趣不過。何以故？阿耨多羅三藐三菩提中趣非趣不可得故。須菩提！一切法趣須陀洹乃至佛是趣不過。何以故？須陀洹乃至佛中趣非趣不可得故。須菩提白佛言：「世尊是深般若波羅蜜，誰能信解者？」佛告須菩提：「有菩薩摩訶薩，先於諸佛所久行六波羅蜜，善根純熟，供養無數百千萬億諸佛，與善知識相隨，是輩人能信解深般若波

羅蜜。」須菩提白佛言：「世尊能信解是深般若波羅蜜者，有何等性？何等相？何等貌？」佛言：「欲瞋癡斷離，是性相貌。是菩薩摩訶薩，則能信解深般若波羅蜜。」

論問曰：上諸事中略說，今趣中何以廣說？答曰：趣是乃至品竟，總上九事之會歸，是故多說。復次，安樂等及趣，皆同一義，俱出衆生著涅槃故。若事事廣說，則不可盡。趣最在後，故廣說。當知餘者亦皆應廣說。色等法趣空者，如虛空但有名而無法，色等法亦爾，終歸於空。諸法究竟相必空故，餘者皆虛妄。如人初雖有善言，久久乃知情實。色等諸法亦如是。入無餘涅槃時，與虛空無異。當知先亦如是。但凡夫顛倒果報，故見異。一切法無有過出空等諸相。如人欲出過虛空，不可得。我等十六名，皆因五衆和合假有此名，無

有實法，云何當有趣非趣？若常淨樂，我等四顛倒，破四聖行，如常等四法不可得，以顛倒故，色等諸法亦如是。如常等不可得，無常等從常等出故，亦不可得。是故說一切法趣常等，趣無常等。須菩提問佛：是法甚深微細，誰當信解者？佛答說：久行等因緣能信。更問：久行等人有何等相？佛答：是人離三毒心，亦不見是離，深入諸法實相故。問曰：是人未得無生忍法，云何言斷三毒？答曰：斷有二種：一者根本斷，二者薄少斷。此中說薄少斷行者不分別是斷，是煩惱，何以故？煩惱相顛倒不定故，煩惱即是斷，是故言離。

釋趣智品第五十三 經作趣一切智品

須菩提白佛言：「世尊是諸菩薩摩訶薩，解深般若波羅蜜者，當趣何所？」佛告須菩提：「是菩薩摩訶薩，解深般若波羅蜜，當

趣一切種智。」須菩提白佛言：「世尊是菩薩摩訶薩能趣一切種智者，是為一切衆生所歸趣，修般若波羅蜜故。世尊修般若波羅蜜，即修一切諸法。世尊無所修，是修般若波羅蜜，不受修壞，修是修般若波羅蜜。」佛告須菩提：「何等法壞故，修般若波羅蜜為壞修？」世尊色壞故，般若波羅蜜為壞修。受、想、行、識、十二處、十八界壞故，般若波羅蜜為壞修。我乃至知者、見者壞故，般若波羅蜜為壞修。世尊檀波羅蜜壞故，般若波羅蜜為壞修。乃至般若波羅蜜壞故，般若波羅蜜為壞修。內空乃至無法有法空、四念處乃至十八不共法、須陀洹果乃至一切種智壞故，般若波羅蜜為壞修。」佛言：「如是如是，須菩提，色壞故，般若波羅蜜為壞修，乃至一切種智壞故，般若波羅蜜為壞修。」爾時，佛告須菩提：「是深般

若波羅蜜中，阿鞞跋致菩薩摩訶薩應當驗知。若菩薩摩訶薩，是深般若波羅蜜中不著，當知是阿鞞跋致。禪波羅蜜乃至檀波羅蜜中不著，四念處乃至一切種智中不著，當知是阿鞞跋致。

論問曰：般若波羅蜜非趣非不趣，須菩提何以故？問行般若者趣至何處？又佛何以答趣薩婆若？答曰：外道言諸法從因趣果，從先世入今世，從今世趣後世，破是常顛倒故，言無趣不趣。此中須菩提以無著心問，佛以無著心答。般若波羅蜜畢竟空，於諸法無障無礙，得無障無礙解脫故，無障無礙因果相似故，言解深般若者趣一切種智。須菩提言菩薩知般若波羅蜜者，為一切衆生所歸趣，如子為苦惱所逼，則趣父母。問曰：何以故但菩薩解深般若波羅蜜為衆生所歸趣？答曰：菩薩於衆生中大悲心故，常修習般若

波羅蜜以修故，能解一切諸法，皆入般若波羅蜜，是故修般若波羅蜜即修一切法。般若無定實法可得，故經中說無所修是修般若波羅蜜。般若波羅蜜中，一切諸觀有過故不受，是名不受修壞修者，一切法無常散壞故，名壞修。可破壞法者，所謂色等乃至一切種智。佛可須菩提所說上品未^{作未字}說阿鞞跋致菩薩性相貌，今應驗試，知於深般若波羅蜜中著不？若著則非，若不著則是其相。行般若波羅蜜菩薩有二種：一者因般若波羅蜜觀一切法畢竟空，般若亦自空；二者不能觀般若亦空，是故經中試知著不。

經「若有阿鞞跋致菩薩摩訶薩，行深般若波羅蜜時，不以他人語為堅要，亦不隨他教行。阿鞞跋致菩薩摩訶薩，不為欲心、瞋心、癡心所牽。若阿鞞跋致菩薩摩訶薩，不遠離六波羅蜜。若阿鞞跋

致菩薩摩訶薩，聞說深般若波羅蜜時，心不驚、不沒、不怖、不畏、不悔、歡喜樂聞、受持、讀誦、正憶念，如說行。須菩提當知是菩薩先世已聞是深般若波羅蜜中事，已受持、讀誦、說、正憶念。何以故？是菩薩摩訶薩有大威德故，聞是深般若波羅蜜，心不驚、不怖、不畏、不沒、不悔、歡喜樂聞、受持、讀誦、正憶念。須菩提白佛言：「世尊，若菩薩摩訶薩聞深般若波羅蜜，不驚、不怖，乃至正憶念，世尊是菩薩摩訶薩，云何行般若波羅蜜？」佛言：「隨順一切種智心，是菩薩摩訶薩，應如是行般若波羅蜜。」世尊云何名隨順一切種智心，是菩薩摩訶薩，應如是行般若波羅蜜？」佛言：「以空隨順，是爲菩薩摩訶薩行深般若波羅蜜，以無相、無作、無所有、不生、不滅、不垢、不淨隨順，是菩薩摩訶薩，應如是行般若波羅蜜，以如夢幻、

燄、響化隨順，是行般若波羅蜜。」須菩提白佛言：「佛說以空隨順，乃至如夢、如幻隨順，是行般若波羅蜜。世尊是菩薩摩訶薩行何法？若色、若受、想、行、識，乃至一切種智。」佛告須菩提：「菩薩摩訶薩不行色、不行受、想、行、識，乃至不行一切種智。何以故？是菩薩行處，無作法，無壞法，無所從來，亦無所去，無住處，是法不可數，無有量。若無數，無量是法不可得，不可以色得，乃至不可以一切種智得。何以故？色即是薩婆若，薩婆若即是色，乃至一切種智即是薩婆若，薩婆若即是一切種智。色如相，乃至一切種智如相，皆是一如，無二無別。」

釋曰：阿鞞跋致菩薩所試事，於他語言中不生念，是中有實，不實。何以故？他人有二種：在家人著五欲樂，虛誑不淨；出家外道著

諸邪見不實。此等所說，皆無實事，是故不信。自得諸法實相，故乃至佛身來說破諸法實相者，亦不信得無爲法，故心則安重，不復移轉。是菩薩雖未得佛道，貪欲等諸煩惱折薄，故不爲所牽。心常不離六波羅蜜，知善法果報味，故心常愛樂，不離六波羅蜜。如是等種種因緣，故聞深般若，不怖不畏，歡喜欲聞，讀誦問義，修習如雷霆，小鳥則怖畏悶死，孔雀大鳥歡喜舞戲，般若波羅蜜亦如是。邪見凡夫，聞則恐怖，阿鞞跋致菩薩，聞則歡喜，心無厭足，是故說歡喜樂聞。是中佛說因緣，是菩薩於過去世，已聞深般若波羅蜜，多集諸福德智慧，故有大威德，有大威德，故不怖畏。須菩提問：是菩薩聞深般若波羅蜜，雖不怖畏，是般若無定相，云何應行？佛言：隨順一切種智心。問曰：是菩薩未得一切種智，云何能順？答曰：是

故說順畢竟空心，則順一切種智心，一切種智是寂滅相。佛後品中說：一切寂滅相，是一切種智，是故言順畢竟空，則順一切種智。無相、無作、虛空、無生、無滅、無垢、無淨，如夢等，亦如是。爾時，須菩提問：順畢竟空心，觀何等法？佛答：不觀色，乃至一切種智。何以故？智慧欲求實事，色等有爲作法，皆虛妄，一切種智是實法，實法故過有爲法，過有爲法，故說是法無作，無作者，無壞法，無壞者，是法不從六波羅蜜來，故言無所從來，不入佛法中，故言無所去。有爲虛誑，故不住；無爲法中，無憶想分別，故亦不住。五衆和合，故有六道數；壞五衆相續，故則無數無量。無數無量，故則語言道斷，語言道斷，故不可以行色等諸法得。佛此中自說因緣，色等諸法，即是薩婆若，薩婆若即是色等諸法。何以故？色等諸法，如即是薩婆若，如

薩婆若如，即是色等諸法如。以是故說，是如無二無別。

大智度論卷第七十一

音釋

怯乞業切 犢徒谷切 屨徒谷切 提徒谷切 嫡丁歷切 禱都浩切 湊倉奏切 浮囊囊奴當切 坏芳杯切
愚偏也 牛子也 屨屨初限切 正宰子也 所求也 題也 囊海具也 魚欠
 腋羊益切 翅矢利切 阿鞞跋致梵語也此云不退轉 暴蒲報切 誑古況切 驗魚欠
燒陶器也 腋脅間曰腋 翼也 難頻迷切跋致未切 猛也 欺也 切證
 也 儻罔甫切
 儻與儻同

大智度論卷第七十二

龍 樹 菩 薩 造

姚秦三藏法師鳩摩羅什譯

釋大如品第五十四

經爾時，欲界諸天子，色界諸天子，以天末栴檀香，以天青蓮華，赤
 蓮華，紅蓮華，白蓮華，遙散佛上，來至佛所，頂禮佛足，一面住白佛
 言：「世尊諸佛阿耨多羅三藐三菩提，甚深難見難解，不可思惟
 知，微妙寂滅，智者能知一切世間所不能信，何以故？是深般若波
 羅蜜中，如是說：色即是薩婆若，薩婆若即是色，乃至一切種智即
 是薩婆若，薩婆若即是一切種智。色如相，薩婆若如相，是一如無
 二無別，乃至一切種智如相，薩婆若如相，一如無二無別。」佛告

欲色界諸天子：「如是如是諸天子！色即是薩婆若，薩婆若即是色，乃至一切種智即是薩婆若，薩婆若即是一切種智；色如相，乃至一切種智如相，一如無二無別。諸天子！以是義故，佛初成道時，心樂默然，不樂說法。何以故？是諸佛阿耨多羅三藐三菩提法，甚深難見難解，不可思惟，微妙寂滅，智者能知一切世間所不能信。何以故？阿耨多羅三藐三菩提，無得者，無得處，無得時，是名諸法甚深相，所謂無有二法。諸天子！如虛空甚深故，是法甚深；如甚深故，是法甚深；法性甚深，實際甚深，不可思議，無邊甚深故，是法甚深；無來無去甚深故，是法甚深；不生不滅，無垢無淨，無知無得甚深故，是法甚深。諸天子！我甚深，乃至知者見者甚深故，是法甚深。諸天子！色甚深，受想行識甚深故，是法甚深。檀波羅蜜甚深，乃

2668

至般若波羅蜜甚深故，是法甚深。內空乃至無法有法空甚深故，是法甚深。四念處甚深，乃至一切種智甚深故，是法甚深。」
爾時，欲界、色界諸天子白佛言：「世尊！是所說法，一切世間所不能信。世尊！是甚深法，不為受色故說，不為捨色故說，不為受受想行識故說，不為捨受想行識故說，不為受須陀洹果故說，不為捨須陀洹果故說，乃至不為受一切種智故說，不為捨一切種智故說。諸世間皆受者行，所謂色是我，是我所；受想行識是我，是我所；乃至十八不共法是我，是我所；須陀洹果是我，是我所；乃至一切種智是我，是我所。」佛告諸天子：「如是如是諸天子！是法非為受色故說，非為捨色故說，乃至非為受一切種智故說，非為捨一切種智故說。諸天子！若有菩薩為受色故行，乃至為受一切種智

2669

故行，是菩薩不能修般若波羅蜜，不能修禪波羅蜜，毗梨耶波羅蜜，羼提波羅蜜，尸羅波羅蜜，不能修檀波羅蜜，乃至不能修一切種智者。」

須菩提白佛言：「世尊！是法隨順一切法。云何是法隨順一切法？是法隨順般若波羅蜜，乃至隨順檀波羅蜜；是法隨順內空，乃至隨順無法有法空；是法隨順四念處，乃至隨順一切種智。是法無礙，不礙於色，不礙受、想、行、識，乃至不礙一切種智。諸天子！是法名無礙相，如虛空等故；如法性、法住、實際、不可思議性等故；空、無相、無作等故。是法不生相，色不生，不可得故；受、想、行、識不生，不可得故；乃至一切種智不生，不可得故。是法無處，色處不可得故；受、想、行、識處不可得故；乃至一切種智處不可得故。」

2670

是時欲色界諸天子白佛言：「世尊！須菩提是佛子，隨佛生，何以故？須菩提所說，皆與空合。」爾時須菩提語諸天子：「汝等言須菩提是佛子，隨佛生，云何為隨佛生？諸天子！如相故，須菩提隨佛生。何以故？如來如相不來不去，須菩提如相亦不來不去，是故須菩提隨佛生。復次，須菩提從本已來隨佛生，何以故？如來如相即是一切法如相，一切法如相即是如來如相，是如相中亦無如相，是故須菩提為隨佛生。復次，如來如常住相，須菩提如亦常住相；如來如相，無異無別，須菩提如相亦無異無別，是故須菩提為隨佛生。如來如相，無有礙處，一切法如亦無礙處，是如來如相一切法如相，一如無二無別。是如相無作，終不不如，是故是如相無二無別，是故須菩提為隨佛生。如來如相一切處無念無別，須菩提

2671

如相亦如是，一切處無念無別；如來如相不異不別，不可得，須菩提如相亦如是，以是故須菩提爲隨佛生。如來如相，不遠離諸法如相，是如終不如，是故須菩提亦不有異，爲隨佛生，亦無所隨。復次，如來如相不過去不未來不現在，諸法如相亦不過去不未來不現在，是故須菩提爲隨佛生。復次，如來如不在過去如中，過去如亦不在如來如中，如來如不在未來如中，未來如不在如來如中，如來如不在現在如中，現在如不在如來如中。過去未來現在如，如來如，一如無二無別。色如如來如，受想行識如如來如，是色如，受想行識如如來如，一如無二無別。我如乃至知者見者如，如來如一如無二無別。檀波羅蜜如，乃至般若波羅蜜如，內空如，乃至無法有法空如，四念處如，乃至一切種智如，如來如一如無

2672

二無別。須菩提！菩薩摩訶薩得是如故，名爲如來。」說是如相品時，是三千大千世界大地六種震動：東涌西沒，西涌東沒，南涌北沒，北涌南沒，中央涌四邊沒，四邊涌中央沒。

論問曰：般若波羅蜜無不甚深，何以或時讚甚深？答曰：般若波羅蜜中，或時分別諸法空是淺，或時說世間法即同涅槃是深。色等諸法，即是佛法，聽者聞說，心信佛語，自智慧不及，故言甚深。譬如河水，有洄復深處，有淺處。問曰：諸天所讚法甚深，一切世間所不能信，何用說爲？答曰：一切有二種：一者名字一切，二者實一切。如此中說名字一切，以多不信，故言一切。此中說微妙寂滅，智者能知，智者必有信，先信後知。故復次，是般若波羅蜜，惟佛能知。衆生聞所說而信者，此中不名爲信，智慧知己名爲信。問曰：若爾者，何

2673

以言微妙智者能知。答曰：一切世間無能徧盡知。諸佛智者、寂滅智者，能知少分。如須陀洹於無上道得少分，所謂斷三結。如是諸道，展轉增多。若世間都不信者，云何有諸道？以是故，言寂滅智者能知。阿耨多羅三藐三菩提，即是般若，但名字異；在菩薩心中爲般若，在佛心中，名阿耨多羅三藐三菩提。是中說色等法即是薩婆若。薩婆若即是色等法。此中說色等法如薩婆若如，無二無別。佛可諸天子意，更說因緣：如名色等諸法真實相。譬如除宮殿及諸陋廬，如燒栴檀及雜木，其處虛空無有異色及薩婆若等諸法，求其實皆是如。以是義故，佛初成道時，心樂默然，不樂說法，知甚深法，凡人難悟故。復次，是法無二故甚深，如虛空故甚深，如法性等甚深故甚深。

爾時，諸天子知是法無可取相，白佛言：是所說法，一切世間不能信，是法不爲受色等法故說。佛可其言，若有菩薩爲受色等故行菩薩道，不能修般若波羅蜜等諸功德。

須菩提白佛言：世尊！是般若波羅蜜相，隨順一切法，無所障礙。何以故？於般若波羅蜜亦不著。說不障礙因緣，如虛空等故。譬如壁中先有空相，小兒以橛釘之力少故不入，大力者能入。行者亦如是，色等諸法中自有如實相，智慧力少故不能令空。大智者能知，是故說諸法無礙，如虛空平等。色等法不生，亦不可得，以是故名不生。非但色等不生，若不生法可得，則非畢竟空，非名無礙。無住處，亦如是。

爾時，諸天子白佛言：世尊！須菩提隨佛生，何以故？所知所說皆與

空合。復次，經說有三種子：一者、不隨順生；二者、隨順生；三者、勝生。世人皆願二種子，隨順子，勝子。佛法中唯欲一種，隨順生，以無有勝佛故。佛子有五，皆從口生，法生須陀洹乃至阿羅漢，入正位菩薩。辟支佛雖佛法中種因緣，無佛時自能得道，不得言從佛口生，因緣遠故。諸漏盡者是隨順生，須菩提於漏盡中，常樂畢竟空，是隨順生。何以故？所行法不可破壞如虛空，佛法如是相，是名隨佛生。問曰：何以不說入法位菩薩隨順佛生？答曰：有人言：漏未盡故不說，須菩提漏盡故說。有人言：入無餘涅槃者是第一清淨阿羅漢，未後身，住有餘涅槃，近無餘涅槃門故說；菩薩雖有深利智慧，往返生死中，是故不說。有人言：般若有一種，一者、唯與大菩薩說；二者、三乘共說。共聲聞說中，須菩提是隨佛生，但與菩薩說時，不

2676

說須菩提隨佛生。何以故？法性生身大菩薩，是中無有結業生身，但有變化生身，滅三毒，出三界，教化衆生，淨佛世界故，住於世間，此中都無一切聲聞人。佛大慈悲心，菩薩心亦爾，是名菩薩隨生。須菩提但取涅槃故，不說隨生；此經共二乘說。須菩提知般若波羅蜜甚深，法性生身菩薩力大，諸天雖讚，不應受語，諸天子言：諸法如一相，所謂無相，是因緣故隨佛生，如不異故。如經中說：如來如相，不來不去，須菩提如相亦不來不去。復次，如來如畢竟空，一切法如亦畢竟空。一切法如中，攝須菩提如，是故須菩提用如來如故，隨佛生。復次，如如來如，無憶想分別，常住如虛空，須菩提如亦如是，是故須菩提隨佛生。復次，如如來如，得無礙解脫故，一切法中無罣礙，一切法如亦如是，於一切法中亦無罣礙。如來如，

2677

一切法如，一如無異。須菩提如，亦入一切法如故。是以隨佛生。復次，諸法如相無作，無作者。如來如相亦如是。須菩提如，一切法如攝故。隨佛生。復次，如如來如相，一切處常無憶想分別。須菩提如，一切法如攝故。隨佛生。復次，如來如相，不離一切法如。正觀一切法，名為佛。一切法是因緣，佛是果報。是故說如來如不離一切法如。是如實故常如，無不如時。須菩提如亦如是不異。故隨佛生亦無法可隨。復次，如來如相，無憶想分別。出過三世，一切法如亦如是。須菩提如亦出三世。是故隨佛生。復次，如來如不在過去如中。何以故？如來空過去亦畢竟空。是故空不在空中住。譬如虛空不住虛空中。未來現在亦如是。三世如如來如不二不分別者。三世如空、無相、無生無滅等。如來如亦如是。三世如無障礙。如過去世

2678

無窮無邊。未來世亦無窮無邊。現在世亦無窮無邊。如來如亦如是。此三世十方無礙無邊。須菩提如亦如是。復次，五衆如乃至一切種智如。如來如，無二無別。何以故？色等諸法和合故。有如來。如是如來，不得言但是色等法，亦不得言離色等法，亦不得言色等法在如來中，亦不得言如來在色等法中，亦不得言色等法屬如來，亦不得言無如來。五衆色等法中，假名如來。如來如即是一切法如。是故說色等法如。如來如，不二不別。凡夫人見有二有別，聖人觀無二無別，聖人可信，凡夫人所見不可信。佛語須菩提：是名為如。佛因此如故，名為如來。如來者，如實行來到佛法中。說是如時，地六種震動，如上說。

經是時，諸欲天子、諸色天子，以天末栴檀香散佛上及散須菩提。

2679

上白佛言：「未曾有也！世尊！須菩提以如來如隨佛生。」須菩提復爲諸天子說言：「諸天子！須菩提不從色中隨佛生，亦不從色如中隨佛生，不離色隨佛生，亦不離色如隨佛生。須菩提不從受、想、行、識中隨佛生，亦不從受、想、行、識如中隨佛生，不離受、想、行、識隨佛生，亦不離受、想、行、識如隨佛生。乃至不從一切種智中隨佛生，亦不從一切種智如中隨佛生，不離一切種智隨佛生，亦不離一切種智如隨佛生。須菩提不從無爲中隨佛生，亦不從無爲如中隨佛生，不離無爲隨佛生，亦不離無爲如隨佛生。何以故？是一切法皆無所有，不可得，無隨生者，亦無隨生法。」爾時，舍利弗白佛言：「世尊！是如實不虛法相、法住、法位甚深，是中色不可得，色如不可得。何以故？色尚不可得，何況色如當可得？受、想、行、識不可

2680

得、受、想、行、識如不可得，何以故？受、想、行、識尚不可得，何況受、想、行、識如當可得？乃至一切種智不可得，一切種智如不可得，何以故？一切種智尚不可得，何況一切種智如當可得？」佛告舍利弗：「如是如是！舍利弗！是如實不虛法相、法住、法位甚深，是中色不可得，色如不可得。何以故？色尚不可得，何況色如當可得？乃至一切種智不可得，一切種智如不可得，何以故？一切種智尚不可得，何況一切種智如當可得？」

2681

舍利弗說是如相時，二百比丘不受一切法故，漏盡得阿羅漢；五百比丘尼，遠塵離垢，諸法中得法眼，生天人中；五千菩薩摩訶薩得無生法忍；六千菩薩諸法不受故，漏盡心得解脫，成阿羅漢。「舍利弗！是六千菩薩先世值五百佛，親近供養於五百佛法中，行

布施、持戒、忍辱、精進、禪定、無般若波羅蜜、無方便力故、行別異相。作是念：是布施、是持戒、是忍辱、是精進、是禪定、無般若波羅蜜、無方便力故、布施、持戒、忍辱、精進、禪定、行異別相。行異別相故、不得無異相、不得無異相故、不得入菩薩位、不得入菩薩位故、得須陀洹果乃至阿羅漢果。舍利弗！菩薩摩訶薩雖有道、若空、若無相、若無作法、遠離般若波羅蜜、無方便力故、便於實際作證、取聲聞乘。舍利弗白佛言：「世尊！何因緣故、俱行空、無相、無作法、遠離方便力故、於實際作證、取聲聞乘。菩薩摩訶薩亦修空、無相、無作法、有方便力故、得阿耨多羅三藐三菩提。」佛告舍利弗：「有菩薩遠離薩婆若心、修空、無相、無作法、無方便力故、取聲聞乘。舍利弗！復有菩薩摩訶薩、不遠離薩婆若心、修空、無相、無作法、有方便力故、入

菩薩位、得阿耨多羅三藐三菩提。舍利弗！譬如有鳥、身長百由旬、若二百、三百由旬、而無有翅、從三十三天、自投閻浮提。舍利弗！於汝意云何、是鳥中道作是念、欲還上三十三天、能得還不？」不得也。世尊！「舍利弗！是鳥復作是願、到閻浮提、欲使身不痛不惱。舍利弗！於汝意云何、是鳥得不痛不惱不？」舍利弗言：「不得也。世尊！是鳥到地、若痛、若惱、若死、若死等苦、何以故？世尊！是鳥身大而無翅故。」舍利弗！菩薩摩訶薩亦如是、雖如恆河沙等劫修布施、持戒、忍辱、精進、禪定、發大事、生大心、為得阿耨多羅三藐三菩提、故受無量願。是菩薩遠離般若波羅蜜、方便力故、若墮阿羅漢、若墮辟支佛道、何以故？是菩薩遠離薩婆若心、布施、持戒、忍辱、精進、禪定、無般若波羅蜜、無方便力故、墮聲聞地、若辟支佛道中、舍利

弗！菩薩摩訶薩雖念過去未來現在諸佛持戒禪定智慧解脫解脫知見取相受持。是人不知不解諸佛戒定慧解脫解脫知見但聞空無相無作名字聲而取名字聲迴向阿耨多羅三藐三菩提。菩薩摩訶薩若如是迴向住聲聞辟支佛地中不能得過。何以故？遠離般若波羅蜜及方便力持諸善根迴向阿耨多羅三藐三菩提故。舍利弗！有菩薩摩訶薩從初發意已來不遠離薩婆若心行布施持戒忍辱精進禪定不遠離般若波羅蜜及方便力故不取相。於過去未來現在諸佛戒定慧解脫解脫知見不取空解脫門相不取無相無作解脫門相。舍利弗！當知是菩薩摩訶薩不墮聲聞辟支佛道直至阿耨多羅三藐三菩提。何以故？是菩薩摩訶薩從初發心已來行布施不取相持戒忍辱精進禪定不取相過去

2684

未來現在諸佛戒定慧解脫解脫知見不取相。舍利弗！是名菩薩方便力以離相心行布施持戒忍辱精進禪定乃至離相心行一切種智。舍利弗白佛言：「世尊！如我解佛所說義若菩薩摩訶薩不遠離般若波羅蜜方便力當知是菩薩近阿耨多羅三藐三菩提。何以故？是菩薩摩訶薩從初發心已來無法可知若色若受若行識乃至一切種智世尊有求菩薩道善男子善女人遠離般若波羅蜜方便力當知是人於阿耨多羅三藐三菩提或得或不得。何以故？世尊！是求菩薩道善男子善女人所有布施皆取相所有持戒忍辱精進禪定皆取相。以是故是善男子善女人於阿耨多羅三藐三菩提不定。世尊！以是因緣故菩薩摩訶薩欲得阿耨多羅三藐三菩提不應遠離般若波羅蜜方便力。是菩薩摩訶薩

2685

住般若波羅蜜方便力中，以無得無相心，應修布施持戒忍辱精進禪定乃至以無得無相心，應修一切種智。」

■釋曰：諸天子歡喜，以末栴檀香散佛及須菩提上。歎言：希有！世尊！須菩提以如來如隨佛生者。諸天子意謂：須菩提智慧力故，令一切法皆如佛法，是故說隨佛生。須菩提知諸天子心，少貴尚是諸法如，是故須菩提欲斷諸天子心，故說是如畢竟空相，以四種破著如心。所謂須菩提不在色中，不在色如中，不以色等，不以色等如，不離色等，不離色等如，隨佛生。佛此中自說因緣。此法皆空不可得。舍利弗言：世尊！是如甚深，是如中但色等法不可得，何況色等法如當可得？問曰：何者是色等法？何者是色等法如？答曰：色等法，眼所見等諸法，如名色等法實相不虛誑。人於色等如法中

錯謬故，或起不善業墮惡道中，或起善業生於人天中，終歸磨滅，還生諸苦，或起無漏業，應求大利而取小乘，不得畢竟清淨如相。故色等法皆是作法，有為虛妄，從顛倒生，凡夫所憶想分別行處，是故色等法虛妄，不即是如。知色等法如實故即是如，因色等法得如名，是故言不離色等法得如。色等法入如中，皆一相無異，是故須菩提謙言：非但我隨佛生，一切法亦如是相。舍利弗讚歎須菩提所說，色等法亦畢竟空，何況如因若空，何況果聞如是甚深如相，衆生各得道利益。

問曰：是般若波羅蜜為菩薩說，何故六千人成阿羅漢道？答曰：佛知必有難者，自為舍利弗說因緣。是人無般若波羅蜜，無方便力，過去作功德，無方便故，邪行不正，是人離般若波羅蜜故，深著善

法，今從佛聞般若波羅蜜，深厭世間，慈悲心薄，故求自利，不受一切法，即得阿羅漢。於般若無咎，如人持器詣海，隨器大小，各自取足。問曰：如經說六千菩薩，無般若波羅蜜，方便力故，行五波羅蜜，不得是無分別法，作阿羅漢。若一切聖人，皆得無爲法，無爲法即是無分別，何以此中說不得無分別法作阿羅漢？答曰：非說今世聽法時，乃是過去五百世時，不得般若方便，修集五波羅蜜功德，以是故言，不得無分別。失菩薩信等五根，失菩薩信等五根故，雖聞般若，不得如菩薩所聞，即於實際作證。問曰：俱行空、無相、無作，何以一人得作佛，一人作阿羅漢？答曰：雖有種種因緣，得阿羅漢大因緣，所謂離薩婆若心、行空等故。大鳥者，金翅鳥於諸天，如此間人鳥雀等無異。是鳥所以不來者，此鳥食龍，翅出毒風，扇一切

眼失明故。是鳥初出殼，羽翼未成，意欲飛去，即時墮落。中道心悔，我未應飛，欲還住本天上，舍摩梨樹上。是鳥身大，羽翼未成，不能舉身。鳥身是菩薩身。大者，世世廣集五波羅蜜功德，無兩翅者，是無般若波羅蜜，無方便。須彌山者，是三界虛空，是無量佛法。未應飛而飛者，是菩薩功德未成滿，欲行菩薩三解脫門，欲遊無量佛法虛空中，而自退沒，是心雖欲願作佛而不能得。若死者，是阿羅漢道死等者，辟支佛道。若痛苦惱者，失菩薩本願功德。佛自結句，乃至住是無得無相心中，應布施等。此經中合喻，義自明了，故不說。

經爾時，欲色界諸天子白佛言：「世尊，阿耨多羅三藐三菩提難得，何以故？是菩薩摩訶薩，應知一切諸法，已得阿耨多羅三藐三

菩提是法亦不可得。」佛言：「如是如是！諸天子！阿耨多羅三藐三菩提難得，我亦得一切法，一切種智已得阿耨多羅三藐三菩提，亦無所得，無能知，無可知，亦無知者，何以故？諸法畢竟淨故。」須菩提白佛言：「世尊！如佛所說，阿耨多羅三藐三菩提難得，如我解佛所說義，我心思惟是阿耨多羅三藐三菩提易得，何以故？無有得阿耨多羅三藐三菩提者，亦無可得法，一切法，一切法相空，無法可得，無能得者，何以故？一切法空故，亦無法可增，亦無法可減，所謂布施持戒忍辱精進禪定乃至一切種智，是法皆無可得者，無能得者，世尊！以是因緣故，我意謂阿耨多羅三藐三菩提爲易得，何以故？世尊！色、色相空，受、想、行、識、識相空，乃至一切種智、一切種智相空。」

2690

舍利弗語須菩提：「若一切法空如虛空，虛空不作是念，我當得阿耨多羅三藐三菩提。若菩薩摩訶薩信解一切法空如虛空，是阿耨多羅三藐三菩提易得者，今恆河沙等諸菩薩摩訶薩求阿耨多羅三藐三菩提，何以故退還？須菩提！以是故，知阿耨多羅三藐三菩提不易得。」須菩提語舍利弗：「於意云何？色於阿耨多羅三藐三菩提退還不？」舍利弗言：「不。」受、想、行、識於阿耨多羅三藐三菩提退還不？」舍利弗言：「不。」乃至一切種智於阿耨多羅三藐三菩提退還不？」舍利弗言：「不。」離色有法於阿耨多羅三藐三菩提退還不？」舍利弗言：「不。」離受、想、行、識有法於阿耨多羅三藐三菩提退還不？」舍利弗言：「不。」乃至離一切種智，有法於阿耨多羅三藐三菩提退還不？」舍利弗言：「不。」

2691

「舍利弗！於意云何？色如相，於阿耨多羅三藐三菩提退還不？」
 舍利弗言：「不。」受、想、行、識如相，乃至一切種智如相，於阿耨多羅三藐三菩提退還不？」
 舍利弗言：「不。」離色如相，有法於阿耨多羅三藐三菩提退還不？」
 舍利弗言：「不。」離受、想、行、識如相，乃至離一切種智如相，有法於阿耨多羅三藐三菩提退還不？」
 舍利弗言：「不。」舍利弗！於意云何？如於阿耨多羅三藐三菩提退還不？」
 舍利弗言：「不。」法性、法住、法位、實際、不可思議性，於阿耨多羅三藐三菩提退還不？」
 舍利弗言：「不。」舍利弗！於意云何？離如，有法於阿耨多羅三藐三菩提退還不？」
 舍利弗言：「不。」離法性、法住、法位、實際、不可思議性，有法於阿耨多羅三藐三菩提退還不？」
 舍利弗言：「不。」須菩提語舍利弗：「諸法畢竟

2692

不可得，何等法於阿耨多羅三藐三菩提退還？」

舍利弗語須菩提：「如須菩提所說，是法忍中，無有菩薩於阿耨多羅三藐三菩提退還者。若不退還，佛說求道者有三種：阿羅漢道、辟支佛道、佛道，是三種為無分別。如須菩提說，獨有一菩薩求佛道。」
 是時，富樓那彌多羅尼子語舍利弗：「應當問須菩提，為有一菩薩乘不？」
 爾時，舍利弗問須菩提：「須菩提！為欲說有一菩薩乘？」
 須菩提語舍利弗：「於諸法如中，欲使有三種人聲聞乘、辟支佛乘、佛乘耶？」
 舍利弗言：「不也。」
 舍利弗！三乘分別中，有如可得不？」
 舍利弗言：「不也。」
 舍利弗！是如有若一相，若二相，若三相不？」
 舍利弗言：「不也。」
 舍利弗！汝欲於如中，乃至有一菩薩不？」
 舍利弗言：「不也。」
 如是四種中，三乘人不可得。舍

2693

利弗云何作是念是求聲聞乘人，是求辟支佛乘人，是求佛乘人？
 舍利弗！菩薩摩訶薩，聞是諸法如相，心不驚、不沒、不悔、不疑，是名
 菩薩摩訶薩，能成就阿耨多羅三藐三菩提。爾時，佛讚須菩提
 言：「善哉！善哉！須菩提！汝所說者，皆是佛力。須菩提！若菩薩摩訶
 薩，聞說是如，無有諸法別異，心不驚、不怖、不畏、不難、不沒、不悔，當
 知是菩薩能成就阿耨多羅三藐三菩提。」舍利弗白佛言：「世
 尊！成就何等菩提？」佛言：「成就佛阿耨多羅三藐三菩提。」

2694

論釋曰：爾時，諸天子作是念，白佛言：世尊！阿耨多羅三藐三菩提
 難得！何以故？一切法畢竟空，而菩薩求佛道，觀行修集，成佛度衆
 生，是法亦不可得。佛可其言，自身為證：我坐道場，以一切種得一
 切法，亦無一定相可得。須菩提言：世尊！如我意，阿耨多羅三藐三

菩提易得，一切法畢竟常空故，是中無得者，無可得法，無障無礙，
 無所修無所斷故。

爾時，舍利弗言：若佛道易得者，何以故恆河沙等無量菩薩求佛
 道，若一若二作佛，餘者皆退還？須菩提答舍利弗：色於阿耨多羅
 三藐三菩提退還，不受想行識，乃至一切種智退還，不答曰：不也！
 何以故？色等法畢竟空，無有退還；色等法如無二相，亦無分別故
 無退還。離色等法，更有法退還不答言：離色等更無有法，是故言
 不也。離色等法，如更有法退還不答言：如破色等法已，如亦自空，
 是故言：非法性、法位，乃至不可思議性，亦如是。須菩提語舍利弗：
 若法無退還，何以故言如恆河沙等菩薩退還？

2695

舍利弗答：如須菩提所說，法忍中則無退還。法忍者，是法門，法修

法行。入須菩提所說法門中，則無退還；出是法門，則有退還。舍利弗雖見受須菩提語，亦自引佛法作難。若無退者，盡當作佛。何以說有三乘？須菩提還以如相四句破三乘。佛歎須菩提：善哉！若菩薩聞如中無三乘分別，不恐怖，是菩薩即能成無上道。問曰：若佛說菩薩成阿耨多羅三藐三菩提，舍利弗何以故問成就何等菩提？答曰：各各有無上，舍利弗疑故問。何等道無上？答：大乘無上。復次，須菩提以畢竟空智慧，破著三乘心，佛讚善哉！須菩提言：菩薩聞是，心不沒、不怖，則能成就阿耨多羅三藐三菩提。舍利弗問：三乘菩提無定相，今言成就菩提，成何等菩提？佛言：成就佛阿耨多羅三藐三菩提。若入畢竟空門，一切法盡一相；若出畢竟空，三乘則有異。今佛分別諸法，故說有上、中、下乘，不為畢竟空故說。

經須菩提白佛言：「世尊！若菩薩摩訶薩，欲成就阿耨多羅三藐三菩提，應云何行？」佛言：應起等心於一切眾生，亦等心與語，無有偏黨；於一切眾生中起大慈心，亦以大慈心與語；於一切眾生中下意，亦以下意與語；於一切眾生中應生安隱心，亦以安隱心與語；於一切眾生中應生無礙心，亦以無礙心與語；於一切眾生中應生無惱心，亦以無惱心與語；於一切眾生中應生愛敬心，如父、如母、如兄、如弟、如姊、如妹、如兒子、親族、知識，亦以愛敬心與語。是菩薩摩訶薩，應自不殺生，亦教人不殺生，讚不殺生法，歡喜讚歎諸不殺者，乃至自行不邪見，亦教他人不行邪見，讚不邪見法，歡喜讚歎不邪見者。如是，須菩提！菩薩摩訶薩欲成就阿耨多羅三藐三菩提，當如是行。復次，須菩提！菩薩摩訶薩欲成就阿耨多

羅三藐三菩提，應自行初禪，亦教他人行初禪，讚歎行初禪法，歡喜讚歎行初禪者；二禪三禪四禪，亦如是。復次，須菩提！菩薩摩訶薩欲成就阿耨多羅三藐三菩提，應自行慈心，亦教人行慈心，讚歎行慈心法，歡喜讚歎行慈心者；悲喜捨心，亦如是。自行虛空處，亦教人行虛空處，讚歎行虛空處法，歡喜讚歎行虛空處者；識處，無所有處，非有想非無想處，亦如是。自具足檀波羅蜜，亦教人具足檀，讚歎具足檀法，歡喜讚歎具足檀波羅蜜者；尸羅、羼提、毗梨耶、禪、般若波羅蜜，亦如是。復次，菩薩摩訶薩欲成就阿耨多羅三藐三菩提，自行內空，亦教人行內空，讚歎行內空法，歡喜讚歎行內空者；乃至無法有法空，亦如是。自行四念處，亦教人行四念處，讚歎行四念處法，歡喜讚歎行四念處者；乃至八聖道分，亦如是。

2698

自修空三昧、無相、無作三昧，亦教人修空、無相、無作三昧，讚歎修空、無相、無作三昧法，歡喜讚歎修空、無相、無作三昧者。自行八背捨，亦教人行八背捨，讚歎行八背捨法，歡喜讚歎行八背捨者。自行九次第定，亦教人行九次第定，讚歎行九次第定法，歡喜讚歎行九次第定者。自具足佛十力，亦教人具足佛十力，讚歎具足佛十力法，歡喜讚歎具足佛十力者。自行四無所畏、四無礙智、十八不共法、大慈大悲，亦教人行四無所畏，乃至大慈大悲，讚歎行四無所畏，乃至大慈大悲法，歡喜讚歎行四無所畏，乃至大慈大悲者。自逆順觀十二因緣，亦教人逆順觀十二因緣，讚歎逆順觀十二因緣法，歡喜讚歎逆順觀十二因緣者。須菩提！菩薩摩訶薩欲成就阿耨多羅三藐三菩提，應如是行。復次，須菩提！菩薩摩訶薩

2699

欲成就阿耨多羅三藐三菩提，自應知苦、斷集、證滅、修道，亦教人知苦、斷集、證滅、修道，讚歎知苦、斷集、證滅、修道法，歡喜讚歎知苦、斷集、證滅、修道者。自生須陀洹果，證智而不證實際，亦教人著須陀洹果中，讚歎須陀洹果法，歡喜讚歎得須陀洹果者。斯陀含果、阿那含果、阿羅漢果，亦如是。自生辟支佛道，證知而不證辟支佛道，亦教人著辟支佛道中，讚歎辟支佛道法，歡喜讚歎得辟支佛道者。自入菩薩位，亦教人入菩薩位，讚歎菩薩位法，歡喜讚歎入菩薩位者。自淨佛世界成就衆生，亦教人淨佛世界成就衆生，讚歎淨佛世界成就衆生法，歡喜讚歎淨佛世界成就衆生者。自起菩薩神通，亦教人起菩薩神通，讚歎菩薩神通法，歡喜讚歎起菩薩神通者。自生一切種智，亦教人生一切種智，讚歎生一切種智

2700

法，歡喜讚歎生一切種智者。自斷一切結使習，亦教人斷一切結使習，讚歎斷一切結使習法，歡喜讚歎斷一切結使習者。須菩提！菩薩摩訶薩欲成就阿耨多羅三藐三菩提，菩薩應如是行。復次，須菩提！菩薩摩訶薩欲成就阿耨多羅三藐三菩提，自取壽命成就，亦教人取壽命成就，讚歎取壽命成就法，歡喜讚歎取壽命成就者。自成就法住，亦教人成就法住法，讚歎成就法住法，歡喜讚歎成就法住者。須菩提！菩薩摩訶薩欲成就阿耨多羅三藐三菩提，應如是行，亦應如是學。般若波羅蜜方便力是菩薩如是學。如是行時，當得無礙色，得無礙受、想、行、識，乃至得無礙法住。何以故？是菩薩摩訶薩從本已來，不受色，不受受、想、行、識，乃至不受一切種智。何以故？色不受者為非色，乃至一切種智不受者為非一切

2701

種智。」說是菩薩行品時，二千菩薩得無生法忍。

論釋曰：須菩提問菩薩欲成無上道者，云何應行？佛答：應起等心，於一切衆生無有偏黨。五衆和合，假名衆生，如車如林。一切衆生者，盡學十方六道，無有遺餘。一切衆生法，各行三分：怨、親、中人。佛今教菩薩等心，一切衆生皆有親愛想，莫生怨心，莫生中人心。復次，衆生有二種：愛及憎。佛言：於一切衆生，離是二心，莫生憎愛。愛者貪欲，煩惱心不應行，當行慈愛心。世間法愛念妻子、牛馬等，憎惡怨賊等。菩薩轉此世間法，但行慈愛心於一切衆生。復次，等心者，菩薩生法喜於一切衆生，欲令皆至佛道。菩薩自捨憎愛心，亦捨衆生憎愛心加己。世間有三種人：惡、大惡、惡中惡。善、大善、善中善。惡者，如人以惡事加己，還報之以惡事。諸佛法於一切衆生平

2702

等心，不應起惡念，何況起身行、口行。大惡者，如無人侵己，而以惡加人。惡中惡者，如人以好心供給慈念，而反以惡心毀害。如是等惡，名惡中惡。善者，如人以好事於己，還以善報。大善者，如人於己無善，而以善事利益。善中善者，如人以惡害於己，而以善事乃至身命供養，是名善中善。菩薩捨是三惡，過是二種善行第六心於一切衆生。問曰：是菩薩未得法身，云何能行是心？答曰：是菩薩求無上道，應行無上法，受如是難爲苦行，乃成無上道。譬如賈客於險道中備受諸苦，乃得大利。復次，是菩薩聞佛法正體，所謂畢竟空、無我、無我所，無一定實法，所見、所聞、所知，皆是虛誑，如幻、如夢。深信是法，故能以身命供養怨賊。復次，菩薩知此身從罪業煩惱顛倒因緣生，所見、所聞，皆是虛誑罪垢之本。若有人來欲加害於

2703

我，我宜歡喜受之，以此弊身而得無上道利，何爲不與！復次，菩薩發心深愛衆生，欲利益故，自以己身供養怨賊，欲令衆生效己所行。以有衆生說法教者不必肯受故，以身教令其信受。復次，多人發意求無上道而身行不稱，亦以是故，菩薩以身教之令堅心行此難事。欲求無上道，當行善中善法，爲此難事，乃可得。如是等無量因緣，自以身命供養怨賊。問曰：等心、慈心有何異？答曰：等心者，是四無量心；慈心者，是一無量。有人言：初捨怨親是等心，後加愍念是慈心。復次，有人言：等心者，觀衆生如如，實際法性是法皆無爲，無量故等；愛念衆生，是名慈心。所以不說悲心，有悲心或憂念衆生，積集此心，心則退沒。或有衆生不受菩薩悲念，言汝何以不自憂其身而念他人！慈心無如是事，易攝衆生故，但說慈心。

2704

問曰：若衆生有三種，上、中、下，菩薩福德智慧積集故，應是大人。云何言於一切衆生中起下意？答曰：菩薩作是念：一切法無常，一切衆生上、中、下，皆歸磨滅，是中何者是大，何者是小？人以世法故有大小。復次，大小不定，此國以爲大，餘國以爲小；於此爲大，於彼爲小；如今世卑賤，後世爲天王。如是業因緣，在世間輪轉，貴賤大小無定；如水火貴賤隨時，用捨無定。復次，菩薩雖有功德，知是功德畢竟空，如幻、如夢，不著此功德，不有是大小。復次，一切衆生中有佛道因緣者，唯佛能知。菩薩作是念：若我小衆生形貌才能，以此事輕者，則爲輕未來佛；若輕佛則爲永了。復次，菩薩作是念：我誓度一切衆生，若衆生無所得，我則孤負衆生。譬如主人請客，則應敬客而自卑；若無所供設，是則負愧於客。復次，以自大心故，則喜

2705

生瞋恚，憍慢是瞋之本，瞋是一切重罪之根。若菩薩於衆生起下
心，衆生若罵若打，則無恚恨。譬如大家打奴，奴不敢瞋恨。若菩薩
自高，下意衆生者，衆生侵害，忿然生怒。如奴打大家，則起瞋怒。下
意有如是等種種利益故，菩薩應當行。安隱心者，與今世後世，究
竟樂，非如父母、知識與現世樂。菩薩若以等心、慈心、下心利益衆
生時，若有不知恩人來惱菩薩，不信所行，謂爲欺誑，爲求名故，無
有實事，又爲魔所使，來惱菩薩，惡中之惡，不識恩分。菩薩等心，於
此通達無礙，得是無礙心已，衆生雖有大罪大過，但欲利益，不生
惱心。慈心安隱，無礙，不惱心。譬如孝子愛敬父母，如兄、如弟、如姊
妹、兒女，無淫欲心而生愛敬慈念。世人但能愛敬所親，菩薩普及
一切。得是柔輒清淨好心，名衆生忍，是法忍初門。次行十善道，十

善道有佛無佛，世間常有是善法教。菩薩先以四十種行，行是十
善道。何以故？是菩薩深念善法，心慈衆生故。離欲凡夫法有十二
事，亦以四十八種行。六波羅蜜乃至法住，是客法，有佛說則有菩
薩行。上來舊法、客法，本末具足，今世得善法，智慧無礙，捨身得法
身無礙，隨意至十方教化衆生，於十方佛前修集善法。聞是法時，
二千菩薩得無生法忍者，是品說如微妙深法，亦說有行，善門、智
門，二行具足。但說如法，所利少；若說有法，所利亦少；今說有無二
法具足故，得無生忍。譬如二輪具足故，能有所至。此中善說二諦
故，二千菩薩得無生法忍。

大智度論卷第七十二

釋第五
十四品

校讞

第十八面二行第八字
台宋藏作念 (今版已改正)

音釋

洄復洄胡殿切復房六切 榘其月切 釘丁定切以 錯七各切 疹辨幼切 訶又音何 輒而况切
切洄復水旋流也 榘木也 釘釘釘物也 錯讓也 疹妄言也 訶即切 輒弱也

大智度論卷第七十三

龍 樹 菩 薩 造

姚秦三藏法師鳩摩羅什譯

釋阿鞞跋致品第五十五

須菩提白佛言：「世尊！以何等行、何等類、何等相貌，知是阿鞞跋致菩薩摩訶薩？」佛告須菩提：「若菩薩摩訶薩，能知凡夫地、聲聞地、辟支佛地、佛地，是諸地，如相中無二無別，亦不念，亦不分別。入是如中，聞是事，直過無疑。何以故？是中無一無二相故。是菩薩摩訶薩，亦不作無益語，但說利益相應語，不視他人長短。須菩提！以是行、類、相貌，知是阿鞞跋致菩薩摩訶薩。」須菩提言：「世尊！復以何行、類、相貌，知是阿鞞跋致菩薩摩訶薩？」佛告須菩提：

「若一切法無行、無類、無相貌，當知是名阿鞞跋致菩薩摩訶薩。」
 須菩提白佛言：「世尊，若一切法無行、無類、無相貌，菩薩於何等
 法轉，名不轉？」佛言：「若菩薩摩訶薩色中轉、受、想、行、識中轉，是
 名菩薩不轉。復次，須菩提，菩薩摩訶薩檀波羅蜜中轉，乃至般若
 波羅蜜中轉，內空中乃至無法有法空中轉，四念處中乃至十八
 不共法中轉，聲聞、辟支佛地中轉，乃至阿耨多羅三藐三菩提中
 轉，當知是菩薩摩訶薩不轉。何以故？須菩提，色性無，是菩薩何所
 住？乃至阿耨多羅三藐三菩提性無，是菩薩何所住？復次，須菩提，
 菩薩摩訶薩不觀外道、沙門、婆羅門面類言語，不作是念，是諸外
 道，若沙門，若婆羅門，實知實見，若說正見，無有是事。復次，菩薩不
 生疑，不著戒取，不墮邪見，亦不求世俗吉事，以為清淨，不以華香、

瓔珞、幡蓋、伎樂、禮拜、供養諸天，須菩提，以是行、類、相貌，當知是名
 阿鞞跋致菩薩摩訶薩。復次，須菩提，阿鞞跋致菩薩摩訶薩常不
 生下賤家，乃至不生八難之處，常不受女人身。須菩提，以是行、類、
 相貌，當知是名阿鞞跋致菩薩摩訶薩。復次，須菩提，菩薩摩訶薩
 常行十善道，自不殺生，不教人殺生，讚歎不殺生法，歡喜讚歎不
 殺生者，乃至自不邪見，不教人邪見，亦不讚歎邪見法，不歡喜讚
 歎行邪見者。須菩提，以是行、類、相貌，當知是名阿鞞跋致菩薩摩
 訶薩。復次，須菩提，菩薩摩訶薩乃至夢中亦不行十不善道，以是
 行、類、相貌，當知是名阿鞞跋致菩薩摩訶薩。復次，須菩提，菩薩摩
 訶薩為利益一切衆生故，行檀波羅蜜，乃至為利益一切衆生故，
 行般若波羅蜜。須菩提，以是行、類、相貌，當知是名阿鞞跋致菩薩

摩訶薩。復次，須菩提！菩薩摩訶薩所有諸法，受持讀誦，說正憶念，所謂修妬路，乃至優波提舍，是菩薩法。施時，作是念：是法施因緣，故滿一切衆生願。以是法施功德，與一切衆生共之，迴向阿耨多羅三藐三菩提。須菩提！以是行類相貌，當知是名阿鞞跋致菩薩摩訶薩。復次，須菩提！菩薩摩訶薩於甚深法中，不疑不悔。須菩提言：「世尊！菩薩於甚深法中，何因緣故不疑不悔？」佛言：「是阿鞞跋致菩薩，都不見有法可生疑處，若色、受、想、行、識，乃至阿耨多羅三藐三菩提，不見是法可生疑處、悔處。須菩提！以是行類相貌，當知是名阿鞞跋致菩薩摩訶薩。復次，須菩提！菩薩摩訶薩身、口、意業柔順。須菩提！以是行類相貌，當知是名阿鞞跋致菩薩摩訶薩。復次，須菩提！菩薩摩訶薩以慈身、口、意業成就。須菩提！以是

2712

行類相貌，當知是名阿鞞跋致菩薩摩訶薩。復次，須菩提！菩薩摩訶薩不與五蓋俱：淫欲、瞋恚、睡眠、掉悔、疑。須菩提！以是行類相貌，當知是名阿鞞跋致菩薩摩訶薩。復次，須菩提！菩薩摩訶薩一切處無所愛著。須菩提！以是行類相貌，當知是名阿鞞跋致菩薩摩訶薩。復次，須菩提！菩薩摩訶薩出入去來，坐臥行住，常念一心；出入去來，坐臥行住，舉足下足，安隱庠序，常念一心；視地而行。須菩提！以是行類相貌，當知是名阿鞞跋致菩薩摩訶薩。復次，須菩提！菩薩摩訶薩所著衣服，及諸臥具，人不惡穢，好樂淨潔，少於疾病。須菩提！以是行類相貌，當知是名阿鞞跋致菩薩摩訶薩。復次，須菩提！常人身中有八萬戶蟲侵食其身，是阿鞞跋致菩薩摩訶薩身無是蟲，何以故？是菩薩功德出過世間，以是故，是菩薩無是戶

2713

蟲。是菩薩功德增益，隨其功德，得身清淨，得心清淨，須菩提！以是行、類、相貌，當知是名阿鞞跋致菩薩摩訶薩。須菩提白佛言：「世尊！云何菩薩摩訶薩得身清淨，得心清淨？」佛言：「菩薩摩訶薩，隨其所得，增益善根，滅除心曲、心邪，須菩提！是名菩薩摩訶薩身清淨，心清淨。以是身心清淨，故能過聲聞、辟支佛地，入菩薩位中。須菩提！以是行、類、相貌，當知是名阿鞞跋致菩薩摩訶薩。復次，須菩提！菩薩摩訶薩，不貴利養，雖行十二頭陀，不貴阿蘭若法，乃至不貴但三衣法。須菩提！以是行、類、相貌，當知是名阿鞞跋致菩薩摩訶薩。復次，須菩提！菩薩摩訶薩，常不生慳貪心，不生破戒心，瞋動心，懈怠心，散亂心，不生愚癡心，不生嫉妬心。須菩提！以是行、類、相貌，當知是名阿鞞跋致菩薩摩訶薩。復次，須菩提！菩薩摩訶薩，

心住不動，智慧深入，一心聽受所從聞法及世間事，皆與般若波羅蜜合。是菩薩摩訶薩，不見產業之事，不入法性者，是事一切，皆見與般若波羅蜜合。以是因緣，故須菩提！是名阿鞞跋致菩薩阿鞞跋致相。」

論問曰：上來處處說阿鞞跋致相，今何以復問？答曰：上雖處處略說，今欲廣說。此中多是阿鞞跋致相，故名阿鞞跋致品。復次，上來解般若波羅蜜相，次說魔因緣壞般若，今說信受般若波羅蜜者，是阿鞞跋致，欲說其相貌，故須菩提問。復次，菩薩初發心來，所行因緣，所得果報，是阿鞞跋致，受記必當作佛。如人受職，已得印信，心無復疑。又如聲聞人所行衆行，皆為四沙門果。阿鞞跋致是決定安隱地，過凡夫，不入二乘地。雖未成佛道，能為世間作福田。是

事微妙難得，故須菩提問其相貌。佛本命須菩提說般若波羅蜜，故須菩提問世尊，阿鞞跋致有何行、類、相貌。問曰：是三事有何等異？答曰：有人言：是三事皆一義，以此知是阿鞞跋致，非阿鞞跋致。有人言：行名是阿鞞跋致，菩薩身口意業異於他人，以此行表阿鞞跋致，甚深智慧。類者，分別知諸菩薩，是阿鞞跋致，非阿鞞跋致。相貌者，除行、類，餘種種因緣得知阿鞞跋致相。佛說義趣，若菩薩能具足五波羅蜜，深入般若波羅蜜，方便力故，不著般若波羅蜜，但觀如，所謂諸法實相。菩薩爾時，不以凡夫、二乘地為下賤，不以佛地為高貴，入諸法如故。諸法如中，無有分別二法，但以如入如，更無餘事，亦不分別取相。何以故？如平等故。能如是入者，即入諸佛法藏，心不生疑，更求諸法決定相。是故經說：須菩提！凡夫地乃

2716

至佛地，如相中無二無別。得如是法，名阿鞞跋致行、類、相貌。復次，略說是義。菩薩因諸法如，所謂畢竟空，捨一切世間事，亦不住畢竟空。何以故？得諸法畢竟清淨實相故。菩薩若聞是無依止法，心無疑悔，不念依止。自上事，是阿鞞跋致正體；自是以下，盡是畢竟空行果。得畢竟空故，心純熟寂滅相，不說無益語。所說常是法，不是非法；所說皆實，非妄說；所言柔輒，不粗獷，皆以慈悲心說，不以瞋恚心。所說應時，常得機會，觀察人心，隨其方俗。今此中略說利益之言，若教佛道，若二乘，若人天道，若今世得非罪樂，常遠離口四惡故，於衆生中，慈悲心大故，又能自摧薄諸煩惱故，是以能種種因緣說諸利益語。問曰：聲聞人直趣涅槃，可不觀他人？菩薩視衆生如子，常欲教化，云何不觀其長短？答曰：若衆生不可伏折，不

2717

可化度，如是等莫觀。何以故？若以好心教詔，則謂嫉己，如刀刺心；既無所益，更增其罪，是故不觀長短。復次，菩薩應作是念：如諸佛一切智，煩惱習盡，尚不能盡度衆生，何況我未得菩薩神通，未得無礙智，云何能普觀衆生？阿鞞跋致有得神通者，有不得者，得阿鞞跋致已，別修神通道乃得。若先得神通者，不具足故，不能徧觀。問曰：須菩提初問行、類、相貌，佛何以不即答無行、類、相貌？今此中方說。答曰：初問時，衆生未著阿鞞跋致相，故佛答或說空相，或說有相。今以衆生著阿鞞跋致相，欲從凡夫入阿鞞跋致地，是故佛說一切無行、無類、無相貌。須菩提以更問：若諸法盡空者，何以言於何法轉，名不轉？法應當從凡夫地轉於佛地，不轉。佛答：若菩薩能觀色等諸法空無所有，轉諸著心，故於佛道中不轉。色等法和

2718

合因緣生，菩薩知是有爲過罪故，不應此中住。諸法空故，能轉著心，轉著心故名不轉。復次，阿鞞跋致菩薩入正位故，心決定不疑。一切外道中有實智，若有實智，不名外道，如是名阿鞞跋致相。問曰：今說不生疑，後說深法不疑，是二不疑，有何差別？答曰：今不疑者，四諦中如須陀洹所斷，後不疑者，於佛所知深法中不疑。是菩薩福德智慧力故，雖不作須陀洹，未作佛而能無此二疑。戒取名外道戒，行此外道戒，不得涅槃。餘四見，皆名邪見。深信業因緣果報故，不求吉事，不以華香等供養天。求道破橋慢根本故，常不生下賤家。不障他功德，常行勸助故，不生八難處。折薄淫欲，遠離諂媚心故，不受女人身。復次，餘人雖行十善道，或一或二或三，不能具足四種，是菩薩大悲心，深愛善法故，具足行四種，常修集十善

2719

道故，乃至夢中不行十不善道。餘人所修福德，但自爲身。小菩薩雖爲衆生，亦自爲己。阿鞞跋致諸所作福，皆爲衆生，不爲其身。若福德可以與人，則盡與衆生，更自修習，但不可得與。故菩薩以十二部經教化衆生，亦但爲衆生，不自爲己。復次，菩薩信等五根利故，雖未作佛，於諸法能信。佛此中更說空因緣：菩薩不見色等法故，無生疑處。復次，是菩薩常行慈悲心，故意業柔輒，意業柔輒，故身、口慈業成就。問曰：慈悲心，外道亦有，云何說是阿鞞跋致相？答曰：外道雖有而不深，不能徧念衆生，亦不常有，非諸法實相和合故，菩薩不爾。復次，是菩薩訶五欲，除五蓋，入五支，初禪不與五蓋俱。五蓋覆心，能耗減智慧，破佛道，開魔路故。是菩薩知一切有爲作法，虛妄不實，如幻、如夢，無爲法空無所有，寂滅相，是故於一切

處無所愛著。於衆生中，乃至佛亦不著；於法中，乃至涅槃亦不著。瞋、粗罪，小菩薩已斷，故不說愛，深微難斷，故今說。復次，是菩薩深入禪定，故守護一切衆生；守護一切衆生，故常一心念，不惱衆生。不破戒，故出入來去等安詳一心。舉足下足，視地而行者，爲護衆生，爲避亂心。復次，是菩薩久修集無量無邊善法，身中無八萬戶蟲，亦少病痛，故衣服、臥具等常淨潔無汗。得諸法實相等善根力，故身中無八萬戶蟲。心清淨，故身、口等亦清淨，離虛誑、邪曲等下賤煩惱，故心清淨。二事清淨，故雖行世間，離諸逼迫苦惱，心不厭沒，故出過聲聞、辟支佛地。是菩薩貴佛道，故不貴利養。雖行頭陀，不貴是法，以是法是究竟道，因緣少分，非究竟道，是名阿鞞跋致菩薩行類相貌。問曰：是菩薩未得佛道，未斷諸煩惱，云何常不

生慳貪等諸惡心。答曰：阿鞞跋致菩薩，得無生法忍時，斷諸煩惱，但未斷習。若不斷者，云何常能不生諸慳貪等障道心？如經說：須陀洹乃至阿羅漢，即是菩薩無生法忍。復次，有人言：菩薩行六波羅蜜，深修集諸功德故，諸煩惱折薄，心中不生故，是名常不生。復次，是菩薩無量世行禪波羅蜜故，心住不動；積習般若故，深入智慧。是菩薩知法味微妙故，從他聞法，一心聽受；樂法情深故，所聞若三乘法，若外道及世間法，自心妙故，皆與般若和合，不破法相。譬如壯夫無病，所食之物，無不消化；又如佛得最上味相，雖復苦辛不美之食，在佛口中皆是上味；又如煮石蜜欲熟時，種種物內中，皆成石蜜，妙味力盛故。菩薩亦如是，般若波羅蜜力盛故，種種諸法，能令皆與般若合為一味，無諸過罪。復次，世間事者，菩薩所

2722

起身口諸業，皆為憐愍度眾生故；此憐愍心，皆入般若波羅蜜初門。又復世間諸事因緣，乃至坐起行步，飲食言語，常念安隱眾生。是來去等法，皆入法性，如破來去中說。產業之事，亦如是。是名阿鞞跋致相。

經「復次，須菩提！若惡魔於阿鞞跋致菩薩前，化作八大地獄，一大地獄中，有千萬億菩薩，皆被燒煮，受諸辛酸苦毒。語菩薩言：是諸菩薩皆是阿鞞跋致，佛所授記，墮大地獄中。汝若為佛授阿鞞跋致記者，當入是大地獄中；佛為授汝地獄記，汝不如還捨菩薩心，可得不墮地獄，得生天上。須菩提！若是菩薩見是事，聞是事，心不動，不疑，不驚，作是念：阿鞞跋致菩薩，若墮地獄，畜生，餓鬼中，終無是處。須菩提！以是行類相貌，當知是名阿鞞跋致菩薩摩訶薩。」

2723

復次，須菩提！惡魔化作比丘被服，來至菩薩所，語菩薩言：汝先聞應如是淨修六波羅蜜，乃至應如是淨修得阿耨多羅三藐三菩提，是事汝疾悔捨。汝先於過去未來現在諸佛所，從初發心乃至法住於其中間所作善根，隨喜迴向阿耨多羅三藐三菩提，是事汝亦疾放捨。若汝疾捨，我當語汝真佛法。汝先所聞皆非佛法，非佛教，皆是文飾合集作耳。我所說是真佛法。若是菩薩聞作是說，心驚疑悔，當知是菩薩未得諸佛授記，未定住阿鞞跋致性中。若是菩薩心不動，不驚不疑，不悔，隨順依止無作無生法，不信他語，不隨他行。行六波羅蜜時，不隨他語，乃至行阿耨多羅三藐三菩提時，亦不隨他語。須菩提！譬如漏盡阿羅漢，不信他語，不隨他行。現見諸法實相，惡魔不能轉。如是，須菩提！阿鞞跋致菩薩摩訶薩。

2724

亦如是。求聲聞道，辟支佛道人，不能破壞，不能折伏其心。須菩提！是菩薩摩訶薩，必定住阿鞞跋致地中，不隨他語，乃至佛語不直信取。何況求聲聞、辟支佛人及惡魔、外道梵志語，終無是處。何以故？是菩薩不見有法可隨信者。所謂色、若受、想、行、識，若色如乃至識如，乃至不見阿耨多羅三藐三菩提，何況阿耨多羅三藐三菩提。須菩提！以是行類相貌，當知是名阿鞞跋致菩薩摩訶薩。」

「復次，須菩提！魔作比丘身來到菩薩所，語菩薩言：汝所行者是生死法，非薩婆若道。汝今身取苦盡證，是時惡魔為菩薩用世間行說似道法。此似道法，是三界繫，觀不淨，所謂骨相。若初禪乃至非有想非無想。語善男子：用是道，用是行，當得須陀洹果，乃至當得阿羅漢果。汝行是道，今世苦盡，汝用受生死中種種苦惱，為今

2725

是四大身尚不用受，何況當更受未來身，須菩提！若是菩薩摩訶
 薩，心不驚、不疑、不悔，作是念：是比丘益我不少，為我說似道法，
 是似道法，不得至須陀洹果證，不得至阿羅漢、辟支佛道證，何況
 得至阿耨多羅三藐三菩提！是菩薩摩訶薩，益復歡喜，作是念：是
 比丘益我不少，為我說障道法，我知是障道法，不障學三乘道。是
 時惡魔知菩薩歡喜，作是言：善男子！汝欲見是菩薩摩訶薩，供養
 如恆河沙等諸佛，衣被、飲食、臥具、醫藥、資生所須，亦於如恆河沙
 等諸佛所，行檀波羅蜜、尸羅波羅蜜、羼提波羅蜜、毗梨耶波羅蜜、
 禪波羅蜜、般若波羅蜜，亦親近如恆河沙等諸佛，諮問菩薩摩訶
 薩：世尊！菩薩摩訶薩，云何住菩薩摩訶薩乘？云何行檀波羅蜜、
 尸羅波羅蜜、羼提波羅蜜、毗梨耶波羅蜜、禪波羅蜜、般若波羅蜜？

2726

四念處，乃至大慈大悲，是菩薩摩訶薩如佛所教，如是住，如是行，
 如是修，是菩薩摩訶薩如是教，如是學，尚不得阿耨多羅三藐三
 菩提，不得薩婆若，何況汝當得阿耨多羅三藐三菩提？若菩薩摩
 訶薩聞是事，心不異、不驚，益復歡喜，作是念：是比丘益我不少，為
 我說障道法，是障道法，不得須陀洹道，乃至不得阿羅漢、辟支佛
 道，何況得阿耨多羅三藐三菩提！是時惡魔知是菩薩心不沒、不
 驚，即於是處化作多比丘，語菩薩言：此皆是發意求佛道菩薩，今
 皆住阿羅漢地，是輩尚不得阿耨多羅三藐三菩提，汝云何能得？
 若菩薩摩訶薩，即作是念：此是惡魔說相似道法，菩薩摩訶薩行
 般若波羅蜜，不應轉阿耨多羅三藐三菩提心，亦不應墮聲聞、辟
 支佛道中。復作是念：行檀波羅蜜、尸羅波羅蜜、羼提波羅蜜、毗梨

2727

耶波羅蜜、禪波羅蜜、般若波羅蜜，乃至一切種智，不得阿耨多羅三藐三菩提，無有是處，須菩提！以是行類相貌，當知是名阿鞞跋致菩薩摩訶薩。復次，須菩提！若菩薩摩訶薩作是念：若菩薩能如佛所說，不遠離般若波羅蜜心，乃至一切種智，是菩薩終不退阿耨多羅三藐三菩提。若菩薩覺知魔事，亦不失阿耨多羅三藐三菩提。以是行類相貌，當知阿鞞跋致菩薩摩訶薩相。」

須菩提白佛言：「世尊！於何法轉，名為不轉？佛言：於色相轉，於受、想、行、識相轉，於十二入相、十八界相、淫欲、瞋恚、愚癡相、邪見相、四念處相，乃至聲聞、辟支佛相，乃至佛相轉。以是故，名為不退轉菩薩摩訶薩相。何以故？是阿鞞跋致菩薩摩訶薩，以是自相空法，入菩薩位，得無生法忍，乃至少許法不可得，不可得故，不作，不作故

2728

不生，是名無生法忍。菩薩摩訶薩，以是行類相貌，當知是阿鞞跋致菩薩摩訶薩。」

論釋曰：魔了了知是菩薩是阿鞞跋致者，不復沮壞。若未了了知者，則種種因緣，驗試破壞。或作八大地獄，化作無數菩薩在中燒煮。語菩薩言：此皆是阿鞞跋致諸佛授記者。汝若受記，為受地獄記。問曰：惡魔何因緣故，言行善者受地獄記？答曰：惡魔以是菩薩欲代一切衆生受苦故，言受地獄記。汝若行福德生天者，則自為身，無豫衆生事。若菩薩聞是事，心動、疑悔，若信受魔語，當知是未受阿鞞跋致記。若菩薩聞是事，不疑、不動、不驚，作是念：阿鞞跋致，得諸法實相故，不著一切法，不著一切法故，乃至不生小罪，何況三惡道罪！如火中有水，水中生火，無有是處。復有魔作比丘被服

2729

來語菩薩。汝先從小師聞修六波羅蜜法，皆是虛妄，所集隨喜心功德，亦是虛誑。汝先所聞，皆是虛誑，文飾不真，非是佛口所說。今我爲汝說者，真是佛法，汝疾捨之。若菩薩聞是，心動、瞋、疑，當知諸佛未與授記，譬如僞金，火燒磨打，若黑、若赤、若白，乃知非真。若菩薩聞是不瞋、不疑，隨無生無滅，無起無作法，行於六波羅蜜相中，自知不隨於他語，當知是真阿鞞跋致。譬如阿羅漢漏盡故，諸魔事來不能破，阿鞞跋致菩薩亦如是，無能降伏者。自現前知諸法實相故，乃至魔作佛身來，所說異於法相者，亦不信受。譬如狗著師子皮，諸獸見之雖怖，聞聲則知是狗，何況變作餘身等。此中佛自說因緣，是菩薩見色等法空故，誰當隨他語？復次，惡魔來作比丘身，語菩薩言：是六波羅蜜皆是生死道，布施

2730

等福德因緣故，欲界中受福樂，禪波羅蜜因緣故，色界中受樂，是般若波羅蜜無定相故，名虛誑法，迴轉五道中，不能自出，是生死道。人誑汝言，是一切種智道，我今實語，汝取涅槃，今世盡苦。是菩薩若默然，魔即爲說似道法，若觀三十六種不淨，若觀骨人，若出入息，因是道得四禪、四無色定，汝因是禪定，可得須陀洹，乃至阿羅漢。汝今此身是罪因緣所生，佛說彈指頃不讚更受身，何況久住生死中。阿鞞跋致菩薩聞是事，心喜作是念：是比丘大益我，爲我說似道法，我得是似道法，即知真道，如行路人，知邪徑則知正道，障道亦如是。阿鞞跋致是大人，貴重故，不與是比丘爭語。魔見菩薩默然歡喜，言是人信受我語，語菩薩言：善男子，有無量菩薩供養如恆河沙等諸佛，諮問奉行六波羅蜜及菩薩道法，面受佛

2731

教，盡受行諸菩薩行，尚不得無上道，今皆作阿羅漢。汝欲見不菩薩聞是事已默然。魔於是處，即化作無數阿羅漢比丘，語菩薩言：是諸比丘皆久行無上道，今皆取阿羅漢。汝今云何獨欲作佛？阿鞞跋致即復歡喜，是比丘為我說似道障道法。是菩薩實行六波羅蜜，諸功德定不退墮二乘。如佛所說，心常不離六波羅蜜等諸功德，不得無上道，無有是處。菩薩若知是魔事，則大得利益而無所失。以是故，菩薩心不動轉，是名阿鞞跋致相。

2732

爾時，須菩提白佛言：世尊，於何法轉，名為不轉？佛言：於色相等法中轉還。上略說，今當廣說。若菩薩於色等相皆能轉，是名行一切法性空，得無生法忍，入菩薩位。無生忍者，乃至微細法不可得，何況大！是名無生。得是無生法，不作不起諸業行，是名得無生法忍。

得無生法忍菩薩，是名阿鞞跋致。如是等無量行類相貌，是阿鞞跋致相。

釋轉不退輪品第五十六之上 經作轉不轉品

釋「復次，須菩提，惡魔到菩薩所，壞其心，作是言：薩婆若與虛空等，無所有相，諸法亦與虛空等，空無所有相。是虛空等諸法，空無所有相中，無有得阿耨多羅三藐三菩提者，亦無有不得者。是諸法皆如虛空，無所有相。汝唐受勤苦，汝所聞阿耨多羅三藐三菩提，皆是魔事，非佛所說。汝當放捨是願，汝莫長夜受是不安隱，憂苦墮惡道。是諸善男子、善女人，聞是訶時，應如是念：是惡魔事，壞我阿耨多羅三藐三菩提心。諸法雖如虛空，無所有，自相空，而眾生不知、不見、不解。我亦以是如虛空等，無所有，自相空，大誓莊嚴。」

2733

得一切種智，為衆生說此法，令得解脫，得須陀洹果，斯陀含果，阿那含果，阿羅漢果，辟支佛道，阿耨多羅三藐三菩提。須菩提！菩薩摩訶薩從初發意已來，聞如是法，應堅固其心，不動不轉。菩薩摩訶薩以是堅固心，不動不轉，心行六波羅蜜，當入菩薩位。須菩提白佛言：「世尊！不轉故名阿鞞跋致，轉故亦名阿鞞跋致。」佛言：「不轉故名阿鞞跋致，轉故亦名阿鞞跋致。」須菩提白佛言：「世尊！云何不轉故名阿鞞跋致，轉故亦名阿鞞跋致？」佛告須菩提：「若菩薩摩訶薩於聲聞地、辟支佛地不轉，是故名不轉。若菩薩摩訶薩於聲聞地、辟支佛地轉，是故亦名不轉。須菩提！以是行類相貌，當知是名阿鞞跋致菩薩摩訶薩相。以是行類相貌故，惡魔不能壞其意，令離阿耨多羅三藐三菩提。復次，須菩提！阿鞞

2734

跋致菩薩摩訶薩，若欲入初禪、第二、第三、第四禪，乃至滅受想定，禪即得入。復次，須菩提！阿鞞跋致菩薩摩訶薩，若欲修四念處，乃至八聖道分，空、無相、無作三昧，乃至五神通，即能修。是菩薩雖修四念處，乃至五神通，是人不受四念處果，雖修諸禪，不受諸禪果，乃至不受滅受想定禪果，不證須陀洹果，乃至不證辟支佛道。是菩薩故，為衆生受身，隨其所應而利益之。須菩提！以是行類相貌，當知是名阿鞞跋致菩薩摩訶薩。復次，須菩提！是阿鞞跋致菩薩摩訶薩，常憶念阿耨多羅三藐三菩提，終不離薩婆若心，故不貴色，不貴相，不貴聲聞，辟支佛，不貴檀波羅蜜，尸羅波羅蜜，羼提波羅蜜，毗梨耶波羅蜜，禪波羅蜜，般若波羅蜜，不貴四禪，四無量心，四無色定，不貴五神通，不貴四念處，乃至八聖道分，不貴佛十力。

2735

乃至十八不共法，不貴淨佛世界，不貴成就衆生，不貴見佛，不貴
 種善根。何以故？一切法自相空，不見可貴法，能生貴心者。何以故？
 是一切法與虛空等，無所有自相空。須菩提！是阿鞞跋致菩薩摩
 訶薩，成就是心，於四種身儀中，出入來去坐臥行住，一心不亂。須
 菩提！以是行類相貌，當知是阿鞞跋致菩薩摩訶薩。復次，須菩提！
 阿鞞跋致菩薩摩訶薩，若在居家，以方便力，爲利益衆生故，受五
 欲。布施衆生，須食與食，須飲與飲，衣服臥具，乃至資生所須，盡給
 與之。是菩薩自行檀波羅蜜，教人行檀讚歎行檀法，歡喜讚歎行
 檀波羅蜜者，尸羅波羅蜜乃至般若波羅蜜，亦如是。須菩提！阿鞞
 跋致菩薩摩訶薩，在家時，能以滿閻浮提珍寶，施與衆生，乃至三
 千大千世界，滿中珍寶，給施衆生，亦不自爲常修梵行，不陵易虜

2736

掠他人，令其憂惱。須菩提！以是行類相貌，當知是名阿鞞跋致菩
 薩摩訶薩。復次，須菩提！阿鞞跋致，是菩薩摩訶薩，執金剛神王常
 隨逐，作是願：是菩薩摩訶薩，當得阿耨多羅三藐三菩提，我常隨
 逐，乃至五性執金剛神，常隨守護。以是故，若天、若魔、若梵、若餘世
 間大力者，不能破壞。是菩薩摩訶薩，薩婆若心，乃至得阿耨多羅
 三藐三菩提。須菩提！是名菩薩摩訶薩阿鞞跋致相。復次，須菩提！
 菩薩摩訶薩，常具足菩薩五根：信根、精進根、念根、定根、慧根，是名
 阿鞞跋致相。復次，須菩提！阿鞞跋致菩薩摩訶薩，爲上人不爲下
 人。須菩提！白佛言：「世尊云何爲上人？」佛告須菩提：「若菩
 薩摩訶薩，一心行阿耨多羅三藐三菩提，心不散亂，是名上人。以
 是行類相貌，當知是阿鞞跋致相。復次，須菩提！阿鞞跋致菩薩，一

2737

心常念佛道，不作呪術，合和諸藥，不呪鬼神，令著男女，問其吉凶，男女祿相，壽命長短，何以故？須菩提！是菩薩摩訶薩，知諸法自相空，不見諸法相，故不行邪命而行淨命，須菩提！以是行類相貌，當知是名阿鞞跋致菩薩摩訶薩相。」

釋曰：復有阿鞞跋致菩薩相，若惡魔作是言：薩婆若與虛空等。薩婆若有種種名字，或說一切智，或說一切種智，或說無上道，或說無量諸佛法，或說菩提，皆是薩婆若名字。此中說薩婆若，當知是阿耨多羅三藐三菩提。一切菩薩皆願欲得薩婆若，魔來欲壞，作是言：是薩婆若空無所有，但諸師誑汝耳。如虛空無所有，無色無形，不可知，薩婆若亦如是，是故說與虛空等。諸法者，六波羅蜜等趣薩婆若助道法，是法亦空。薩婆若空無所有相，諸法但有名

字，無有實事。是中無得薩婆若者，無趣薩婆若，無有助道者，汝唐受辛苦。汝師常教汝離魔事，薩婆若即是魔事，何以故？捨涅槃，取生死故。汝先所聞經，若六波羅蜜義，非是佛法，皆是人造。汝今疾悔，捨是邪心，若不捨，長夜受三惡道苦。阿鞞跋致菩薩聞是事，即覺知魔事，是魔毀訾薩婆若，欲令我遠離阿耨多羅三藐三菩提。何以故？一切法雖空無所有，而凡夫衆生顛倒覆心故，不知不見。我亦當以自相空莊嚴，得一切智，爲衆生說法。若一切法空，我以實莊嚴，是不相應。若諸法空，莊嚴亦空者，是則相稱，爲衆生說法，亦如是。令衆生得須陀洹果，須陀洹果有二種：一者，三結斷無爲法；二者，空無相，無作三昧，相應有爲須陀洹果。是二皆空有爲法中，三脫門故，空無爲法中，無生無住無滅相，故即是空。乃至阿耨

多羅三藐三菩提，亦如是。阿鞞跋致菩薩，從初發意已來，聞是法，堅固其心，不動不轉。一切諸煩惱箭不入，故名為堅。一切外道魔民不能轉，故名不動。於阿耨多羅三藐三菩提不退，故名不轉。是菩薩以如是三種心行六波羅蜜，入菩薩位。菩薩位義，如先說，是名入菩薩位。入菩薩位者，名阿鞞跋致。須菩提問，不轉，故名阿鞞跋致，轉，故名阿鞞跋致。佛二種答，以二諦故。所謂世諦第一義諦。若菩薩入菩薩位，轉聲聞辟支佛心，直入菩薩位，是名轉。不轉者，入阿鞞跋致第一義。諸法一相中，所謂無相，尚無一乘定相，何況三乘！則無所轉，無所轉，故名阿鞞跋致。復次，阿鞞跋致雖行欲界法度衆生，於禪定出入自在，於禪定自在故，若欲教化他人修四念處，乃至八聖道分，三解脫門，乃至五神通，皆得自在。雖入禪定，

2740

其心清淨柔軟，故不受長壽天福。於欲界教化，雖修四念處道法，亦不證須陀洹果，乃至不證辟支佛道。是菩薩觀十方國土，知何處有可利益衆生處，故為受身生其國，如是等名阿鞞跋致相。是菩薩一心深念，常不離阿耨多羅三藐三菩提，故但貴阿耨多羅三藐三菩提，不貴餘事。所謂諸佛三十二相金色身，不捨本願度衆生故，不貴聲聞辟支佛道。是人貴無所得畢竟空故，不貴是布施，乃至不貴種善根，何況五欲世間利養，何以故？菩薩觀一切法自相空，不見實定法可生貴心。復次，有人有所貪貴，故心動不能自安，若得則歡喜，失則憂感。菩薩無所貴，無所貪，故至於得失，心清淨不動。身行口行調和不異，故身四威儀，一心常念，無所違失。復次，深入禪波羅蜜，故身四威儀無所違失。問曰：經中說阿鞞

2741

跋致菩薩方便力，爲利益衆生故受五欲，是何等方便？答曰：譬如以鉗取火，雖捉而不燒。五欲如火，能燒人善根。是菩薩思惟：我出家一身，云何能以布施攝衆生？衆生多須飲食、衣服、須法者少。菩薩爲攝衆生故，故生富貴家，布施衆生，悉其所須。出家，在家衆生，能廣利益，譬如大地，人民、鳥獸皆蒙利潤。是時四種行六波羅蜜，若出家讚布施。或有人言：汝自一身無財，但教人施，則不信受。是故菩薩方便作白衣，以財充滿一切而勸行施，人則信受。是菩薩或作轉輪聖王，心念施時，則滿閻浮提珍寶，如頂生王宮殿中，心生欲寶，則寶至于膝。或作帝釋，或作梵王，能雨珍寶滿三千世界，供養於佛，充滿一切。爲攝衆生故，而自不受。人受五欲，則心生憍慢，陵易於人。是人常斷淫欲，故諸煩惱薄，不生憍慢，不生憍慢故，

2742

不陵易衆生，是名阿鞞跋致相。復次，若菩薩得無生法忍，入菩薩位，得受記，即時執金剛神王等法，應隨逐守護。得佛道時，則現其身，時令人見。此中自說因緣：若人若非人，無能破壞。人破者，若殺、若縛、若論議得勝等。非人破者，與病、令狂、若奪命、若作惡身令其恐怖，若變作佛身說邪道。如是等不能折伏菩薩。問曰：若爲金剛神王所守護者，菩薩自無有力？答曰：菩薩亦自有力，復以菩薩功德故，能使金剛神所守護。金剛神所守護故，雖未得法身，而功德增益。又使天神見金剛神侍衛，故益加敬畏。具足菩薩根者，如人無眼等五情根，則無異木石。五情力故，能見、能聞。菩薩心中無信等五根，即是凡夫，不入聖數。問曰：如阿毗曇經說：誰成就五根，不斷善根者。今何以言無信等五根，即是凡夫？答曰：不斷善根衆生，

2743

雖成就五根，而不能發起爲用。譬如小兒，雖成就煩惱淫欲等，未能發用，故言無信等五根亦如是。衆生雖有不發不用，是故不數。信等五根有二種：一者屬聲聞、辟支佛；二者屬佛、諸菩薩。屬聲聞、辟支佛五根，能深信涅槃，能以智慧知世間無常空，能知涅槃寂滅；菩薩五根，生深慈悲心於怨惡衆生，亦能觀諸法實相，所謂無生無滅等，雖未得佛，亦能信受佛事。復有以菩薩根故，能見能聞，能知諸佛神通力，非諸聲聞、辟支佛所及。如不可思議解脫經中說：舍利弗、目連、須菩提等，雖在佛左右，以無菩薩根故，不見是大菩薩會及所有神通力，亦不聞佛說不可思議解脫。是故說若菩薩具足得是信等五根故，名阿鞞跋致。問曰：餘經中說善人身口意業無惡，知恩報恩，能爲一切衆生故，自捨身樂，安隱衆生，有所

2744

利益，不求果報，如是等上人相。何以故？但說不散亂心行無上道一事，名爲上人。答曰：此中佛自略說，一心不散亂，盡攝諸善法。何以故？貪重佛道故，一切諸煩惱折薄，是故於衆生深加慈心，能自以身命給施，何況不知報恩等。常一心念阿耨多羅三藐三菩提，清淨持戒故，不行邪命，所謂不作祝術合藥。祝術者，能翳身令人不見，能變人爲畜獸，如是等種種祝術合藥者，餌食求仙，亦合和諸藥療疾，求財及求名聲。祝鬼者，有人欲知未來事，祝鬼令著男女，問其吉凶，生男生女，壽命脩短，豐樂勝負等。若有作者，爲攝衆生，破其憍慢，不爲財利名聞。何以故？是人知一切諸法自相空故。不見諸法相，所謂己身、妻子、男女等，不見是相故，不行邪命。

2745

大智度論卷第七十三

釋第五十五品
第五十六品之上

校譌

第九面八行乘宋第二十八面十二行陵宋第十三面四行詳

音釋

修妬路梵語也此云契掉徒弔切惛穢惛過各切穢穢也穢鳥穢切懈怠懈居陰切懈也獷古猛切詔丑改切
媚明秘切虜郎古切掠力朽切鉗巨鹽切夾祝職教切餌仍吏切
懃懃也 虜獲也 劫奪也 火器也 與呪同 藥餌也

2746

大智度論卷第七十四

龍 樹 菩 薩 造

姚秦三藏法師鳩摩羅什譯

釋轉不退輪品第五十六之下

經「復次，須菩提！今當更說阿鞞跋致菩薩摩訶薩行類相貌，一心諦聽。」佛告須菩提：「菩薩摩訶薩行般若波羅蜜，常不遠離阿耨多羅三藐三菩提心故，不說五眾事，不說十二入事，不說十八界事。何以故？常念觀五眾空相，十二入十八界空相故。是菩薩摩訶薩不好說官事，何以故？是菩薩諸法空相中住，不見法若貴若賤，不好說賊事，何以故？諸法自相空故，不見若得若失，不好說軍事，何以故？諸法自相空故，不見若多若少，不好說鬪事，何以故？」

2747

是菩薩摩訶薩住諸法如中，不見法若憎若愛，不好說婦女事，何以故？住諸法空中，不見好醜故，不好說聚落事，何以故？諸法自相空故，不見法若合若散，不好說城邑事，何以故？住諸法實際中，不見有勝有負，不好說國事，何以故？住實際中，不見法有所屬有不屬，不好說我事，何以故？法性中住，不見法是我是無我，乃至不見知者見者，如是等，不說種種世間事，但好說般若波羅蜜，不遠離薩婆若心，若行檀波羅蜜時，不為慳貪事；行尸羅波羅蜜時，不為破戒事；行羼提波羅蜜時，不為瞋爭事；行毗梨耶波羅蜜時，不為懈怠事；行禪波羅蜜時，不為散亂事；行般若波羅蜜時，不為愚癡事。是菩薩雖行一切法空而樂法愛法，是菩薩雖行法性常讚不壞法，而愛樂善知識，所謂諸佛及菩薩、聲聞、辟支佛，諸能教化令

樂住阿耨多羅三藐三菩提者，是人常願欲見諸佛，聞在所處國土中有現在佛，隨願往生，如是心常晝夜行，所謂念佛心，如是須菩提！阿鞞跋致菩薩摩訶薩，行初禪，乃至非有想非無想處，以方便力故，起欲界心，若衆生能行十善道者，及現在有佛處在中生，如是行類相貌，當知是為阿鞞跋致菩薩摩訶薩。復次，須菩提！阿鞞跋致菩薩摩訶薩，行般若波羅蜜時，住內空、外空，乃至無法有法空，住四念處，乃至空、無相、無作解脫門，於自地中了了知，不疑我是阿鞞跋致，非阿鞞跋致，何以故？乃至不見少許法於阿耨多羅三藐三菩提中，若轉若不轉，須菩提！譬如人得須陀洹果，住須陀洹地中，自了了知，終不疑不悔，阿鞞跋致菩薩摩訶薩亦如是，住阿鞞跋致地中，終不疑住是地中，淨佛世界，成就衆生種種魔

事起，即時覺知，亦不隨魔事，破壞魔事。須菩提！譬如有人作五逆罪，五逆罪心，乃至死時常逐不捨，雖有異心不能障隔。須菩提！阿鞞跋致菩薩摩訶薩亦如是，自住其地，心常不動，一切世間天人阿修羅不能動轉。何以故？是菩薩摩訶薩出一切世間天人阿修羅上，入正法位中，自證地中住，具足諸菩薩神通，能淨佛世界，成就衆生，從一佛界至一佛界，於十方佛所植諸善根，親近諮問諸佛。是菩薩如是住，種種魔事起覺而不隨，以方便力，處魔事著實際中，自證地中，不疑、不悔。何以故？實際中無疑相故，知是實際非一非二。以是因緣故，是人乃至轉身終不向聲聞、辟支佛地。是菩薩摩訶薩諸法自相空中，不見法若生若滅，若垢若淨。須菩提！是菩薩摩訶薩乃至轉身亦不疑，我當得阿耨多羅三藐三菩提。若

2750

不得。何以故？須菩提！諸法自相空，即是阿耨多羅三藐三菩提。須菩提！是菩薩摩訶薩住自證地中，不隨他語，無能壞者。何以故？是阿鞞跋致菩薩摩訶薩成就不動智慧故。須菩提！以是行類相貌，當知是阿鞞跋致菩薩摩訶薩。」

「復次，須菩提！是菩薩摩訶薩若惡魔作佛身來，語菩薩言：汝今於是間取阿羅漢道，汝亦無阿耨多羅三藐三菩提記，汝亦未得無生法忍，汝亦無是阿鞞跋致行類相貌，亦無是相得受阿耨多羅三藐三菩提記。須菩提！若菩薩摩訶薩聞是語，心不異、不沒、不驚、不畏，是菩薩應自知，我必從諸佛受阿耨多羅三藐三菩提記。何以故？諸菩薩以是法受記，我亦有是法得受記。須菩提！若惡魔，若為魔所使，作佛形像來，與菩薩授聲聞、辟支佛記。須菩提！是菩

2751

薩作是念是惡魔若爲魔所使，作佛形像來，諸佛不應教菩薩遠離阿耨多羅三藐三菩提，教住聲聞、辟支佛道。須菩提！以是行類相貌，當知是名阿鞞跋致相。復次，須菩提！惡魔復作佛身來到菩薩所，作是言：汝所學經書，非佛所說，亦非聲聞說，是魔所說。須菩提！是菩薩摩訶薩當作是知：是惡魔若魔所使，教我遠離阿耨多羅三藐三菩提。須菩提！當知是菩薩已爲過去佛所授記，住阿鞞跋致地。何以故？諸菩薩所有阿鞞跋致行類相貌，是菩薩亦有是行類相貌，是名阿鞞跋致菩薩相。復次，須菩提！阿鞞跋致菩薩摩訶薩，行般若波羅蜜時，爲護持諸法故，不惜身命，何況餘物！是菩薩護持法故，作是念：我不爲護持一佛法，我爲護持三世十方諸佛法故。須菩提！云何菩薩摩訶薩護持佛法故，不惜身命？須菩提！

2752

如佛說一切諸法真空。是時，有愚癡人破壞不受，作是言：非法，非善，非世尊教。須菩提！菩薩護持如是法故，不惜身命，菩薩亦應作是念：未來世諸佛，我亦在是數中，在中受記，是法亦是我法，以是故不惜身命。須菩提！菩薩見是利益故，護持是法，不惜身命。須菩提！以是行類相貌，知是阿鞞跋致相。

「復次，須菩提！阿鞞跋致菩薩摩訶薩，聞佛說法，不疑、不悔、聞已受持，終不忘失。何以故？得陀羅尼故。」須菩提言：「世尊！得何等陀羅尼，聞佛所說諸經而不忘失？」佛告須菩提：「菩薩得聞持等陀羅尼故，佛說諸經，不忘、不失、不疑、不悔。」須菩提白佛言：「世尊！但聞佛說法，不忘、不失、不疑、不悔，聞聲聞、辟支佛說，天龍鬼神、阿修羅、緊那羅、摩睺羅伽說，亦復不忘、不失、不疑、不悔耶？」佛告

2753

須菩提：「所有言說衆事得陀羅尼菩薩皆不忘不不失不疑不悔。須菩提：如是行類相貌成就故當知是阿鞞跋致菩薩摩訶薩。」

論釋曰：佛更欲細說阿鞞跋致相故告須菩提，一心諦聽。是菩薩常不離阿耨多羅三藐三菩提樂行畢竟空故，不喜說分別五衆十二入十八界決定相。又不喜說國王等事。如餘外道受他供養，無正道故，虛妄染著，心解愁故，說國事分別過去世諸王力勢等樂。阿鞞跋致菩薩不說是事，見一切世間常爲無常火燒衆生可愍，我未得佛道，我但應說度衆生法，不應說餘事。一切法畢竟空故，大小相不可得，賊等事亦如是。畢竟空即是如法性實際。行六波羅蜜不說六蔽。菩薩雖安住一切法空中而樂法愛法。何以故？是菩薩不著是一切法空故。又我行次第法禪定智慧等，然後得

一切法空，此空不可得口說而心著，是故先行次第法。復次，法性中不分別諸法故，法性非破壞相，是菩薩不著法性，憐愍衆生爲種種分別善不善法等，令衆生得解。雖爲衆生如是說，亦常讚歎不壞法，引導衆生令入法性中故。復次，阿鞞跋致菩薩更無親善，但以諸佛及大菩薩諸能讚歎諸實相法者爲親善。是人功德智慧大故，隨意所往，若欲至諸佛世界，隨意得生。是菩薩雖離欲得諸禪定，以方便力故，爲衆生欲界有現在佛處。生欲界者，故爲衆生留愛慢分，不以此禪定果報生色無色界。但以禪定柔和其心，不受其報。復次，是菩薩安住內空等諸空中，安住者深入通達，心無所著，故不生疑。我是阿鞞跋致，非阿鞞跋致。自心中深入智慧故，是名自地證。又是人不見一切法若轉若不轉，是故不生疑。

疑，名取相有所得，如人夜見樹杌，尋復生念，人形亦爾，便生疑心，若取此二相故名疑。菩薩行無相三昧故，於一切法中不取相，則無生疑處。此中佛說譬喻，如須陀洹從無始世來未得是無漏智慧，三結斷故，即自知得無漏法，於四諦中定心不疑。若苦若樂，阿鞞跋致亦如是，從無始世來未得諸法實相，所謂阿鞞跋致地，得時亦不生疑。諸生疑者，見違失事，不如本所聞故，是菩薩於一切法畢竟空故，不得是不如所聞法，疑無住處故無疑。自知此是究竟道，不可論，不可破。住是地中，教化衆生，淨佛世界，亦能以方便力故，破種種魔事。是阿鞞跋致法常隨逐菩薩，乃至成佛。此中佛說二譬喻：一者須陀洹，二者五逆，是一心厚重故不可卻。須陀洹心常不可卻，五逆心罪畢乃除。如人著衰，鬼常隨逐，阿鞞跋致心，

2756

復過於是。阿鞞跋致心，一切無能動轉者，種種苦事逼迫不能動，種種供養利樂因緣，不能令捨實相心及慈悲心。上來種種說阿鞞跋致相貌，今說其行事，所謂教化衆生，淨佛世界，從諸佛所新種善根，從一佛諮問諸佛諸深法要，及種種度衆生門。十方種種魔事起而不隨逐，以方便力，觀是魔事，如佛法觀諸魔身，如佛無異。所以者何？一切法及實際同一相，所謂無相故。是人轉身亦不向聲聞、辟支佛地，何以故？是菩薩初得阿鞞跋致地時，知一切法實相空，轉身心亦不向二地，心不自疑，若得無上道，若不得是菩薩，世世無人能降伏破壞者。

佛為驗是菩薩故，作譬喻。若魔作佛身來，欲誑試是菩薩，語言汝可今世取阿羅漢，汝無阿鞞跋致相，可得佛道，無生法忍，即是一

2757

切法，是中云何可得忍？若菩薩聞是，心不退沒，是菩薩自知必從諸佛受記。何以故？我有無生法忍，聞是魔事，心不怖畏故。復次，惡魔知是菩薩歡喜，與授聲聞、辟支佛道記者，若今世得阿羅漢，後世得辟支佛，若菩薩不隨此變化佛身語，覺知是魔，若魔所使，何以故？身是而言非，如試金錢，彈之聲出，則知其真偽。若佛與菩薩授聲聞、辟支佛記，終無是處，所以者何？諸佛種種方便，欲令一切人盡入佛道，云何引菩薩與聲聞記？復次，魔復化作佛身，語菩薩言：汝所行經書，盡是魔所說，是菩薩覺知是魔事，當知是菩薩已得受記，安住阿鞞跋致性中。復次，阿鞞跋致菩薩深愛樂法故，聞即心染，衣毛皆豎，念佛大悲，則歡喜悲泣；或於甚深法中生大歡喜，當知是阿鞞跋致。譬如大軍退敗，則怖懷迷悶，臥地似死，親族

見之，欲知活不以杖鞭之，若癩疹起者，則知必活。菩薩亦如是，皆是肉身，何以故？知必能成佛，若聞說佛法，身中相現，衣毛為豎，顏色相異，餘人聞不入心，則無異相，如死人無異，是菩薩深愛法故，能捨身為法。若佛、若佛弟子，於大會種種因緣，說諸法畢竟空，有一狂人，取音聲名字相，著是畢竟空，出其過罪。若諸法盡畢竟空，則無佛、無法、無罪、福業、因緣，亦無修行精進得道果報。如是等出無量過罪。阿鞞跋致菩薩觀察籌量，知說法者有無著心，隨佛語憐愍故說。知狂人著語言取相，破是畢竟空。爾時阿鞞跋致則沒命，佐助言：是狂人是邪見人，自沒邪見，亦多化衆人，令墮邪見，壞滅佛法，深懷瞋恨故，或自殺，或使弟子殺。爾時菩薩若死事至，為佐助法故，不以怖畏而壞諸法性。此中佛說因緣，菩薩作是念，未

來世佛，我亦在是數中，是法亦是我法，是我法故，不惜身命而守護之。作是思惟，我無量世中，為煩惱邪見故，喪身無數，今為十方三世諸佛法，佐助發起，若有益而死，勝無益而生。如是等為法故，不惜身命。

復次，是菩薩未成佛道，從佛聞甚深法，能盡受，不失信力，故能受，聞持陀羅尼力，故不失，斷疑陀羅尼力，故不疑。須菩提問：但聞佛語，能信持不疑，聞餘語亦爾。佛言：一切有所說者，皆能持。若二乘、天龍等，所說有道理，能信持不疑；無道理者，持之無疑而不信。復次，有人言：信是邪法，不疑不善是善。有人言：諸天龍二乘所說皆是佛法。以是阿鞞跋致相，聞則能持，無疑無悔。是菩薩雖未作佛，於諸法實相中都無有疑。如是等行類相貌，是阿鞞跋致菩薩。問

2760

曰：得何事來，名阿鞞跋致？答曰：阿毗曇毗婆沙中說：過三阿僧祇劫後，種三十二相因緣，從是已來，名阿鞞跋致。毗尼阿波陀那中說：從見然燈佛，以五莖華散佛，以髮布地，佛為授阿鞞跋致記，飛騰虛空，以偈讚佛，從是已來，名阿鞞跋致。此般若波羅蜜中，若菩薩具足行六波羅蜜，得智慧方便力，不著是畢竟空波羅蜜。觀一切法不生不滅，不增不減，不垢不淨，不來不去，不一不異，不常不斷，非有非無，如是等無量相待二法，因是智慧觀，破一切生滅等無常相。先因無常等破常等倒，今亦捨無生無滅等，捨無常觀等，於不生不滅亦不著，亦不墮空無所有中，亦知是不生不滅相，不得不著故，亦信用是不生不滅法。三世十方諸佛真智慧中，信力故通達無礙，是名菩薩得無生忍法，入菩薩位，名阿鞞跋致。是菩

2761

薩雖從初發心已來名阿鞞跋致。阿鞞跋致相未具足故，不與授記。何以故？外道聖人、諸天、小菩薩等，作此念佛見是人有何等事而與授記？是人於佛道因緣中未住，云何與授記？是故佛未與授記。是菩薩有二種：一者生死肉身，二者法性生身。得無生忍法，斷諸煩惱，捨是身後，得法性生身。肉身阿鞞跋致，亦有二種：有於佛前得授記；有不於佛前授記。若佛不在世時，得無生法忍，是不於佛前授記。問曰：若爾者，有人讀誦說正憶念，隨順無生法忍義，是人未得禪定，或生疑心，或為著心所牽，如是人比，是何等菩薩？為是阿鞞跋致？不答曰：是人不能名為阿鞞跋致。阿鞞跋致菩薩，於甚深佛法中尚無疑，何況無生忍初法門？是未得阿鞞跋致者，有二種：一者信少疑多，二者疑少信多。信少疑多者，於讀誦經人小勝；

2762

信多疑少者，若得禪定，即時得柔順忍，未斷法愛故，或生著心，或還退沒。是人若常修習此柔順忍，柔順忍增長，故斷法愛，得無生忍，入菩薩位。略說阿鞞跋致相義。

釋深奧品第五十七之上 經作優莊 深奧品

經須菩提白佛言：「世尊！是阿鞞跋致菩薩摩訶薩，大功德成就！世尊！是阿鞞跋致菩薩摩訶薩，無量功德成就！無邊功德成就！」佛告須菩提：「如是！如是！是阿鞞跋致菩薩摩訶薩，大功德成就！是阿鞞跋致菩薩摩訶薩，無量無邊功德成就。何以故？是阿鞞跋致菩薩摩訶薩，得無量無邊智慧，不與一切聲聞、辟支佛共。故阿鞞跋致菩薩，住是智慧中，生四無礙智，得是四無礙智，故一切世間天及人無能窮盡。」

2763

須菩提白佛言：「世尊！佛能以如恆河沙等劫，歎說阿鞞跋致菩薩摩訶薩行類相貌。」須菩提言：「世尊！何等深奧處，阿鞞跋致菩薩摩訶薩住？是中行六波羅蜜時，具足四念處乃至具足一切種智？」佛讚須菩提言：「善哉！善哉！須菩提！汝為阿鞞跋致菩薩摩訶薩，問是深奧處。須菩提！深奧處者，空是其義，無相、無作、無起、無生、無染、離、寂滅，如法性、實際、涅槃。須菩提！如是等法，是為深奧義。」須菩提白佛言：「世尊！但空乃至涅槃是深奧，非一切法深奧耶？」佛言：「一切法亦是深奧義。須菩提！色亦深奧，受、想、行、識亦深奧，眼亦深奧，乃至意、色乃至法，眼界乃至意識界，檀波羅蜜乃至般若波羅蜜，四念處乃至阿耨多羅三藐三菩提，亦深奧。」

「世尊！云何色深奧，乃至阿耨多羅三藐三菩提亦深奧？」佛言：

2764

「色如深奧故，色深奧，受、想、行、識如，乃至阿耨多羅三藐三菩提如深奧故，阿耨多羅三藐三菩提深奧。」世尊云何色如深奧，乃至阿耨多羅三藐三菩提如深奧？」須菩提！是色如，非是色，非離色，乃至識如，非是識，非離識，乃至阿耨多羅三藐三菩提如，非是阿耨多羅三藐三菩提，非離阿耨多羅三藐三菩提。」須菩提白佛言：「希有！世尊！微妙方便力故，令阿鞞跋致菩薩離色處涅槃，亦令離受、想、行、識處涅槃，亦令離一切法，若世間，若出世間，若有諍，若無諍，若有漏，若無漏法處涅槃。」佛言：「如是！如是！須菩提！佛以微妙方便力故，令阿鞞跋致菩薩離色處涅槃，乃至離有漏、無漏法處涅槃。」

2765

「須菩提！若菩薩摩訶薩如是甚深法與般若波羅蜜相應，觀察、

籌量思惟，作是念：我應如是行，如般若波羅蜜中教；我應如是學，
 如般若波羅蜜中說。須菩提！若是菩薩摩訶薩，能如說行，如說學，
 如般若波羅蜜中觀，具足勤精進，一念生時，當得無量無邊阿僧
 祇福德，是菩薩摩訶薩，超越無量劫，近阿耨多羅三藐三菩提。何
 況常行般若波羅蜜，應阿耨多羅三藐三菩提，念須菩提，譬如多
 淫欲人，與端正淨潔女人共期，此女人限礙，不得時往。於須菩提
 意云何？是人所念，為在何處？「世尊！是人念念常在彼女人所，恆
 作是念，憶想當來，與共坐臥歡樂。」須菩提！是人一日一夜，為有
 幾念生？須菩提言：「世尊！是人一日一夜，其念甚多。」佛告須
 菩提：「菩薩摩訶薩，念般若波羅蜜，如般若波羅蜜中說，行是道，
 一念頃，超越劫數，亦如彼人一日一夜，心念之數，是菩薩摩訶薩

2766

行般若波羅蜜，遠離眾罪，所謂離阿耨多羅三藐三菩提罪。是菩
 薩摩訶薩，行般若波羅蜜，一日所得善根功德，假令滿如恆河沙
 等三千大千世界中，餘功德，猶亦不減；於餘殘功德，百分不及一
 分，千分千億萬分，乃至算數譬喻，所不能及。

論釋曰：須菩提聞阿鞞跋致相時，具聞阿鞞跋致功德，心大歡喜。
 讚歎阿鞞跋致功德，故白佛言：世尊！阿鞞跋致成就大功德，成就
 無量無邊功德。佛可其所讚，更自說大功德等因緣。所謂阿鞞跋
 致，菩薩得無量無邊智慧，不與聲聞、辟支佛共行者，要先知而後
 行，行已受其功德，以是故說功德因緣。由於智慧無量無邊，智慧
 者，所謂般若波羅蜜。菩薩住是般若波羅蜜中，能生四無礙智。一
 切法實義中，智慧無礙無障，既知義無礙，已分別種種諸法名字，

2767

爲說義故，是名法無礙，是名字要由言語，由語言故出是種種名字，是名辭無礙，得是法無礙及辭無礙故，便樂說諸法實義，是名樂說無礙。菩薩安住四無礙中，一切衆生問難，無能窮盡如大海水，不可傾竭。

須菩提聞佛上二品中說阿鞞跋致具足相，入此品，佛方開四無礙門，更欲說阿鞞跋致相。是故須菩提讚佛：世尊智慧無量無邊，阿鞞跋致功德亦無量無邊，佛若恆河沙等劫樂說，樂說亦不可盡，阿鞞跋致相貌亦不可盡。世尊何等是阿鞞跋致深奧處？阿鞞跋致菩薩住是深奧處，能具足六波羅蜜，四念處，乃至一切種智。佛歎須菩提善哉！汝能爲阿鞞跋致菩薩問深奧義。佛語須菩提：空等乃至涅槃，是名深奧。問曰：諸有法種種細分別，人不解故有

深，空無所有，以何爲深？答曰：非直口說名字故空，分別解諸有相，內不見有我，外不見定實法，得是空已，觀一切法相皆是虛誑，有諸過罪，若滅諸相，更不作願生三界。此空是得道空，非但口說，是故言深。復次，空亦復空，若著是空，則有過失，是不名深。若空從破，邪見有故出，是爲深。若於空中，亦不著空，故亦深。復次，觀五衆生滅，破常顛倒，觀畢竟空，破生滅。何以故？空中無無常、無生滅，故無生滅。有二種：一者邪見人謂世間常有，故無生滅；二者破生滅，故言無生滅。此中破生滅，亦不著是不生不滅，故名爲深。諸煩惱難除，故言離欲寂滅，故深。錯誤易，真實難。故如法性，實際爲深涅槃。諸梵天等九十六種道所不能及，故深。復次，涅槃中，一切得道人入者，永不復出，故深。問曰：此中說空等法深，是何等空？答曰：有人

言：三三昧空、無相、無作、心數法名爲空空故能觀諸法空。有人言：外所緣色等諸法皆空緣外空故名爲空三昧。此中佛說不以空三昧故空亦不以所緣外色等諸法故空。何以故？若外法不實空以三昧力故空者是虛妄不實。若緣外空故生三昧者是亦不然！所以者何？若色等法實是空相則不能生空三昧。若生空三昧則非是空。此中說離是一邊說中道所謂諸法因緣和合生是和合法無有一定法故空。何以故？因緣生法無自性無自性故即是畢竟空。是畢竟空從本已來空非佛所作亦非餘人所作諸佛爲可度衆生故說是畢竟空相。是空相是一切諸法實體不因內外有是空相有種種名字所謂無相、無作、寂滅、離、涅槃等。須菩提知諸菩薩利根深著涅槃爲是菩薩故問世尊但涅槃甚深諸法不甚

2770

深耶。佛答正觀色等一切法得涅槃色等諸法因涅槃故甚深是故經中說色等如故甚深。色等如即是正觀。須菩提問云何色等如故。色等法甚深。此中佛自說深因緣所謂如非是色非離色。譬如以泥爲瓶泥非即是瓶不離泥有瓶亦不得言無瓶。須菩提知是因緣法甚深如大海無有底故讚言希有世尊佛以微妙方便力故令菩薩離色等諸法處於涅槃亦不著涅槃亦不住世間是微妙方便。

佛可其所說讚歎菩薩行諸法實相果報福德告須菩提如是甚深法與般若相應觀察籌量等一念生時得無量無邊阿僧祇福德。問曰二乘無漏法尙無果報福德何況大乘畢竟空觀法得無量福德而福德從大慈悲愍衆生故生如罪亦由惱害衆生故得。

2771

答曰：二乘無漏心中煩惱盡故，無果報福德；菩薩煩惱未盡故，應有福德果報。復次，二乘於實際證故，燒盡諸功德；菩薩不證，更有生故，便有福德。復次，人於實事錯謬故，福德少；正行實事故，得福多。如施畜生得百倍，施惡人得千倍，施善人得十萬倍，施離欲人得十億萬倍，施須陀洹等諸聖人得無量福。凡夫人雖離欲行慈悲心，不得實法相故，不得作無量福田；須陀洹雖未離欲，分別諸法實相故，福田無量。諸法實相得有深淺，是故菩薩深入實相故，一念中福德無量無邊。此中念念福德多故，說譬喻。衆生心雖念念生滅，但相續生故，不覺隨滅。淫欲人心深著所欲，不遂情故，心生憶念，取相種種分別不來因緣事，所謂彼女爲心自悔不來，爲人遮不來。如是等多生覺觀心，是心易覺知故，以爲譬喻。如是一

2772

念因緣，事超一劫。如人服軟藥，一歲乃瘥病；服大力藥，一日能瘥。菩薩亦如是，行五波羅蜜久久乃成佛者；有行般若波羅蜜疾得成佛者。復次，一日行般若波羅蜜功德，假令有形，取滿如恆河沙等三千大千世界中，於一日中正功德體，猶故不減，於此福德百分不及一，乃至算數譬喻所不能及。

經「復次，須菩提！若菩薩摩訶薩遠離般若波羅蜜，如恆河沙等劫布施三寶、佛寶、法寶、比丘僧寶，須菩提！於汝意云何？是菩薩摩訶薩以是因緣故，得福多不？」須菩提言：「世尊！甚多無量無邊阿僧祇。」佛告須菩提：「不如菩薩摩訶薩深般若波羅蜜中，一日如說修行得福多。何以故？般若波羅蜜是諸菩薩摩訶薩道，乘是道，疾得阿耨多羅三藐三菩提。須菩提！若菩薩遠離般若波羅

2773

蜜如恆河沙劫供養須陀洹斯陀含阿那含阿羅漢辟支佛及諸佛，於須菩提意云何？是菩薩摩訶薩以是因緣故得福多不？須菩提言：「世尊甚多！」佛言：「不如是菩薩摩訶薩深般若波羅蜜如說修行，一日得福多。何以故？菩薩摩訶薩行是般若波羅蜜，過一切聲聞、辟支佛地，入菩薩位，漸漸得阿耨多羅三藐三菩提。須菩提！菩薩摩訶薩遠離般若波羅蜜，如恆河沙劫布施持戒忍辱精進禪定智慧，於意云何？是人以是因緣故得福多不？」須菩提言：「世尊甚多！」佛言：「不如是菩薩摩訶薩行般若波羅蜜如說修行，一日布施持戒忍辱精進禪定智慧得福多。何以故？須菩提！般若波羅蜜是菩薩摩訶薩母故，是般若波羅蜜能生諸菩薩摩訶薩。諸菩薩摩訶薩住般若波羅蜜中，能具足一切佛法。須菩

2774

提！若菩薩摩訶薩遠離般若波羅蜜，如恆河沙劫壽行法施。須菩提於汝意云何？是人得福多不？」須菩提言：「甚多世尊！」佛言：「不如是善男子、善女人深般若波羅蜜如說修行，乃至一日法施得福多。何以故？須菩提！是菩薩摩訶薩不遠離般若波羅蜜，則不遠離一切種智，不遠離一切種智，則不遠離般若波羅蜜。以是故，須菩提！菩薩摩訶薩欲得阿耨多羅三藐三菩提，不當遠離般若波羅蜜。須菩提！若菩薩摩訶薩如恆河沙劫遠離般若波羅蜜，修行四念處乃至八聖道分內空乃至一切種智。須菩提於汝意云何？是善男子、善女人得福多不？」須菩提言：「世尊甚多！」佛言：「不如是善男子、善女人深般若波羅蜜如說一日修行四念處，乃至一切種智得福多。何以故？須菩提！若菩薩摩訶薩不遠離

2775

般若波羅蜜，於薩婆若轉者，無有是處。須菩提！若菩薩摩訶薩遠離般若波羅蜜，於薩婆若轉，則有是處。須菩提！以是故，菩薩摩訶薩常不應遠離般若波羅蜜行。須菩提！若菩薩摩訶薩遠離般若波羅蜜，如恆河沙劫壽財施、法施及禪定福德，迴向阿耨多羅三藐三菩提。於汝意云何？是人得福多不？須菩提言：「世尊甚多，甚多！」佛言：「不如是善男子、善女人深般若波羅蜜如說修行，乃至一日財施、法施、禪定福德，迴向阿耨多羅三藐三菩提，得福多。何以故？是第一迴向，所謂般若波羅蜜迴向；若遠離般若波羅蜜迴向，是不名迴向。須菩提！以是故，菩薩摩訶薩欲得阿耨多羅三藐三菩提，應方便學般若波羅蜜迴向。須菩提！若善男子、善女人遠離般若波羅蜜，如恆河沙劫壽過去、未來、現在諸佛及弟子，

2776

善根和合，隨喜迴向阿耨多羅三藐三菩提。須菩提！於汝意云何？是人得福多不？須菩提言：「世尊甚多！」佛言：「不如是善男子、善女人深般若波羅蜜如說修行，乃至一日，隨喜善根迴向，是阿耨多羅三藐三菩提，得福多。須菩提！以是故，菩薩摩訶薩欲得阿耨多羅三藐三菩提，應學般若波羅蜜中，方便迴向阿耨多羅三藐三菩提。」

須菩提白佛言：「世尊！如佛所說因緣起法，從妄想生非實，云何善男子、善女人得大福德？世尊用是因緣起法，不應得正見，入法位，不應得須陀洹果，乃至不應得阿耨多羅三藐三菩提果。」佛告須菩提：「如是如是！須菩提！用是因緣起法，不應得正見，入法位，乃至不應得阿耨多羅三藐三菩提。須菩提！行般若波羅蜜，若

2777

薩摩訶薩，知因緣起法亦空，無堅固，虛誑不實。何以故？須菩提！是菩薩摩訶薩善學內空，乃至善學無法有法空故。是菩薩摩訶薩住是十八空，種種觀作法空，即不遠離般若波羅蜜。若菩薩摩訶薩如是漸漸不遠離般若波羅蜜，漸漸得無數無量無邊福德。須菩提白佛言：「世尊！無數無量無邊有何等異？」須菩提！無數者，名不墮數中，若有為性中，若無為性中。無量者，量不可得，若過去，若未來，若現在。無邊者，諸法邊不可得。須菩提言：「世尊！頗有色亦無數無量無邊，頗有受想行識亦無數無量無邊？」須菩提！有因緣色亦無數無量無邊，受想行識亦無數無量無邊。世尊！何等因緣故，色亦無數無量無邊，受想行識亦無數無量無邊？佛告須菩提：「色空故，無數無量無邊，受想行識空故，無數無量

2778

無邊。世尊！但色空，受想行識空，非一切法空耶？」須菩提！我不說一切法空耶？須菩提言：「世尊！說一切法空，世尊！諸法空，即是不可盡，無有數，無量無邊。世尊！空中數不可得，量不可得，邊不可得。以是故，世尊！是不可盡，無數無量無邊義，無有異。」佛告須菩提：「如是如是，是法義無別異。須菩提！是法不可說，佛以方便力故分別說，所謂不可盡，無數無量無邊，無著，空，無相，無作，無起，無生無滅，無染涅槃。佛種種因緣，以方便力說。」須菩提白佛言：「希有世尊！諸法實相不可說，而佛以方便力說。世尊！如我解佛所說義，一切法亦不可說。」佛言：「如是如是，須菩提！一切法不可說，一切法不可說相即是空，是空不可說。」世尊！不可說義有增有減不？」佛言：「不也！須菩提！不可說義無增

2779

無減。世尊若不可說義無增無減，檀波羅蜜亦當無增無減，乃至般若波羅蜜亦當無增無減，四念處乃至八聖道分亦當無增無減，四禪、四無量心、四無色定、五神通、八背捨、八勝處、九次第定、佛十力、四無所畏、四無礙智、十八不共法，亦當無增無減。世尊若菩薩摩訶薩六波羅蜜不增，乃至十八不共法不增者，云何菩薩摩訶薩得阿耨多羅三藐三菩提？」佛言：「如是如是，須菩提不可說義無增無減。菩薩摩訶薩習行般若波羅蜜，有方便力故，不作是念：我增般若波羅蜜，乃至增檀波羅蜜。當作是念：但名字故名檀波羅蜜。是菩薩摩訶薩行檀波羅蜜時，是心及善根，如阿耨多羅三藐三菩提相迴向，乃至行般若波羅蜜時，是心及善根，如阿耨多羅三藐三菩提相迴向。」須菩提白佛言：「世尊何等是

2780

阿耨多羅三藐三菩提？」佛言：「一切法如相，是名阿耨多羅三藐三菩提。」須菩提白佛言：「世尊何等是一切法如相，是阿耨多羅三藐三菩提？」佛告須菩提：「色如相，受、想、行、識如相，乃至涅槃如相，是阿耨多羅三藐三菩提；是如相亦不增不減。須菩提！是菩薩摩訶薩不離般若波羅蜜，常觀是如法，不見有增有減，以是因緣故，須菩提不可說義無增無減，檀波羅蜜亦不增不減，乃至十八不共法亦不增不減。須菩提！菩薩摩訶薩以是不增不減法故，應般若波羅蜜行。」

論釋曰：離般若波羅蜜，恆河沙劫供養三寶，不及一日行般若。又復有人住壽如恆河沙等劫供養須陀洹等，亦不及一日行般若。此中佛自說因緣：菩薩行般若，過二地，入菩薩位，成無上道，又復

2781

遠離般若，恆河沙等劫行布施等六法，亦不及一日如所說住般若中，行布施等六法。是中說勝因緣：般若是諸佛母，住是般若中，能具足諸佛法。施財竟，若遠離般若，如恆河沙等劫行法施，不及一日住般若中行法施。復次，遠離般若，用聲聞辟支佛法修行四念處，如恆河沙等劫，不如一日如所說住般若中修四念處，乃至一切種智。此中自說勝因緣：所謂不離般若，於薩婆若轉者，無有是處。復次，菩薩離般若，如恆河沙等劫財施、法施、禪定，生福德，迴向無上道，不如一日應般若財施、法施、禪定，生福德，迴向無上道。何以故？般若波羅蜜無雜毒，正迴向故。復次，若菩薩離般若，壽如恆河沙劫等，十方三世諸佛功德，隨喜迴向無上道，不如一日應般若隨喜迴向。

2782

爾時，須菩提難佛：如佛說一切有爲法，虛誑不實如幻，不能生正見，入正位，云何菩薩一日福德勝佛可其言如是如是？有爲法皆虛誑，不得以虛誑法入正位，得聖道。菩薩行般若波羅蜜時，所作福德，知皆虛誑，空無堅固，心不著是福德，是福德清淨故，勝餘福德。如金剛雖小，能摧破大山。此中佛說菩薩善巧，學十八空，雖觀空而能行諸功德，雖知涅槃無上道，而憐愍衆生故，修集福德，雖知一切法相不可說，而爲衆生種種方便說法，雖知法性中無有分別一相無相，而爲衆生分別是善是不善，是可行是不可行，是取是捨，是利是失等。若菩薩雖觀畢竟空，而能起諸福德，是名不離般若波羅蜜行。若菩薩常不離般若波羅蜜，漸得無數、無量、無邊功德，何以故？若菩薩初學般若時，煩惱力強，般若力弱，漸漸得

2783

般若力，斷諸煩惱，滅諸戲論，是故得福德無數、無量、無邊。無數、無量、無邊義，佛自分別說。所謂無數者，不墮若有為性中，若無為性中。三世量不可得，故名無量。十方邊亦不可得，故名無邊。須菩提問佛：五衆頗有因緣，亦無數無量無邊耶？佛答：有，以五衆空故，亦無數無量無邊。須菩提問：世尊！但五衆空，非一切法空耶？佛答：一切法空。須菩提言：是空法即不可盡，不可盡故即是無數，無數即是無量，無量即是無邊。是故空中盡不可得，故名無盡，數不可得，故名無數，量不可得，故名無量，邊不可得，故名無邊。四事名雖異，義是一，所謂畢竟空。佛可其言，如是！更自說因緣。須菩提：是空法相不可說，若可說，不名為空。佛以大慈悲心，憐愍衆生，故方便為說，強作名字語言，令衆生得解。所謂空，或說不可盡、無數、無量、無

邊等。是實相不生不作，故說不盡。諸聖人得諸法實相，入無餘涅槃時，不墮六道數。是實相法亦不墮有為、無為等諸法數中，是故說無數。量名，以智慧稱量好醜多少大小是非等。諸法實相中，滅諸相故，是故說無量。諸法實相不可量，故說無邊。是實相法寂滅故，說無著。是實相法我所定相不可得，故說空空故無相，無相則無作無起。是法常住不壞，故無生無滅。是法能斷三界染，故名無染。更不織煩惱業，故名涅槃。如是等有無量名字，種種因緣，說是諸法實相。

爾時，須菩提白佛：希有世尊！諸法實相雖不可說，而佛以方便力說。如我解佛義，非但實相不可說，一切諸法亦不可說。佛可其言而說因緣：一切法終歸於空，歸於空故不可說，不可說義即是無

增無減。若一切法無增無減，六波羅蜜等諸善法，亦無增無減。若六波羅蜜善法不增者，云何得無上道？佛可其言，更為說因緣。法雖無增減，而可得無上道，所謂菩薩習行般若波羅蜜，方便力故。雖行檀波羅蜜諸助道法，我我所，憍慢斷故，不作是念，我增長是六波羅蜜等法，不取內外諸法相，行是諸善法，如無上道相迴向。須菩提問：何等是無上道？佛答：諸法如，即是無上道。須菩提問：何等是一切法？佛答：色等法，乃至涅槃。是諸法如，寂滅相，是無上道相。寂滅者，不增不減，不高不下，滅諸煩惱戲論，不動不壞，無所障礙。菩薩以般若波羅蜜方便力故，亦能令布施等如寂滅相。如是種種因緣，說無上道相。若菩薩常念無上道寂滅相，令一切法皆同寂滅相，亦觀不可說義，所謂不增不減相，菩薩如是疾得無上

2786

道，以不增不減，不可得故。

大智度論卷第七十四

音釋

机五忽切木無枝也 偽危睡切詭也 據其據切懼也 鞭卑連切切 癩疹癩於謹切疹止忍切癩疹皮外小起也 軟乳究切柔也 織質刀切

2787

大智度論卷第七十五

龍 樹 菩 薩 造

姚秦三藏法師鳩摩羅什譯

釋深奧品第五十七之下

須菩提白佛言：「世尊！菩薩摩訶薩，用初心得阿耨多羅三藐三菩提，用後心得阿耨多羅三藐三菩提，世尊！是初心不至後心，後心不在初心。世尊！如是心心數法不俱，云何善根增益？若善根不增，云何當得阿耨多羅三藐三菩提？」佛告須菩提：「我當為汝說譬喻，智者得譬喻，則於義易解。須菩提！譬如然燈，為用初燄焦炷，為用後燄焦炷，須菩提！言：「世尊！非初燄焦炷，亦非離初燄。世尊！非後燄焦炷，亦非離後燄。」須菩提！於汝意云何？炷為焦不？」

2789

大智度論卷七十五 釋深奧品第五十七之下

大智度論卷七十五 釋深奧品第五十七之下

「世尊！炷實焦。」佛告須菩提：「菩薩摩訶薩如是，不用初心得阿耨多羅三藐三菩提，亦不離初心得阿耨多羅三藐三菩提，不用後心得阿耨多羅三藐三菩提，亦不離後心得阿耨多羅三藐三菩提，而得阿耨多羅三藐三菩提。須菩提！是中菩薩摩訶薩從初發意行般若波羅蜜，具足十地，得阿耨多羅三藐三菩提。」須菩提白佛言：「世尊！何等是十地？菩薩具足已得阿耨多羅三藐三菩提。」佛言：「菩薩摩訶薩具足乾慧地、性地、八人地、見地、薄地、離欲地、已作地、辟支佛地、菩薩地、佛地。具足是地，得阿耨多羅三藐三菩提。須菩提！菩薩摩訶薩學是十地已，非初心得阿耨多羅三藐三菩提，亦不離初心得阿耨多羅三藐三菩提，非後心得阿耨多羅三藐三菩提，亦非離後心得阿耨多羅三藐三菩提，而

2790

得阿耨多羅三藐三菩提。」須菩提言：「世尊是因緣法甚深，所謂非初心，非離初心，非後心，非離後心得阿耨多羅三藐三菩提，而得阿耨多羅三藐三菩提。」佛告須菩提：「於汝意云何？若心滅已，是心更生不？」「不也，世尊！」須菩提於汝意云何？心生是滅相不？」「世尊是滅相。」須菩提於汝意云何？心滅相是滅不？」「不也，世尊！」佛告須菩提：「於汝意云何？亦如是住不？」須菩提言：「世尊亦如是住，如如住。」佛告須菩提：「於汝意云何？若是心如如住，當作實際不？」「不也，世尊！」佛告須菩提：「於汝意云何？是如甚深不？」「世尊甚深甚深！」須菩提於汝意云何？但如是心不？」「不也，世尊！」離如是心不？」「不也，世尊！」須菩提於汝意云何？如見如不？」「不也，世尊！」須菩提於汝意云何？若菩薩能如是行，

2791

大智度論卷七十五 釋深奧品第五十七之下

三

大智度論卷七十五 釋深奧品第五十七之下

四

爲行深般若波羅蜜不？」須菩提言：「世尊若菩薩摩訶薩能如是行，爲行深般若波羅蜜。」須菩提於汝意云何？菩薩摩訶薩如是行，是何處行？」須菩提言：「世尊若菩薩摩訶薩如是行，爲無處所行。何以故？若菩薩摩訶薩行般若波羅蜜，住諸法如中，無如是念，無念處，無念者。」佛告須菩提：「若菩薩摩訶薩如是行，爲何處行？」須菩提言：「世尊是菩薩摩訶薩如是行，爲第一義中行，二相不可得故。」須菩提於汝意云何？若菩薩第一義無念中行，爲行相不？」「不也，世尊！」於汝意云何？是菩薩摩訶薩壞相不？」「不也，世尊！」佛告須菩提：「云何名不壞相？」須菩提言：「世尊是菩薩摩訶薩行般若波羅蜜，不作是念，我當壞諸法相。世尊菩薩摩訶薩行般若波羅

2792

蜜，未具足佛十力、四無所畏、四無礙智、大慈大悲、十八不共法，不得阿耨多羅三藐三菩提。世尊！菩薩摩訶薩以方便力故，於諸法亦不取相，亦不壞相。何以故？世尊！是菩薩摩訶薩知一切諸法自相空故。」

「菩薩摩訶薩住是自相空中，爲衆生故入三三昧，用三三昧成就衆生。」須菩提言：「世尊！云何菩薩摩訶薩入三三昧成就衆生？」佛言：「菩薩住是三三昧，見衆生作法中行，菩薩以方便力，教令得無作，見衆生我相中行，以方便力，教令行空，見衆生一切相中行，以方便力故，教令行無相。如是須菩提，菩薩摩訶薩行般若波羅蜜，入三三昧，以三三昧成就衆生。」

論須菩提問佛以初心得無上道爲用後心得者，問曰：須菩提何

因緣故，作是問難。答曰：須菩提上聞諸法不增不減，心自生疑。若諸法不增不減，云何得無上道？復次，若以如實正行得無上道，唯佛能爾。菩薩未斷無明等煩惱，云何能如實正行？復次，須菩提此中自說難問因緣，所謂初心不至後心，後心不在初心，云何增益善根得無上道？如是等因緣故，作是問：以初心得後心得，佛以深因緣法答，所謂不但以初心得，亦不離初心得。所以者何？若但以初心得，不以後心者，菩薩初發心，便應是佛。若無初心，云何有第二、第三心？第二、第三心，以初心爲根本因緣，亦不但後心，亦不離後心者，是後心亦不離初心，若無初心，則無後心。初心集種種無量功德，後心則具足具足，故能斷煩惱，習得無上道。須菩提此中自說難因緣，初後心心數法不俱不俱者，則過去已滅，不得和合。

若無和合，則善根不集。善根不集，云何成無上道？佛以現事譬喻答：如燈炷，非獨初燄焦，亦不離初燄，非獨後燄焦，亦不離後燄而燈炷焦。佛語須菩提：汝目見炷焦，非初非後而炷焦，我亦以佛眼見菩薩得無上道，不以初心得，亦不離初心，亦不以後心得，亦不離後心而得無上道。燈譬菩薩道，炷喻無明等煩惱，燄如初地相應智慧，乃至金剛三昧相應智慧，焦無明等煩惱炷，亦非初心智燄，亦非後心智燄，而無明等煩惱炷焦，盡得成無上道。此中佛更解得無上道因緣，所謂菩薩從初發心來行般若波羅蜜，具足初地乃至十地，是十地皆佐助成無上道。十地者，乾慧地等。乾慧地有二種：一者、聲聞，二者、菩薩。聲聞人獨為涅槃故，勤精進持戒清淨，堪任受道，或習觀佛三昧，或不淨觀，或行慈悲、無常等觀，分別

2795

集諸善法，捨不善法，雖有智慧，不得禪定水，則不能得道，故名乾慧地。於菩薩則初發心乃至未得順忍性地者，聲聞人從煖法乃至世間第一法，於菩薩得順忍，愛著諸法實相，亦不生邪見，得禪定水。八人地者，從苦法忍乃至道比忍，是十五心，於菩薩則是無生法忍，入菩薩位見地者，初得聖果，所謂須陀洹果，於菩薩則是阿鞞跋致地。薄地者，或須陀洹，或斯陀含，欲界九種煩惱分斷故，於菩薩過阿鞞跋致地，乃至未成佛，斷諸煩惱，餘氣亦薄。離欲地者，離欲界等貪欲諸煩惱，是名阿那含，於菩薩離欲因緣故，得五神通。已作地者，聲聞人得盡智、無生智，得阿羅漢，於菩薩成就佛地。辟支佛地者，先世種辟支佛道因緣，今世得少因緣出家，亦觀深因緣法，成道名辟支佛。辟支迦秦言因緣，亦名覺菩薩地者，從

2796

乾慧地，乃至離欲地，如上說。復次，菩薩地，從歡喜地乃至法雲地，皆名菩薩地。有人言：從一發心來乃至金剛三昧，名菩薩地。佛地者，一切種智等諸佛法，菩薩於自地中得具足，於地地中觀具足，二事具故名具足。問曰：何以故不說菩薩似辟支佛地？答曰：餘地不說名字，辟支佛地說辟支佛名字故。復次，菩薩能分別知衆生，可以辟支佛因緣度者，是故菩薩以智慧行辟支佛事。如首楞嚴經中，文殊尸利七十二億反作辟支佛。菩薩亦如是，滿足九地，修集佛法，十力、四無所畏等雖未具足，以修習近佛故名具足。以是故，言十地具足故，得無上道。是諸法皆因緣和合故，非初，亦不離初，非後，亦不離後而得無上道。須菩提，尊重是法，故歎言：世尊！是因緣法甚深，所謂過去心不滅、不住，而能增益得無上道。是事甚

2797

深希有，難可信解！此心爲住、爲滅耶？佛反問須菩提於汝意云何？若心滅已更生不者，諸法雖畢竟空，不生不滅，爲衆生以六情所見生滅法故，問心已滅更生不，須菩提言：不也！世尊！何以故？心滅已，云何當更生？若心滅已更生，則墮常中。若心生是滅相不者，上問過去心已，今問現在心相當滅，不是故答是滅相。何以故？生滅是相待法，有生必有滅，故先無今有，已有還無故。心滅相是滅不者，若心滅相即是滅耶？更有滅耶？答言：不也！世尊！何以故？若即是滅，則一心有兩時，生時、滅時。說無常者，心不過一念時，如何毗曇經說：有生法，有不生法；有欲生法，有不欲生法；有滅法，有不滅法；有欲滅法，有不欲滅法。生法現在一心中有二種：一者、生；二者、欲滅。生非欲滅相，欲滅相非生，是事不然，故言不也。當如是住不者，

2798

若滅相非即是滅者，應常住不若常住，即是不滅相。佛如是翻覆，難須菩提理窮故，作是念：我若言滅相即是滅，則一心墮二時，若言不滅，實是滅相，云何言不滅？以上二理有過故，須菩提自以所證智慧答世尊如是住，如如住。若是心如如住，當作實際不者，若說心相同如住者，如即是實際。若爾者，心可即作實際，不須菩提言不也！世尊何以故？須菩提久尊重是實際，心是虛誑法，小乘智慧力少，不能觀心即作實際，是故言不也。問曰：若須菩提已說是心如如，何以不得作實際？答曰：如名一切法實相，心實相亦名如。須菩提心謂：凡夫六情所見，虛妄顛倒，故有過。今說心相如實無咎，故言如如住。今實際即是涅槃，須菩提久貴涅槃，故不能即以心爲涅槃，是故言不也。復次，以實際無相，故不得言心即是實際。

2799

是如甚深不者，以須菩提言心如如住，復言不得作實際，是故問如甚深不須菩提不能徧知，故答言甚深。但如是心不須菩提答言不也！世尊何以故？如是一相不二相，心憶想分別因緣生故，是二相。如無所知，心有所知，又復如畢竟清淨故無所知，心有所覺知故。離如心亦如是，何以故？一切法皆有如，云何離如而有心？佛問須菩提：如能見如不？答如中無分別，是知是可知，是菩薩不住如、法性、實際，直行深菩薩道。佛問須菩提：若如是行，能行深般若波羅蜜不？須菩提自觀小乘淺薄，觀大乘法深故，答言如是行，是爲行深般若波羅蜜。

2800

爾時，有未得無生法忍菩薩，聞是法則心高，自謂出小乘，深入大乘。佛欲破其高心，故問須菩提：菩薩如是行，爲何處行？須菩提言：

如是行，爲無處所行。何以故？菩薩住如中，無所分別故。菩薩聞無處所行，或墮斷滅中，是故佛復問須菩提：菩薩行般若，爲何處行？須菩提言：第一義中行。第一義相者，無有二相。佛語須菩提：於汝意云何？若菩薩無念行第一義，是行取相法，不須菩提言不也！世尊！何以故？一切法畢竟空，無憶念，即不行相。佛問須菩提：是菩薩壞相得無相，不須菩提言不也！相從本已來無，但爲除顛倒故，不壞法相。佛語須菩提：若不壞相，云何行無相行？須菩提言：世尊！菩薩不作是念，我當破相，故行般若。是菩薩未具足佛十力等諸佛法，以方便力故，不作有相，不作無相。何以故？若取相，是相皆虛誑妄語，有諸過失；若破相，則墮斷滅中，亦多過失。是故不取有相，不取無相。取相即是有法，不取相即是無法。方便力故，離是有無二

2801

邊，行於中道。

此中佛自說因緣，所謂知一切法自性空故，不著有無，自相空破一切法相，亦自破其相。菩薩住是自相空中，起三三昧，利益衆生。衆生於六道中，種種作願受身：有人不攝心，不能修福，自放恣隨意造業，若墮地獄，臨死時冷風逼切，則願欲得火，便入地獄等三惡道；若得爲人，貧窮下賤，有人攝心，能折伏慳貪，行布施持戒等善行，是入欲界人天中富樂處；有人離欲界，除五蓋，因信等五根，得五支等諸禪，則生色界；有人捨諸色相，滅有對相，不念雜相，故入無邊虛空處無色定等。是諸所作，皆是邪願。何以故？久久皆當破壞墮落，譬如以繩繫鳥，繩盡復還。菩薩以是無作三昧，斷衆生作願。又復是身皆空，但有筋骨五藏，血塗皮裹，不淨充滿，風隨

2802

心動作，是心生滅不住，如幻如化，無定實相。衆生見是來去，語言諸相，故謂有人、有我、有所，起顛倒心，但憶想分別，故有是錯謬。菩薩以空三昧，斷衆生我、我所心，令住空中。又復衆生取諸男女、色、聲、香味、好醜、修短相，以取相故，生種種煩惱，受諸憂苦。菩薩以是無相三昧，斷衆生諸相，令住無相。問曰：若教化衆生，令得空、便足，何用無相、無作三昧？答曰：衆生根有利鈍，利根者聞空，即得無相、無作；鈍根者聞空，破諸法，即取空相，是故說無相。若人雖知空、無相，因是智慧，更欲作身，是有爲法，有種種過患，是故不應作身。如經說：離菩薩身，餘身彈指頃不可樂，何況久住！是故說無作。以是因緣，故具說三三昧，教化衆生。

釋夢行品第五十八

大智度論卷七十五 釋夢行品第五十八

一五

2803

大智度論卷七十五 釋夢行品第五十八

一六

爾時，舍利弗問須菩提：「若菩薩摩訶薩夢中入三三昧，空、無相、無作三昧，寧有益於般若波羅蜜不？」須菩提報舍利弗：「若菩薩晝日入三三昧，有益於般若波羅蜜，夜夢中亦當有益。何以故？晝、夜夢中等無異。舍利弗，若菩薩摩訶薩晝日行般若波羅蜜，有益，是菩薩夢中行般若波羅蜜，亦應有益。」舍利弗問須菩提：「菩薩摩訶薩若夢中所作業，是業有集成，不如佛說一切法如夢，以是故不應集成。何以故？夢中無有法集成。若覺時憶想分別，應有集成。」須菩提語舍利弗：「若人夢中殺衆生，覺已憶念，取相分別，我殺是快耶？舍利弗，是事云何？」舍利弗言：「無緣業不生，無緣思不生，有緣業生，有緣思生。」舍利弗如是如是，無緣業不生，無緣思不生，有緣業生，有緣思生。於見聞覺知法中心生，不從

2804

不見聞覺知法中心生，是中心有淨有垢。以是故，舍利弗！有緣故業生，不從無緣生；有緣思生，不從無緣生。舍利弗語須菩提：「如佛說一切諸業、諸思自相離，云何言有緣故業生，無緣不生有緣故思生，無緣思不生？」須菩提語舍利弗：「取相故，有緣業生，不從無緣生；取相故，有緣思生，不從無緣生。」

舍利弗語須菩提：「若菩薩摩訶薩，夢中布施、持戒、忍辱、精進、禪定、修智慧，是善根福德，迴向阿耨多羅三藐三菩提，是實迴向不？」須菩提語舍利弗：「彌勒菩薩今現在前，佛授不退轉記，當作佛，當問彌勒，彌勒當答。」舍利弗白彌勒菩薩：「須菩提言彌勒菩薩今現在前，佛授不退轉記，當作佛，彌勒當答。」彌勒菩薩語舍利弗：「當以彌勒名答耶？若色受想行識答耶？若色空答耶？若受、

想、行、識空答耶？是色不能答，受、想、行、識不能答，色空不能答，受、想、行、識空不能答。我不見是法可答，不見能答者，我不見是人受記，亦不見法可受記者，亦不見受記處，是一切法皆無二無別。」舍利弗語彌勒菩薩：「如仁者所說，如是為得法作證不？」彌勒答舍利弗：「如我所說法，如是不證。」爾時，舍利弗作是念：「彌勒菩薩智慧甚深，久行檀波羅蜜、尸羅波羅蜜、羼提波羅蜜、毗梨耶波羅蜜、禪波羅蜜、般若波羅蜜，用無所得故，能如是說。」爾時，佛告舍利弗：「於汝意云何？汝用是法得阿羅漢，見是法不？」舍利弗言：「不見也。」舍利弗菩薩摩訶薩行般若波羅蜜，亦如是不作是念：是法當得受記，是法已受記，是法當得阿耨多羅三藐三菩提。如是，舍利弗！菩薩摩訶薩行般若波羅蜜，不疑我若得，若不

得，自知實得阿耨多羅三藐三菩提。」

論問曰：舍利弗何以以夢難菩薩三昧？答曰：以夢虛誑如狂，非實見故，是三昧是實法。又復餘處說夢中亦有三種：善、不善、無記。若菩薩善心行三昧，應得福德，然夢是狂癡法，不應於中行實法得果報。若有實法，不名為夢，以是故問。若菩薩夢中行三昧，增益般若波羅蜜福德，集善根，近佛道，不須菩提意。若言有益，夢是虛誑，般若是實法，云何得增益？若言無益，夢中有善，云何無益？不得答言有益、無益，是故須菩提離此二邊難故，以諸法實相答。尚破晝日所行，何況夢中！作是言：舍利弗！菩薩若晝日行般若，有益者，夜亦應有益，而晝日無益，故何況夢中！何以故？般若波羅蜜，不分別有晝夜。舍利弗！聞須菩提所說，既知般若無增無減，不

應復難。今更因餘事問夢中，須菩提！若夢中所作業，是業有集成者，是業實集能成果報，不是業。若有實，佛常說一切法空如夢，不應得集成。何以故？是夢心微弱，故不能集成。晝日微弱心，尚不能集成，何況夢中！若覺已分別夢中生善不善心，是應集成。須菩提語舍利弗：如人夢中殺人，覺已分別我殺是快耶？舍利弗！是業云何，為集成？舍利弗語須菩提：一切業若晝若夢，皆從因緣生，無因緣則不生。須菩提可其言：如是業有因緣生，無因緣不生。思有因緣生，無因緣不生。業者身口業，思者但意業。思是真業，身口業為思，故名為業。是三業因四種法：若見、若聞、若覺、若知。因此四種則心生，是心隨因緣生，或淨或不淨，不淨罪業，淨福業。是故若夢中所見，皆因先見、聞、覺、知。夢中所作善惡，為眠覆心，不自在故，無

有勢力，不能集成果報。若是業得覺時，善惡心和合故，能助成果報。須菩提意謂：夢中業實有集成，何以故？有因緣起故，晝日心、夢中心無異。所以者何？皆因四種生故。舍利弗以空難須菩提，如佛說一切諸業自相離，汝云何定說諸業有因緣生，無因緣不生？須菩提答：諸法雖空遠離相，而凡夫取相，有緣故業生，若不取相，無因緣則不生。是故一切業，皆從取相因緣生，故有晝日夢中無異。舍利弗復問：若菩薩夢中行六波羅蜜，迴向無上道，是實迴向不？舍利弗難：若夢中晝日無異者，是夢中迴向應當是實。又復若晝日著心取相，不名為迴向，何況眠睡覆心，須菩提以此二難深，難答故，語舍利弗當問彌勒。問曰：彌勒何以但說空而不答？答曰：是二大弟子為利益菩薩故，分別覺夢若同若異，以佛常說一切法

2809

如夢故，若晝日行道，夢中亦應行道。彌勒知見二人各有所執，不能通達，是故彌勒不答。復有人言：彌勒以是空答。舍利弗問彌勒：如所說空，以此為證，不舍利弗意。若以此法為證，即欲生難，云何為證？若不證，汝自不得不知，云何能說？彌勒意：汝以涅槃為證，我以涅槃亦空，無所得，故不證。有人言：彌勒未具足佛法，故說言不證。菩薩法應知空、無相、無作法，不應證。爾時，舍利弗作是念：彌勒菩薩其智甚深，能如是說，能知涅槃相而不取證，是名甚深。此中舍利弗自說因緣，久行六波羅蜜，故其智甚深。舍利弗意：彌勒次當作佛，應當能答，而今不答，是故佛還問舍利弗於汝意云：何汝見用是法得阿羅漢？不舍利弗言：不見。何以故？是法空、無相、無作，云何得見？若見即是有相，肉眼、天眼分別取相，故不應見。慧眼無

2810

分別相，故亦不見，以是故言不見。佛言：菩薩摩訶薩亦如是，得無生忍時，不作是言見是法得受記，當得無上道；雖不作是見，亦不生疑，我不得無上道。如汝雖不見法，亦不疑我成阿羅漢，不成阿羅漢。

經佛告須菩提：「有菩薩摩訶薩行檀波羅蜜時，若見衆生飢寒凍餓，衣服弊壞，菩薩當作是願：我隨爾所時行檀波羅蜜，我得阿耨多羅三藐三菩提時，令我國土衆生無如是事。衣服、飲食、資生之具，當如四天王天、三十三天、夜摩天、兜率陀天、化樂天、他化自在天。須菩提！菩薩摩訶薩作如是行，能具足檀波羅蜜，近阿耨多羅三藐三菩提。復次，須菩提！菩薩摩訶薩行尸羅波羅蜜時，見衆生殺生乃至邪見，短壽多病，顏色不好，無有威德，貧乏財物，生下

賤家，形殘醜陋，當作是願：我隨爾所時行尸羅波羅蜜，如我得佛時，令我國土衆生無如是事。須菩提！菩薩摩訶薩作如是行，能具足尸羅波羅蜜，近阿耨多羅三藐三菩提。復次，須菩提！菩薩摩訶薩行羼提波羅蜜時，見諸衆生互相瞋恚罵詈，刀杖瓦石共相殘害奪命，當作是願：我隨爾所時行羼提波羅蜜，令我國土衆生無如是事。相視如父、如母、如兄、如弟、如姊、如妹、如善知識，皆行慈悲。須菩提！菩薩摩訶薩作如是行，能具足羼提波羅蜜，近阿耨多羅三藐三菩提。復次，須菩提！菩薩摩訶薩行毗梨耶波羅蜜時，見衆生懈怠，不勤精進，棄捨三乘，聲聞、辟支佛、佛乘，當作是願：我隨爾所時行毗梨耶波羅蜜，如我得阿耨多羅三藐三菩提時，令我國土衆生無如是事。一切衆生勤修精進，於三乘道各得度脫。須菩

提菩薩摩訶薩作如是行，能具足毗梨耶波羅蜜，近阿耨多羅三藐三菩提。復次，須菩提！菩薩摩訶薩行禪波羅蜜時，見衆生爲五蓋所覆：淫欲、瞋恚、睡眠、掉悔、疑，失於初禪，乃至第四禪，失慈悲喜捨，虛空處、識處，無所有處，非有想、非無想處，當作是願：我隨爾所時行禪波羅蜜，如我得阿耨多羅三藐三菩提時，令我國土衆生無如是事。須菩提！菩薩摩訶薩作如是行，能具足禪波羅蜜，近阿耨多羅三藐三菩提。復次，須菩提！菩薩摩訶薩行般若波羅蜜時，見衆生愚癡，失世間、出世間正見，或說無業、無業因緣，或說神常、或說斷滅，或說無所有，當作是願：我隨爾所時行般若波羅蜜，淨佛世界，成就衆生，如我得阿耨多羅三藐三菩提時，令我國土衆生無如是事。須菩提！菩薩摩訶薩作如是行，能具足般若波羅蜜，

2813

近一切種智。復次，須菩提！菩薩摩訶薩行六波羅蜜時，見衆生住於三聚：一者必正聚，二者必邪聚，三者不定聚，當作是願：我隨爾所時行六波羅蜜，淨佛世界，成就衆生，我得佛時，令我國土衆生無邪聚，乃至無其名。須菩提！菩薩摩訶薩作如是行，能具足六波羅蜜，近一切種智。復次，須菩提！菩薩摩訶薩行六波羅蜜時，見地獄中衆生、畜生、餓鬼中衆生，當作是願：我隨爾所時行六波羅蜜，淨佛世界，成就衆生，我得佛時，令我國土中乃至無三惡道名。須菩提！菩薩摩訶薩作如是行，能具足六波羅蜜，近一切種智。復次，須菩提！菩薩摩訶薩行六波羅蜜時，見是大地、林、杌、荆棘、山、陵、溝、坑、穢惡之處，當作是願：我隨爾所時行六波羅蜜，淨佛世界，成就衆生，我作佛時，令我國土無如是惡，地平如掌。須菩提！菩薩摩訶

2814

薩作如是行能具足六波羅蜜近一切種智。復次須菩提菩薩摩訶薩行六波羅蜜時見是大地純土無有金銀珍寶當作是願我隨爾所時行六波羅蜜淨佛世界成就衆生我作佛時令我國土以金沙布地須菩提菩薩摩訶薩作如是行能具足六波羅蜜近一切種智。復次須菩提菩薩摩訶薩行六波羅蜜時見衆生有所戀著當作是願我隨爾所時行六波羅蜜淨佛世界成就衆生我作佛時令我國土衆生無所戀著須菩提菩薩摩訶薩作如是行能具足六波羅蜜近阿耨多羅三藐三菩提。復次須菩提菩薩摩訶薩行六波羅蜜時見四姓衆生刹帝利婆羅門鞞舍首陀羅當作是願我隨爾所時行六波羅蜜淨佛世界成就衆生我作佛時令我國土衆生無四姓之名須菩提菩薩摩訶薩作如是行能具

足六波羅蜜近阿耨多羅三藐三菩提。復次須菩提菩薩摩訶薩行六波羅蜜時見衆生有下中上生下中上家當作是願我隨爾所時行六波羅蜜淨佛世界成就衆生我作佛時令我國土衆生無如是優劣須菩提菩薩摩訶薩作如是行能具足六波羅蜜近一切種智。復次須菩提菩薩摩訶薩行六波羅蜜時見衆生種種別異色當作是願我隨爾所時行六波羅蜜淨佛世界成就衆生我作佛時令我國土衆生無種種別異色一切衆生皆端正淨潔妙色成就須菩提菩薩摩訶薩作如是行能具足六波羅蜜近一切種智。復次須菩提菩薩摩訶薩行六波羅蜜時見衆生有主當作是願我隨爾所時行六波羅蜜淨佛世界成就衆生我作佛時令我國土衆生無有主名乃至無其形像除佛法王須菩提菩薩

摩訶薩作如是行，能具足六波羅蜜，近一切種智。復次，須菩提！菩薩摩訶薩行六波羅蜜時，見衆生有六道，別異當作是願。我隨爾所時行六波羅蜜，淨佛世界，成就衆生，我作佛時，令我國土衆生無六道之名。是地獄，是畜生，是餓鬼，是神，是天，是人。一切衆生皆同一業，修四念處，乃至八聖道分，須菩提！菩薩摩訶薩作如是行，能具足六波羅蜜，疾近一切種智。復次，須菩提！菩薩摩訶薩行六波羅蜜時，見衆生有四生：卵生、胎生、溼生、化生，當作是願。我隨爾所時行六波羅蜜，淨佛世界，成就衆生，我作佛時，令我國土衆生無三種生，等一化生。須菩提！菩薩摩訶薩作如是行，能具足六波羅蜜，近一切種智。復次，須菩提！菩薩摩訶薩行六波羅蜜時，見衆生無五神通，當作是願。我隨爾所時行六波羅蜜，淨佛世界，成就

衆生，我作佛時，令我國土衆生一切皆得五神通，乃至近一切種智。復次，須菩提！菩薩摩訶薩行六波羅蜜時，見衆生有大小便患，當作是願。我作佛時，令我國土衆生皆以法喜爲食，無有便利之患，乃至近一切種智。復次，須菩提！菩薩摩訶薩行六波羅蜜時，見衆生無有光明，當作是願。令我國土衆生皆有光明，乃至近一切種智。復次，須菩提！菩薩摩訶薩行六波羅蜜時，見有日月、時節、歲數，當作是願。我作佛時，令我國土中無有日月、時節、歲數之名，乃至近一切種智。復次，須菩提！菩薩摩訶薩行六波羅蜜時，見衆生短命，當作是願。我作佛時，令我國土中衆生壽命無量劫，乃至近一切種智。復次，須菩提！菩薩摩訶薩行六波羅蜜時，見衆生無有相好，當作是願。我作佛時，令我國土中衆生皆有三十二相成就，

乃至近一切種智。復次，須菩提！菩薩摩訶薩行六波羅蜜時，見衆生離諸善根，當作是願：我作佛時，令我國土中衆生諸善根成就，以是福德，能供養諸佛，乃至近一切種智。復次，須菩提！菩薩摩訶薩行六波羅蜜時，見衆生有三毒、四病，當作是願：我作佛時，令我國土中衆生無四種病：冷、熱、風病、三種雜病，及三毒病，乃至近一切種智。復次，須菩提！菩薩摩訶薩行六波羅蜜時，見衆生有三乘，當作是願：我作佛時，令我國土中衆生無二乘之名，純一大乘，乃至近一切種智。復次，須菩提！菩薩摩訶薩行六波羅蜜時，見衆生有增上慢，當作是願：我作佛時，令我國土中衆生無增上慢之名，乃至近一切種智。復次，須菩提！菩薩摩訶薩行六波羅蜜時，應作是願：若我光明、壽命有量，僧數有限，當作是願：我行六波羅蜜，淨

2819

佛世界成就衆生，我作佛時，令我光明、壽命無量，僧數無限，乃至近一切種智。復次，須菩提！菩薩摩訶薩行六波羅蜜時，應作是願：若我國土有量，當作是願：我隨爾所時行六波羅蜜，淨佛世界，成就衆生，我作佛時，令我一國土如恆河沙等諸佛世界，須菩提！菩薩摩訶薩作如是行，能具足六波羅蜜，近一切種智。復次，須菩提！菩薩摩訶薩行六波羅蜜時，當作是念：雖生死道長，衆生性多，爾時應如是正憶念：生死邊如虛空，衆生性邊亦如虛空，是中實無生死往來，亦無解脫者。菩薩摩訶薩作如是行，能具足六波羅蜜，近一切種智。

2820

【論問曰：有何次第故說菩薩見衆生飢寒凍餓等？答曰：菩薩過聲聞、辟支佛地，得無生法，忍受記，更無餘事，唯行淨佛世界，成就衆

生。今說淨佛世界因緣，見不淨世界相，願我國土無如是事，是故次第說是事。菩薩行檀波羅蜜時，若見衆生飢渴，衣服弊壞，即作念言：我福德智慧未成就，不能給足衆生所須。若我但行慈悲心，則於衆生無益。我當爾所時，深行三種福德，住三種福德中，能令貧窮衆生皆得滿足。若作轉輪聖王，若作天王，若作神通聖人，則能多引導衆生，破其慳貪，令住布施。以是衆生布施，乃至菩薩布施因緣故，後成佛時，國土中無有貧窮者，心生隨意所得，如欲界第六天所有諸物。菩薩如是隨爾所時，積集檀波羅蜜功德故，充滿一切。何以故？一切有爲法屬因緣，行善因緣具足故，皆應隨心得果報。復次，衆生破尸羅波羅蜜因緣故，短命多病，無有威德等。菩薩作是願：我自具足持戒，亦教衆生令持戒。餘殘諸願亦如是。

隨義分別。最後願義不明了，今當略說：菩薩作如上願已，疲厭心起。佛道無量無數，阿僧祇劫行諸功德，然後可得。但一劫歲數，不可得數。故佛以譬喻示人，何況無量無邊阿僧祇劫，經此生死受諸苦惱。衆生亦無量無邊，非可譬喻算數所及。但如三千大千世界中微塵等衆生，猶尚難度，何況十方無量世界微塵等衆生，而可得度。以是事故，或心生退沒，是名邪憶念。是故佛教是菩薩正憶念。生死雖長，是事皆空，如虛空，如夢中所見，非實長遠，不應生厭心。又未來世亦是一念所緣，亦非長遠。復次，菩薩無量福德智慧力，故能超無量劫。如是種種因緣，故不應生厭心。此中佛說大因緣，所謂生死如虛空，衆生亦如是。衆生雖多，亦無定實衆生。如衆生無量無邊，佛智慧亦無量無邊，度亦不難。是故菩薩不應生

疲厭心。

釋河天品第五十九 經作恆伽
提婆品

爾時，有一女人字恆伽提婆，在衆中坐。是女人從座起，偏袒右肩，右膝著地，合掌白佛言：「世尊！我當行六波羅蜜，取淨佛世界，如般若波羅蜜中所說，我盡當行。」是時，女人以金銀華及水陸生華種種莊嚴供養之具，金縷織成氈兩張，以散佛上，散已於佛頂上虛空中化成四柱寶臺，端正嚴好。是女人持是功德與一切衆生共之，迴向阿耨多羅三藐三菩提。爾時，世尊知是女人深心因緣，即時微笑，如諸佛法種種色光從口中出，青黃赤白紅縹，徧照十方無量無邊佛國，還遶佛三匝，從頂上入。爾時，阿難從座起，右膝著地，合掌白佛：「佛何因緣微笑諸佛法不以無因緣而笑？」

2823

大智度論卷七十五 釋河天品第五十九

三五

大智度論卷七十五 釋河天品第五十九

三六

佛告阿難：「是恆伽提婆姊未來世中當作佛，劫名星宿，佛號金華。阿難，是女人畢女身受男子形，當生阿閼佛、阿毗羅提國土，於彼淨修梵行。阿難，是菩薩在彼國土，亦號金華。是金華菩薩於彼壽終，復至他方佛國，從一佛國至一佛國，不離諸佛，譬如轉輪聖王，從一觀至一觀，從生至終，足不踏地。阿難，是金華菩薩摩訶薩，亦如是從一佛國至一佛國，乃至阿耨多羅三藐三菩提，未嘗不見佛。」時，阿難作是念言：「是金華菩薩摩訶薩，後作佛時，諸菩薩摩訶薩會當知爲如佛會。」佛知阿難意所念，告阿難言：「如是如是，金華佛時，菩薩摩訶薩會當知爲如佛會。阿難，是金華佛比丘僧無量無邊，不可數不可數，若干百千萬億那由他。阿難，是金華菩薩作佛時，其國土無有是諸衆惡，如上所說。」阿難白佛

2824

言：「世尊！是女人從何處植德本、種善根？」佛告阿難：「是女從然燈佛種善根，初發阿耨多羅三藐三菩提心，以是功德迴向阿耨多羅三藐三菩提，亦以金華散然燈佛上，求阿耨多羅三藐三菩提。阿難！如我爾時，以五華散然燈佛上，求阿耨多羅三藐三菩提。然燈佛知我善根成就，與我授阿耨多羅三藐三菩提記。是女人聞我授記，發心言：我當來世亦如是菩薩，得受阿耨多羅三藐三菩提記。阿難！當知是女人於然燈佛初發心。」阿難白佛言：「世尊！是女人久習行阿耨多羅三藐三菩提。」佛言：「如是如是！是女人久習行阿耨多羅三藐三菩提。」

論問曰：如是大眾聞說淨國土行，何以但一女人取淨國土願？答曰：多有發淨國土願者，但不發言。女人性輕躁好勝，世世習氣故

發言。復次，有人言：女人有得道分，餘人無分。佛法不然，隨眾生業因緣。譬如良藥療治諸病，不擇貴賤。雖復女人淺智，而先世業因緣，應得授記。心生欲說，故佛聽自說。復次，若佛默然與授記者，人則生疑，有何因緣，獨與此女授記？是故佛因其自說，故而與授記。問曰：何以名為恆伽提婆？答曰：一切皆有名字，為識故，何足求義？有人言：是女人父母供養恆伽神，得此女故，言恆伽提婆。恆伽是河名，提婆名天。是女人福德因緣，生於富家，聞佛法信樂，故能以金銀寶華，金縷織成上下衣，并莊嚴自身瓔珞具，用供養上佛。佛報以授記，觀是女人宿世所行，便微笑。微笑義如先說，此中小因緣而起大事故。佛微笑，問曰：是女福德，應久轉女人，何以方於阿閼佛國，乃轉女身？答曰：世間五欲難斷，女人著欲情多，故雖世

世行諸福德，不能得男子身。今得授記，諸煩惱折薄，是故於阿閼佛國，方得男子身。有人言：此女宿世以人多輕女人故，願女身受記。如是等因緣，不轉女身而得受記。復次，經說女人五礙，不說不得受記，是故不應生難。阿難聞是女人無量劫中從一佛國至一佛國，廣集功德，當來得淨佛世界，其中菩薩皆有三十二相，八十種隨形好，無量光明，是故阿難歎未曾有，能如是淨國土，便爲如佛會。佛可其言已，阿難等疑此女人希有，聞少法而得大果報，是故阿難問：是女人從何處植諸德本？佛答：錠光佛授我記時，是女人持金華散佛，彼作是願：此人後成佛時，亦當授與我記。從彼種善根，今得果報。

大智度論卷第七十五

大智度論卷七十五 釋河天品第五十九

三九

2827

大智度論卷七十五 釋河天品第五十九

四〇

音釋

焦苾消切 炷之成切 翻覆翻穿直切 繩食賊切 筋魯成切 凍多貢切 弊禮桑切 罵罵莫切 誓誓力直切
 株勝輪切 坑口莖切 縷力士切 纒徒協切 縹匹沼切 阿閼梵語也此云無 蹈徒到切 躁則到切
 錠徒盈切 錠即然燈佛也 (一) 錠 (二) 錠

2828